

Milik Departemen P dan K
Tidak diperdagangkan
Untuk umum

Hikayat Usman Basyah

2

Ramli Harun

ektorat
yaan

partemen Pendidikan dan Kebudayaan

899 2262
CAH

11

**HIKAYAT
USMAN BASYAH**


2

Proyek penerbitan Buku Sasta
Indonesia dan Daerah

Hak pengarang dilindungi undang-undang

Hikayat USMAN BASYAH 2

Oleh
RAMLI HARUN



Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1983

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah yang berasal dari Perpustakaan Museum Nasional Jakarta, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra
Indonesia dan Daerah

ASOE HIKAYAT

Kata Pengantar	5
Ringkasan Hikayat Usman Basyah Jilid II	9
I. Prang Ngon Raja Samidan	11
II. Usman Basyah Jeuet Keu Raja Nanggroe Indra	45
III. Raja Geunta Alam Keumeung Reubot Putroe Meurak .	84
IV. Raja Syarwan Bantu Usman Basyah	132
V. Jak U Nanggroe Meuse	180
VI. Meukawen Ngon Putroe Kariman Binti	214
VII. Peutroh Janji Ngon Syamsul Kama Dan Hasyim Jeuet Keu Raja	250

RINGKASAN
HIKAYAT USMAN BASYAH
JILID II

Ketika Bribot Tapa sedang bersiap-siap hendak menjemput raja Haliman Syah, datanglah raja Samidan dengan balatantranya yang besar hendak membantu abangnya yang kalah perang. Maka pertempuran berkobar lagi. Bribot Tapa berhadapan dengan panglima Bulee Kabat. Pasukan Samidan kewalahan menghadapi Iasykar Usman Basyah. Kedua anaknya dari Sailan datang membantu. Tetapi raja Samidan dan kedua anaknya akhirnya tewas di ujung pedang Usman Basyah. Negeri aman kembali. Kelima orang kakak Meurak Asanah dengan diantar oleh putri Daraman Ali menyerahkan diri mereka kepada Meurak Asanah.

Bribot Tapa pergi mencari baginda Haliman Syah di tempat persembunyiannya. Raja yang sudah liar itu dapat ditangkap dan dibawa pulang ke istana dalam keadaan luka-luka dan pingsan. Baginda diobati dan dirawat oleh putri bungsunya Meurak Asanah yang amat sedih melihat keadaan ayahnya. Tiada berapa lama kemudian baginda sembuh kembali seperti sedia kala. Tampuk pemerintahan diserahkan kepada menantunya Usman Basyah.

Adapun ratu Syarwan dari negeri Hairan yang datang ke negeri Indra atas undangan Usman Basyah telah membantu mencari jodoh bagi keenam saudara putri Meurak Asanah. Sesudah mereka dinikahkan dengan enam orang putra raja, Usman Basyah menyerahkan pimpinan kerajaan kepada kakak-kakak iparnya.

Tersebutlah sebuah negeri bernama Tasik Hitam. Rajanya bernama Geunta Alam yang terkenal karena kesaktiannya. Pada suatu malam ia bermimpi tidur bersama putri Meurak Asanah. Dari ahli nujum ia mendapat keterangan bahwa sangat sulit untuk mendapat Meurak Asanah karena suaminya seorang raja yang sakti. Dengan tidak menghiraukan keterangan ahli nujumnya Geunta Alam mengumpulkan para menteri dan hu-

lubangnya lalu memerintahkan untuk mengadakan persiapan perang. Ia akan menyerang negeri Indra dan merebut putri Meurak Asanah.

Sesudah beberapa lama dalam perjalanan sampailah balatantra Geunta Alam ke negeri Indra. Di suatu tempat Geunta Alam membuat kubu pertahanan. Sepucuk surat dikirimkannya kepada Usman Basyah. Ia meminta supaya Meurak Asanah dikirim kepadanya. Usman Basyah membalas surat bahwa ia akan mengirim seekor anjing sebagai ganti putri. Alangkah marahnya Geunta Alam menerima penghinaan itu. Pasukan Geunta Alam segera diperintahkan untuk menyerang negeri Indra. Perperangan terjadi. Adu sakti berlangsung dengan serunya. Sesudah mendapat bantuan dari ratu Syarwan barulah balatantra raja Geunta Alam dapat ditundukkan. Geunta Alam menyerah.

Usman Basyah bersama anak isterinya tinggal di istana negeri Indra dengan keenam kakak iparnya dalam keadaan damai. Tiga tahun kemudian Usman Basyah pulang ke Mekah dengan mengendarai burak saktinya untuk menjenguk ibunya yang sudah lama ditinggalkannya. Kemudian ia meneruskan perjalananannya ke pulau Ruja menemui putri Meulu. Putri Meulu mengingatkan Usman Basyah bahwa orang Yahudi yang dahulu hendak membunuhnya harus dicari karena ia tetap akan membunuh Usman Basyah pada setiap kesempatan. Usman Basyah pergi ke negeri Syairan mencari orang Yahudi yang tidak membunuhnya. Sesudah bertemu mereka saling mengadu sakti. Akhirnya orang Yahudi itu dapat ditewaskan. Sesudah itu Usman Basyah kembali lagi ke pulau Ruja.

Beberapa waktu lamanya Usman Basyah tinggal di pulau Ruja. Putri Baniroh, salah seorang dari ketujuh orang gadis penjaga istana membujuk Usman Basyah supaya kawin dengan putri Meulu, tetapi Usman Basyah menolaknya karena putri Meulu sudah dianggap sebagai kakaknya sendiri. Rupanya Usman Basyah masih teringat kepada putri Kariman Binti dari Mesir. Ia menuju ke sana dan di tengah malam ia bertemu dengan Kariman Binti. Seorang syiah datang menikahkan mere-

ka. Raja Mesir tidak senang putrinya kawin dengan Usman Basyah. Melalui tiga orang utusan Usman Basyah meminta maaf kepada baginda. Tetapi baginda tidak mau memaafkannya malahan mengutuknya habis-habisan. Ketiga utusan yang sakti itu marah dan raja Mesir diikatnya dan dibawa ke hadapan Usman Basyah. Atas desakan putrinya akhirnya baginda merestui pernikahan mereka dan mengakui Usman Basyah sebagai menantunya seraya mengangkatnya pula sebagai sultan Mesir.

Tiada berapa lama kemudian Usman Basyah berpamitan dengan putri Kariman Binti karena akan kembali ke negeri Indra. Dalam perjalanan mengarungi rimba raya ia beristirahat di bawah sepoohon kayu. Di situ ia tertidur nyenyak. Seekor burung garuda yang melihat ada seorang manusia tertidur di bawah pohon menyambar dan membawanya ke atas puncak sebuah gunung. Ketika burung garuda hendak menelannya badan Usman Basyah tersangkut di kerongkongannya sehingga ia terbangun. Dengan menyebut nama ratu Syarwan seketika itu juga muncul seekor burak. Burung garuda dibunuhnya dan Usman Basyah dibawa ke negeri Hairan. Dalam perjalanan, Usman Basyah melihat dua orang raja yaitu raja Hindi dan raja Syairan sedang berperang memperebutkan seorang putri. Kedua orang raja itu dapat didamaikan dan putri yang sedang diperebutkan kawin dengan raja Hindi.

Usman Basyah sampai di negeri Hairan. Ia menyarankan agar ratu Syarwan sudi kawin dengan raja Jin Pari dari negeri Paya yang rakyatnya semua laki-laki. Saran itu diterima baik oleh kedua belah pihak dan pada waktu yang sudah ditentukan kawinlah ratu Syarwan dengan raja Jin Pari. Demikian pula semua rakyat raja Jin Pari kawin dengan seluruh rakyat ratu Syarwan.

Setahun lamanya Usman Basyah tinggal bersama ratu Syarwan. Kemudian Usman Basyah meneruskan perjalanannya ke negeri Kuta Karang. Di sana ia bertemu lagi dengan putri Syamsul Kamar. Sesuai dengan janjinya dahulu Usman Basyah dinikahkan dengan Syamsul Kamar. Sesudah beberapa lama ting-

gal di Kuta Karang, Usman Basyah mendapat izin dari Syamsul Kamar untuk pulang ke negeri Indra melihat anak isterinya yang sudah lama ditinggalkannya. Dengan mengendarai burak tak lama Usman Basyah sampai di negeri Indra dan disambut meriah oleh putri Meurak Asanah dengan kedua putranya bersama dengan keenam kakak iparnya. Tiada berapa lama kemudian, sesudah mendapat persetujuan dari semua pihak Hasyim diangkat menjadi raja negeri Indra.

Hasyim yang sangat taat menjalankan ajaran agamanya memerintah negeri dengan adil. Pendidikan sangat diperhatikan dan hukum dijalankan sebagaimana mestinya sehingga negeri menjadi aman dan makmur.

Adapun Usman Basyah pulang pergi mengunjungi kedua orang isterinya di Mesir dan Kuta Karang. Berbagai negeri dikunjunginya. Negeri Arab tempat orang tuanya tinggal dilupakannya.

**HIKAYAT
USMAN BASYAH**
II

I. PRANG NGON RAJA SAMIDAN

Beuribot Tapa jak lam rimba
Jak tueng raja ayah cut bintang
Teungoh-teungoh keumeung jak tueng
Troph le ureueng keunan datang

Ngon pahlawan useueng-useueng
Cokma peudeueng ban on pisang
Nyankeu adoe Haliman Syah
Rakyat barollah ka peunoh blang

Raja Samidan nan geuuroh
Pahlawan jroh tungang-tungang
Jideungo aduen dum gop peugah
Haliman Syah ka talo prang

Raja Samidan saket ate
Sang geuruge mata hitam
Jijak laju pantah sigra
Jak tueng bela deelat makam

Rajapi ka leupah u gle
Han saboh le ureueng dalam
Jideungo aduenjih ka talo
Nanggroe hanco abeh karam

Jijak laju beungehji that
Troph le leugat bak mideuen prang
Pahlawan le that mubalak
Na lhee cupak jara hitam

Jihei sare ngon jisurak
Sang meuhayak nanggroe karam
Troph u padang keunan jijak
Jipeurab bak kuta reuntang

Ka jikeumiet lingka kuta
Meugriet raya ureueng dalam
Jimeuhei ngon su raya raya
Ka jilingka kuta reunjang

Nyankeu adoe Haliman Syah
Tan soe peugah yoh raya prang
Kareuna sebab nanggroe jeuoh
Hana tom troh surat datang

Keupeue jeuet lom jinoe teuka
Poteu raja sudah hilang
Raja Samidan jak tueng bela
Rakyat jiba uleebalang

Taeu jidong dum meureuleueng
Useueng-useueng ceukang-ceukang
Ka jimeuhei Usman Basyah
Teubiet pantah keunoe rijang

Masa dilec kah that meugah
Jinoe sudah ngon kee hilang
Teubiet keunoe nyang beurani
Nak kuturi aneuk agam

He pahlawan ugoh-ugoh
Hana saboh le nyang tungang
Peue kaduek lom han kabeudoh
Jaroe bek soh kee ka datang

Teubiet bek trep kupreh nyoepat
Dilee kah that meugurantang
'oh lheueh katot nanggroe deelat
Kaplueng leugat le kariwang

Aneuk nanggroe dum kareubot
Abeh ka'uet dum sibarang
Balah kucoh dum areuta
Han meurasa meugoh kucang

Phon baroekon han soe linteueng
Meutan ureueng kah gurantang
Jinoe ngon kee kacuba ci
Nak kuturi aneuk agam

Beuribot Tapa seuot leugat
Bek meugriet that he binatang
Mubiek-biek kah kajak keunoe
Aneuk jaroeku han reunggang

Keupeue kahei raja kamoe
He eungkong bue asee musang
Buet nyang la lheueh kah jak sambat
Kaharab that droekeuh meunang

Di gop hana geupeumulia
Aneuk raja soe nyang datang
Ureueng mupake dum geupeujroh
Di kah kareuloh kapeujeuet prang

Han got akai rimueng bakoh
Akai teuboh dum binatang
Tuan Putroe Meurak Asanah
Deungon ayah roh meusugang

Ka teukeudi nibak Allah
Tapabanbah ka neumuprang
Aneuk ngon ku akhe jeuet got
Kah jak seutot kalet kacang

Raja kamoe Usman Basyah
Meurak Asanah judo bintang
Peue meugriet kah meunoe meudeh
Aneuk paleh akai kurang

Po Samidan lom beungeh that
Si Bulee Kabat lom ka datang
Maken beungeh nibak bunoe
Anek bisoe that gurantang

Teuma marit Beuribot Tapa
Ureueng tuha guree bak prang
Akai jroh that hana tara
Ngon suara that meulumbang

Hana rakyat balatantra
Sidroe saja neugrop u blang
'oh jikalon uleh rakyat
Jilumpat u teungoh padang

Jiek laju lom jikarat
Beungehji that dum pahlawan
Beuribot Tapa neusuet peudeueng
Neucang ureueng musoh datang

Tadeungo su miseue ribot
Abee jipot troh lam awan
Taeu reubah dum meugule
Le that mate ureueng datang

Miseue ie krueng darah ile
Hanyot bangke ureueng landang
Teuma beudoh si Bulee Kabat
Mata jagat kulet hitam

Saket ate beungehji that
Jieu rakyat le that karam
Jisuet peudeueng ka jitajo
Jilalo rot ulee kawan

Meurumpok ngon Beuribot Tapa
Jimeuhaba tanyong peue nan
Tadeungo lon he panglima
Peue nan gata cuba kheun ban

Jiseuot le Beuribot Tapa
Namiet Raja Cut Usman
Na kadeungo ka kupeugah
Kakheun di kahpi han jeuet han

Teuma seuot si Bulee Kabat
Namiet deelat Cut Samidan
Ka katuri nama kamoe
Peural^b keunoe he pahlawan

Cuba sigo theun peudeueng kee
Han tom dilee kakalon ban
Jisuet peudeueng pantah mupru
Mata hijo ulee dandan

Jitak laju keunong baho
Ban kulet tho duminan ceukang
Bek antara na meudarah
Ulee siwah hana leukang

Payahji that hana lagee
Baho singkee teusuet tulang
Si Bulee Kabat sang teumakot
Mukaji krot miseue musang

Jikeumeung plueng hana patot
Teumakot jipoh ke Juhan
Mubiek-biek nyan kucang sabé
Di akhe han troh tariwang

Han tateumeung woe u nanggroe
Abeh sinoc nyawong hilang
Raja Samidan that amarah
Peue kapeugah he binatang

Pakri kah dum raya utak
Tangkurak ube-be umpang
Pakon kaplueng han kameutak
Nyang hana hak buet han reumbang

Muka paleh buya seuba
Ngon kee raja kameuayang
Tuto paleh keunoe kaba
He ceulaka aneuk jalang

Padumna trep keunoe teuka
Jeh 'oh masa ka kumuprang
Han tom sigo nyang na padra
Siumu na kee dalam prang

Bek antara katueng kuta
'oh meusua kateureubang
Keupeue guna le panglima
Kah gop ceula hana reunggang

Nyoesa di kee kupulang guna
Di kah hana katem sayang
Peupeue guna dum panglima
Raya nama jroh ngon ruman

Kubri nanggroe dum bentara
Ngon areuta dum kupulang
Ngon wase krueng lom kuala
Laen teuma wase ladang

Aneuk peurumoh kubri ija
Lom kukira han tom reunggang
Ayeuem sanggoi gleueng suasa
Kujak mita kutheun utang

Bit nyoe paleh dum peutua
Dikeue mata uleebalang
Kepeue cit le kah meulaksa
Ureueng dua han ek kacang

Han meusoe-soe kubri nama
Biek aneuk da seuon idang
Ugoh-ugoh dum panglima
Tatiek lam paya umpeuen bubrang

Lon lam sabé jeuheut nama
Sebab hana katem meucang
Janggot mantong lhee-lhee deupa
Miseue raya ban ateueng blang

Raja Kumiran sinan teuduek
Nyankeu aneuk Raja Samidan
Rupapi jroh hana sakri
Ngon beurani that pahlawan

Ek jileukang gunong raya
Jigeulawa dalam awan
Jimeututo ngon ayahda
Jaroe dua jibet manyang

Ampon tuanku po meukuta
Lon aneukda gaseh sayang
Pakon neumarah dum peutua
Meusikada goh tamuprang

Meuka abeh neupumeureuka
Toh lom teuma ureueng muprang
Adat teukeudi teuka bala
Teubiet gata teuma u blang

Droe ham tatem gop peuhina
Pakri teuma rot meunang prang
Tatakot tinggai bungong seulanga
Lam ceumara putroe seudang

Teuka di gop ureueng tuha
Ngon bicara mantong meunang
Beuthat geueh dalam tika
Di lua na ureueng meucang

Nyeo neucarot di nap mata
Buet beulaga hana reumbang
Meuka abeh tapumeureuka
Pat taraja dalam kubang

Di gop nyang na geujuara
Nyoe di gata taruhe nang
Teuka di gop raja raja
Ngon beulanja lom geutumpang

Meunan di gop geukeurija
Kon ban gata tapeucrok cang
Nyansa rakyat meuseutia
Dum peutua uleebalang

Adat tabri sikrak ija
Han jikira nyawong hilang
Nyeo tacarot di keue mata
Buet beulaga sang binatang

Adat salah bube seuma
Tapeuraya na ube blang
Kadang aneuk ureueng tuha
Jibungka han le jiriwang

Beuthat tatueng ngon areuta
Han jikira tinggai gampong blang
Kadang-kadng jih ngon gata
Han jan tagisa jitop meusyang

Tageureuhem pura-pura
U muka bek sit tapandang
Nak teumakot si ceulaka
Bek biasa aneuk jalang

Meuka abeh dum jibungka
Pat taraja bak binatang
Keupeue kaya le areuta
Rakyat hana soe lom meucang

Rakyat abeh dum jibungka
Toh lom teuma ureueng meucang
Meunyo meunan takeurija
Simasa han le jiriwang

'oh meuteumeung jih ngon gata
Singoh lusa kadang kadang
'oh troh jiwoe singoh lusa
'oh tamaba jih kreueh ceukang

**Adat jijak sinoe sama
Troh u lua jieh lam drang
Han jan tangieng silap mata
Jiwoe lanja le jiriwang**

**'oh tatanyong tapareksa
Pakong ata tawoe rijang
Han meutroh 'oh pageue kuta
Tawoe lanja le tariwang**

**Hana patot meunan gata
Kamoe nyang na mantong di blang
Jiseuot le pantah sigra
Tuto gata jipeuayang**

**Pakri ulon aneuk dara
Bunoe hana soe jeuet meucang
Ulon dong siblah rot timu
Tuanku han deueh neupandang**

**Meunan bandum jipeuhaba
Rakyat raja uleebalang
Raja Samidan teuduek tahe
Bibi keundo lidah ceukang**

**Jideungo aneuk peugah haba
Di nap tantra uleebalang
Ceureudek that hana tara
Ngon suara that meulumbang**

**Banta Kumiran lom meuhaba
Ngon peutua panglima prang
He panglima deungon meuntroe
Intat kamoe siat u blang**

**Lheueh nibak nyan gata tawoe
Tinggai kamoe bahle gop cang
Bek jeuet malee dumna gata
'aeb nama uleebalang**

Nyangkeu ulon bek takira
Mubek gata jeuet keu lapang
Lon nyoe miseue dara baro
'oh troh linto seungap geundrang

Seungap rakyat han le a-o
Jak eu linto baro datang
Meunan meunan lon boh sageh
Taboh leubeh tawueuk kurang

Teuma seuot dum peutua
Bansineuna uleebalang
Ampon tuanku po meukuta
Barang sabda kamoe julang

Walee langet sret u donya
Ngon keupala kamoe tumpang
Meunyo mantong kamoe dumna
Nyang raja han lon bri u blang

Raja Ebrahim Beuribot Tapa
Ureueng dua jeuet kamoe cang
Usman Basyah dudoe tapoh
Cut putroe jroh tacok pulang

Neuneukawen le tuanku
Nyoekueu baro na sipadan
Bek deungan jih hana mut
Hana kawom aneuk dagan

Jinoe tuanku tabri surat
Tayue intat seugala alam
Tunong baroh timu barat
Ube neumat deelat makam

Nanggroe Silan Banta Sidi
Aneuk doli po Samidan
Nyanpi keubai hana sakri
Ngon beurani that pahlawan

Yoh masa nyan surat geubri
Tujoh hari sampoe datang
Tuan Putroe Kariman Bent
Judo doli Cut Samidan

Nyankeu ibu Banta Sidi
Neupeureugi bungka sajan
Rakyat le that hana sakri
Meuntroe wadi seukalian

Agam inong dum peureugi
Tujoh hari sampoe datang
'oh sare troh ubak teumpat
Peurab leugat bak sulotan

Cut Kamiran beudoh laju
Seumbah ibu baro datang
Putroe gusuek nibak ulee
Bungong keumbee aneuk badan

Lheueh meuteumeung deungon raja
Ate suka putroe intan
Teutap putroe lam meuligoe
Sajan lakoe Cut Samidan

Nyan haba nyan teuduek dilee
Lon peuteuntee raja alam
Nyoel lon peugah ayah putroe
Raja nanggroe jeuoh jalan

Haliman Syah ka dalam gle
Han neuwoe le baranggajan
Padum lawet teuma dudoe
Raja nanggroe keunan datang

Seubab meugah teuka adoe
Jeuoh nanggroe keunan datang
Nyankeu seubab raja neuwoe
Meugah adoe jak bantu prang

**Po Samidan meugah teuka
Ngon aneukda dua sajan
Seureuta ngon Kariman Benti
Banta Sidi ngon Kumiran**

**'oh troh raja u meuligoe
Mumat jaroe ngon Samidan
Deungon aneuk bandua droe
Raja nanggroe that sukaan**

**Raja marit teuma meunoe
Wahe adoe toh amilan
Meunyo Putroe Meurak Asanah
Ka gop reupah aneuk badan**

**Pakri jinoe nyang na leumah
Ek tagagah tatueng pulang
Kon meunalee ulon sidroe
Gata adoe jeuet keu lapang**

**Po Samidah teuma seuot
Ban nyang patot ulon julang
Ban nyang reumbang bak tuanku
Ban nyang napsu syahi alam**

**Meunyo meunan adoe teungku
Beudoh laju bek le lintang
Usman Basyah jinoe tapoh
Cut putroe jroh tacok pulang**

**Bek takeubahpi meusaboh
Bandum tapoh aneuk jalang
Dudoe teuma he adekda
Lon ngon gata tamubisan**

**Meunyo putroe puteh licen
Tapeukawen ngon Kumiran
Bak lon adoe hana laen
Lahe baten hana wajang**

Meunyo meunan wahe deelat
Peugot surat peuek rijang
Usman Basyah tayue teubiet
Bek ngon namiet 'aeb lapang

Siblah raja siblah bala
Miseue nyang ka buet han reumbang
Geutanyoepi takeulua
Bah tacuba sigo meucang

Yoh nyan raja surat geujok
Siat le trok sampie datang
'oh troh surat dalam jaroe
Neubeuet keudroe banta seudang

Di nap rakyat dum sinaroe
Wadi meuntroe panglima prang
Neupeugah bak Beuribot Tapa
He panglima toh nyang reumbang

Haliman Syah ka neugisa
Ngon adekda jehpat di blang
Neuyue teubiet dum geutanyoe
Bak uroe nyoe bek le lintang

Meunyo trep that han ek geupreh
Keunoe jadeh kuta geuprang
Pahlawan le kureueng leubeh
Lhee kai bijeh jara hitam

Teuma rakyat han ek peugah
Subhanallah peunoh padang
Mee geutanyoe tameulangkah
Doli khalifah ka neuriwang

Beuribot Tapa seuot leugat
Nyan nyang mangat bak lon reumbang
Ampon tuanku doli halarat
Ban nyang hajat ulon julang

Teuduek dilee 'oh nan siat
Riwayat jinoe neuriwang
Haliman Syah leumah pike
Sang han ase lom talo prang

Cut Usman ureueng meutuah
Waliyullah pangkat manyang
Baranggasoe han ek gagah
Pahlawan gagah tungang tungang

Bahle jinoe lon kuboh droe
Nibak dudoe jeuet keu lapang
Dumjih muprang ka lon tu'oh
Dua beungoh jiteureubang

Dum rakyat kee tamse naleueng
Useueng useueng lom pahlawan
Ek cit keumah jitueng kuta
Dum panglima jiteurajang

Dum asee nyoe rakyat lhee droe
Geujak keunoe mita wayang
Han jan siat abeh lari
Maken keuji jeuep-jeuep alam

Hana laba kudong sinoe
Leugat rugoe 'oh kupandang
Meunan pike Haliman Syah
Neukheun pantah bak Samidan

Wahe adek bungong uroe
He samlakoe ulon riwang
Bahle lon woe ubak nyang ka
Dalam rimba gunong hitan

Sang han kujeuet le ngieng mata
Ngon aneukda Meurak intan
Jinoe adek hukom gata
Meuligoe kuta gampong ngon blang

Di lon han le kukeurajeuen
Bah lam uteuen rimba Tuhan
Nyanpat kuta deungon mideuen
Takeurajeuen dum sibarang

Po Samidan mangat ate
Jisambot le rijang rijang
Teuma raja neujak u gle
Keurajeuen han le ka neubuang

Abeh geubri dum keu adoe
Meuligoe deungon beurandang
Po Samidan suroh rakyat
Teubiet leugat keudeh u blang

Kumiran ngon Banta Sidi
Hana sakri cubeueh tungang
Teuma jikheun ubak rakyat
Lon taintat siat u blang

Lheueh takeubah woe di gata
Kamoe dua bahle gop cang
Rakyat deungo meunan haba
Han peue kira that guransang

Jibeudoh le dum peutua
Ikat dada deungon pinggang
Nyak Kumiran Banta Sidi
Aneuk doli po Samidan

Jinoe teubiet droe raja ahli
Dum sipai ireng sajan
Rakyat teubiet han ek kira
Le that fana nyawong karam

Banta Sidi kandran r imueng
Kureng di rueng jroh meureuntang
Si Kumiran atueuh gajah
Jicok langkah teubiet u blang

Jitet sigo beude nubat
Tanda beurangkat uleebalang
Meusu canang deungon tambo
Rakyat a-o dum guransang

Geujak laju hana pioh
Hingga troh bak teumpat padang
Rakyat jidong jroh meureuleueng
Hana peue kheun tamse jeundrang

Sidehpi ka geucok langkah
Usman Basyah ka troh datang
Teudong sina blah rot barat
Banja teupat jroh meureuntang

Nyang dong di keue po cut banta
Beuribot Tapa panglima prang
Dong di uneun Raja Pari
Siblah kiri Syam Nadiman

Raja Mahkot dong di likot
Apet po cut banta seudang
Limong ploh droe aneuk raja
Jidong lingka Cut Usman

Pahlawan dum teuga teuga
Ka jimeukha di teungoh blang
Jibeudoh le seun-seun saboh
Jimupoh-poh meutang-ilang

Beudoh rotnoe keujruen puteh
Beudoh rotdeh keujruen hitam
Rakyat teudong dum meuseupeh
Rotnoe rotdeh tarek alam

Ureueng patot dum mupayong
Uroe tutong reuoh peusam
Nyang rot timu Geusyik Ubat
Dong rot barat Geusyik Agam

**Bandua droe ceureudek that
Jaroe teupat dum geutuang
Beudoh rot tunong Teuku Basoh
Beudoh rot baroh Teungku Salam**

**Peulheueh beude seun silapeh
Miseue bareh tadeungo kram
Rakyat reubah dum teueh-eh
Meutindeh sang tungoe ladang**

**Bumoe mirah langet seupot
Asap jipot sang ka malam
Rakyat muprang kalang-kabot
Le that mawot musoh datang**

**'oh meuteumeung dua pihak
Deumpek surak tadeungo kiam
Peulheueh busu leumbeng kapak
Jilantak ngon boh meuriam**

**Sret lam kawan boh beureutoh
Rakyat awoh peungeuh lapang
Sang geulanteue hana teudoh
Nyum ka runtoh bumoe karam**

**Lheueh di tunong ngon di baroh
Miseue guroh geumpa alam
Binatang gle abeh kiroh
Badan awoh tinggai sarang**

**Rakyat meutak kalang-kalot
Abee jipot sang ka malam
Hana leumah nap ngon likot
Sang teumakot jamee datang**

**Lawan rakan han meuri le
Udep mate han soe pandang
Banta Sidi beudoh yoh nyan
Tanyong Usman rijang rijang**

**Ho saleh ka Usman Basyah
Meurak Asanah ka jitawan
Tajo rijang siat keunoe
Peudeueng kamoe heundak makan**

**Peudeueng gohlom jipajoh bu
Dalem teungku bek trep datang
Cut Usman teuma seuot
Jroh mupatot tuto kalam**

**Pakon meunan he adek e
Haba tuto sang binatang
Pat saleh roe Banta Sidi
Han lon turi toh pakri ban**

**Cuba peurab keunoe laju
Lon keumeung eu nibak ruman
Long meung kalon deungon rupa
Cuba tampa deungon tangan**

**Kreueh that gigoe deungon jungka
Buet kakanda nak jituban
Teuma tajo Banta Sidi
Hana sakri that pahlawan**

**Peudeueng jimat kanan kiri
Kreh ngon bari lhat di pinggang
Cut Usman lom meututo
He adek e uleebalang**

**Cuba keunoe siat tajo
Lon thee beuhe gata tungang
Teutapi sayang lon han bagoe
Gata adoe teungoh malang**

**Peue buet tajak gata keunoe
Nyang got jak woe bek le wayang
Gata adek umu muda
Sayang raya lon cut abang**

Nyang got adoe jak tagisa
Yoh goh cidra bek meuayang
Lon he adek ulon peugah
Yoh goh reubah bukon sayang

Banta Sidi that amarah
Jigrop pantah le meulayang
Jisuet peudeueng sarong meuklah
Bak wie siwah mat jipeugang

Jitap jitop hana keunong
Payah mantong aneuk jalang
Cut Usman khem teusinyom
Taeu bangon pakri macam

Teuma neukheun haba meunoe
Wahe adoe bek meuayang
Pakon adek han taingat
Peue meugriet that bak geudubang

Meunyo meunan tamat peudeueng
Han meuteumeung musoh tacang
Gohlom utoh gata adoe
Tameurunoe bak cut abang

Tatheun jinoe gata adoe
Eu buet jaroe teungku abang
Neusuet peudeueng ulee patong
Neutak rancong putoh meukhan

Bak teudong hana meuisseuk
Meuube meuk payahneu tan
Banta Sidi meuseuk-meuseuk
Badan paneuk jeuet dua khan

Sinan teueh atueh bumoe
Beungeh le nyoe Raja Kumiran
Jieu adoejih ka mate
Jibeudoh le beungeh han ban

**Jitajo le sigo meuhee
Lhee ribee dum pahlawan
Rakyat le that dum on kayee
Le that sukee po Samidan**

**Cokma beusoe ube bak u
Peudeueng busu peukakah prang
Trok le sigo ban lhee ribee
Beungeh lagee rimueng agam**

**Ka jibeudoh Beuribot Tapa
Nyoekue nyang ka prang meutunang
Cokma beusoe ube raya
Jilila jitimang-timang**

**Jikloh tanoh ube lhee krong
Jilambong jisrom lam awan
Sret le tanoh ateueh rakyat
Han tatupat nyawong hilang**

**Lom jibeudoh Sulotan Jali
Jinari jihayak badan
Galakji that hana sakri
Sipai bandum pahlawan**

**Jibet kayee ladom bak u
Jisrom laju dalam kawan
Rakyat reubah dum teududu
Miseue laku waba simpan**

**Beurahi. Bapa teuma seuot
Nyanpi saboh ulee kawan
Dum sipai ugoh ugoh
Janggot ka roh mirah sikhan**

**Lom jibeudoh Raja Pari
Dum sipai biek edeurang
Jimat peudeueng kanan kiri
Hana sakri bak jimeucang**

Jipoh rakyat dum jitadi
Na lhee bagi nyang ka simpan
Raja limong ploh beudoh di likot
Ureueng patot jinoe muprang

Jiek sabe miseue ribot
Padang seupot sang ka malam
Lheueh busu bleuet tantra pari
Tadeungo 'a-'i jipo manyang

Raya that prang hana sakri
Sang meusundi bumoe leukang
Jipoh rakyat dum jitadi
Raja Pari that analan

Rab ka abeh siblah pihak
Deumpek surak leungo alam
Si Geumpa Alam teuma beudoh
Di jih saboh jiboh ragam

Han ek duek le punggong keuboh
Ka jibeudoh datok rumpang
Jikalon prang kalang-kalot
Padang seupot rakyat hitam

Ateueh musoh jipeulikot
Jitoh geuntot ban meuriam
Rakyat deungo dum teukeujot
Ka meusurot peungeuh padang

Si Geumpa Alam ka jigrop-grop
Leugap-leugup leungo alam
'oh takalon that teumakot
Sang ka lupot nyawong karam

Kayee raya taeu jilet
Gunong jibet batee hitam
Teuma jisrom ateueh musoh
Rakyat awoh ka soh padang

Le that mate han ek peugah
Ile darah jeuet beurawang
Tujohe uroe prang meuhayak
Jimeutak-tak kawom edeurang

Jiek laju prang jipeusak
Lam uroe phak meutang-ilang
Dumna rakyat abeh undo
U likot laju jiriwang

Si Kumiran that amarah
Muka juah taeu hitam
'oh jikalon rakyat talo
Jitajo miseue boh sungkam

Jimat peudeueng ujung meutoto
Bak baho cokma jigulam
Meuteumeung ngon raja limong ploh
Tadeungo kiroh jimeuhantam

Sinoe jipoh sideh jitak
Prang meuhayak lom meutunang
Ka neubeudoh po cut banta
Sebab raja ka troh datang

Jimarit le sigra sigra
Ureueng dua ka mupandang
Ho tameung jak he syeedara
Peue tamita peugah rijang

Peue na napsu cuba peugah
Meuna mudah lon peujampang
Si Kumiran seuot pantah
Meurak Asanah tabri pulang

Meunyo tatem pulang jinoe
Uroe dudoe bek jeuet masam,
'oh meuteumeung dua geutanyoe
Mumat jaroe di rot di blang

Cut Usman seuot meunoe
Tadeungo kamoe adek badan
Keupeue talakee judo kamoe
Laen putroe meupat nyang tan

Meunyo napsu bungong mirah
Deungo lon peugah haba nyang trang
Meunan hajat tuan putroe
Lon bri gantoe nyang analan

Momjih tujoh dua banja
Jroh that rupa sang buleuen trang
Nyankeu lon bri he adekda
Cok keu gata putroe intan

Rupa jroh that hanpeue peugah
Kacok keu kah jakleh riwang
Nyan he adoe cut abang bri
Jak keumbali gata sayang

Ban jideungo haba meunan
Tajo yoh nyan si Kumiran
Jitak laju atueuh banta
Hana luka kulet badan

Cut Usman peudeueng neugrak
Bak tangkurak neupeusimban
'oh ban keunong bak tangkurak
Peudeueng jijak leupah badan

Putoh takue deungan badan
Reubah sinan nyawong hilang
Si Kumiran ka dua droe
Tajo nyoe Raja Samidan

Jisuet peudeueng sarong meuklah
Jibalah atueuh cut intan
Nyanpi tulong nibak Allah
Hana leupah atueuh badan

Jitajo le Beuribot Tapa
Jimat bak pha le jikuran
Kakeu mate sinan banlhee droe
Raja nanggroe nyawong simpan

Banta Sidi umu abeh
Buet cut puteh Teungku Seuman
Rakyat laen bandum jiplueng
Dalam uteuen dum teureuban

Raja mate prang ka talo
Pahlawan le jiteurajang
Nyang tan mate jiplueng lanja
Dalam rimba dum jibeukam

Beuribot Tapa Raja Pari
Deungon doli Cut Usman
Manton sinan dalam padang
Deungon Juhan duek di sinan

Rakyat musoh tan le di blang
Abeh peujam plueng lam rimba
Cut Usman marit rijang
Jak tariwang dalam kuta

Ban jideungo sabda meunan
Bandum riwang po bentara
Cut Usmanpi neuriwang
Meusajan deungon lasyeuka

Jipeh tambo deungon geundrang
Rakyat riwang maseng jeumba
Troph lam kuta jipioh droe
Malam uroe le ho seunja

Teutap sinan Cut Usman
Deungon rakan pari diwa
Rakyat lari nyang talo prang
Nyang riwang bak nanggroe raja

**Troh lam kuta leugat jiwoe
Ubak putroe jipeuhaba
Ampor po cut bungong uroe
Raja nanggroe tingai donya**

**Deungon aneukneu ban lhee droe
Samlakoe deungon ayahda
Dalam padang rab ngon tasek
Prang that tarek reuloh donya**

**Nyang lawan prang Usman Basyah
That jigagah atueuh raja
Sinan mate raja nanggroe
Ban lhee droe deungon aneukda**

**Ban putroe deungo haba meunan
Putroe yoh nyan limpah dada
Ka jipoh droe putroe intan
Dum dendayang jimoe rugha**

**Tadeungo kiroh lam meuligoe
Jipoh-poh droe tuha muda
Putrie poh droe hana lagee
Antok ulee keumong muka**

**Jiantok droe bak-bak guci
Keumong bibi buta mata
Allah he aneuk bukon sayang
Tamse subang reuloh mata**

**Teungoh galak mateu pandang
Ka leukang sang broh lam mata
Allah he aneuk muda samlakoe
Saleh ho nanggroe ma di gata**

**Bukon sayang bungong meulu
Sret meutabu dalam tika
'oh lon ingat ate ragu
Talo ngon du meusigo tiga**

Bukon sayang bungong geutoe
Tarek uroe layee rata
'oh lon ingat he samlakoe
Mateu putroe pungo gila

Saleh ho troh mateu putroe
Po samlakoe dilee bungka
Bukon sayang lo eu sipot
Di bineh laot dum mubanja

Hana soe le lon idang surot
Beungoh seupot miseue nyang ka
Bukon sayang bungong asan
Sret meurumpan dalam tika

Allah he aneuk uleebalang
Ho troh jalan ma di gata
Kepeue kuta ngon meuligoe
Han le asoe payong donya

Bukon sayang lon eu pade
Troh angen gle ka meutimpa
Allah he aneuk tangke ate
Jinoe pakri ma di gata

Keupeue lom blang deumgon gampong
Keupeue geudong deungan kuta
Meuka tan le bungong tanjung
Bah mate lon sajan gata

Allah he aneuk bukon rugoe
Bandua droe gata bungka
Ie di laot puteh hijo
Peukan baro keude Cunda

Keupeue tika deungan kaso
Linto baro 'oh tan gata
Bungong jeumpa mirah-mirah
Sret siulah lam ie raya

Wahe aneuk nyak meutuah
Saleh pakri bah 'oh tan gata
Bukon sayang lon eu bayam
Jroh meurumpan dalam rimba

Wahe aneuk uleebalang
That lon sayang 'oh tan gata
Jinoe ngon soe lon meututo
Tinggai judoe dalam tika

Kadang-kadang lon meulumpoe
Soe lon peugoe peugah rahsia
Allah Allah he Po talah
Jinoe leupah ho langkah ba

Meuhad kugrop dalam laot
Bahle eungkot meukeurija
Meuka tan le cut bintang sret
Keupeue po cut 'oh tan gata

Bukon sayang bak rangkileh
Bohpi abeh kameng seuba
Allah he teungku nyang lon gaseh
Ngon soe lon eh tan le gata

Meuhad kutop teuntang ate
Bahle mate putroe muda
Meuhan meunan lon jak lam gle
Bah meugule rimueng seuba

Bukon sayang cicein murong
Jeuep-jeuep gampong jak mumita
Reuloh ate lon ngon jantong
Bungong jantong 'oh tan gata

Bukon sayang mirahpati
Ulee-ili jih di para
Gata mate ngon teukeudi
Saleh pakri ma di gata

Bukon sayang lon eu rumoh
Abeh reuloh tinggai rungka
Wahe aneuk banta cut jroh
Gata gadoh lam pangkee ma

Teungoh galak mateu pandang
Ka jilop sang broh lam mata
Wahe aneuk bungong keumang
Soe peutimang ma ka tuha

Jinoe han soe le peurintah
Bungong mirah gata bungka
Haba bae han ek peugah
Meule kisah jeuet keu wayang

Mate Raja Samidan Syah
Putroe indah ka meulang-lang
Jinoe han soe le peurintah
Abeh kisah po Samidan

Deungo jinoe ulon peugah
Cut Basyah ngon Meurak intan
Deungon aneuk Hasyem Pari
Woe keumbali ubak makam

Sajan meuntroe deungon wadi
Dum sipai ireng sajan
Meurak Asanah boh lam usong
Buka payong tarek alam

'oh sare troh bineh gampong
Geupalee gong tet meuriat
Tantra pari dong meuato
Bak baho bandum seunapang

Sang geuarak linto baro
Geupleh tambo palee geundrang
Aneuk rawa jimeutangkeh
Rotnoe rotdeh jimeutop cang

Cokma peudeueng tumbak ngon kreh
Meutindeh taeu meureuntang
Aneuk mambang meuen ganja
Meugisa-gisa muwoe ulang

Peurasan le han ek kira
Le that rupa macam-macam
Tuan putroe di meuligoe
Cutda nam droe Meurak intan

Nyang keutujoh Kariman Benti
Banun Sahri jadi lapan
Syahri Banun umi putroe
Laen sinaroe han le urang

Sosah sangat hana bagoe
Jitakot woe Meurak intan
Jipoh mate dum geutanyoe
Bela lakoe aneuk sajan

Daraman Ali teuma peugah
Tapabanbah kheundak Tuhan
Dilee kukheun han kapateh
Bandum paleh that bantahan

Nyang tuto kee kapeujaeh
Meunoe meudeh kagurantang
Daraman Ali lon kheun meunoe
Deungo kamoe adek badan

Udeh tajak dum geutanyoe
Ubak Putroe Meurak intan
Tapeujok droe keu cut indah
Darah gapah nyawong badan

Beuthat jiboh u cong sula
Beuta rela baranggajan
Keumah pakat dum syeedara
Beudoh lanja teubiet u blang

Jijak laju ubak putroe
Ban sinaroe dum beurjalan
'oh sare troh ubak putroe
Salah kamoe bak cut intan

Patot puntong gaki jaroe
Bandum kamoe beursalah
Nyawong tuboh darah gapah
Batang karah milek Tuhan

Gata bandum lon peuseurah
Lon ijadah seukalian
Taniet kamoe hamba tabloe
Ban sinaroe dum teubosan

Jampang-jampang na buet jaroe
Bek payah droe wahe intan
Tagantung manyang taboh jeuoh
He po cut beh cahya bintang

Ho nyang hajat kamoe taboh
Bak ateueng putoh sambat jalan
Teuma seuot Meurak Asanah
Ampon meu'ah bak lon tuan

Bak lon cutda hana salah
Tan bube drah beurdawaan
Buet nyang ka lheueh bek le teulah
Tapabanbah janji Tuhan

Meu'ah bak lon he syeedara
Gata cutda seukalian
Hana patot lon peuhamba
Teumeureuka lon bak Tuhan

Buet nyang ka lheueh han lon ingat
Nyang lon minat keubaekan
Meurak Asanah ate saleh
Hana ku'eh deungki deundam

Cutda deungo meunan tuto
Jitajo lom bak putroe intan
Mumat jaroe meu'ah deesya
Adoe ngon a seukalian

Jicok adek ka jipuwoe
Cutda nam droe that sukaan
Ka jipeuek u istana
Bansineuna ireng sajan

Jigaseh that dum keu adoe
Cutda nam droe ate rawan
Putroe Meurak han jeuet teupeh
Gaseh leubeh keu cut intan

Jroh jikhadam Putroe Meurak
Han tom jarak bandum sajan
Teuduek dilee 'oh nan haba
Lon peugisa bak mulaan

Lheueh talo prang rakyat bicah
Usman Basyah ka troh datang
Sajan aneuk banta indah
Dum kafilah uleebalang

Abeh tamong rakyat dumna
Banseumua jamee datang
'oh meusapat bandum abeh
Siploh naleh jara hitam

Dum pahlawan meuceh-meuceh
Nyang teupileh Raja Juhan
Cut Usman neupioh droe
Samlakoe bak bale intan

Ureueng gampong dum neuyue woe
Suroh sidroe jak lam uteuen
Rakyat jitren dum sinaroe
Waki meuntroe tandi bujang

Ka jipeurab bak samlakoe
Jibet jaroe le meulayang
Ampon tuanku payong nanggroe
Dumna kamoe ka meuriwang

Patot puntong gaki jaroe
Salah kamoe he jeunulang
Cut Usman seuot pantah
Ampon meu'ah dum sibarang

Nibak ulon hana salah
Alhamdulillah nekmat datang
'oh lheueh ampon dum kafilah
Usman Basyah lom meukalam

Yoh nyan rakyat lom neuyue woe
Bak teumpat droe maseng pulang
Rumoh tutong neuyue peugot
Neuyue seutot dumna tokang

Areuta gaduh dum neugantoe
Hana rugoe meusigupang
Ganceng azimat sawek jaroe
Ikai meuduroe gleueng meusubang

Abeh bandum ka neugantoe
Tan rugoe meuija pinggang
Meunan meunan dum sinaroe
Ureueng nanggroe ate bimbang

Abeh jiwoe dumna rakyat
Nanggroe jroh that rame urang
Teuduek dilee 'oh nan siat
Lon riwayat laen lagi

II. USMAN BASYAH JEUET KEU RAJA NANGGROE INDRA

**Seureuta lon balek ayat
Bek le ban sot hana meukri
Nyoe lon seubot banta indah
Usman Basyah raja 'ali**

**Lagipi lom ngon keuramat
Raya meurtabat pangkat tinggi
Nyankeu raja nyang meutuah
Waliyullah lom ngon sufi**

**Mupakat dum ureueng nanggroe
Geuboh gantoe lakoe cutti
Geuboh badai Haliman Syah
Usman Basyah nyang that 'ali**

**Ureueng nanggroe mangat ate
Hukom ade hana sakri
Padum lawet teutap sinan
Bak nanggroe nyan neubeureungi**

**Deungon judo Meurak Asanah
Ate dasyah malam hari
Seureuta aneuk bandua droe
Nama geuheui Hasyem Pari**

**Aneuk tulet ayah boh nan
Cut Budiman sang-sang hari
Bandua droe rancak babah
Hätam lidah miscue abi**

**Padum lawet teuma dudoe
Teupike nyoe raja neugri
Cut Usman kheun bak putroe
He sambinoe jinoe pakri**

Poteu raja han le neuwoe
Ho-ho nanggroe saleh lari
Bak peunyum lon leupah u gle
Han neuwoe le seukali-kali

Saleh udep saleh mate
Pakri pike wahe cutti
Meurak Asanah teuma seuot
Ban nyang patot nibak doli

Baranggakri ulon ikot
Lon turot hana meuungki
Meunyo meunan bungong geutoe
Ureueng nanggroe jinoe tabri

Neumeuheu le Beuribot Tapa
He panglima deungo lon kheun kri
Tajak siat jinoe gata
Jak tueng raja ayah cutti

Ka neuboh droe dalam rimba
Beudoh sigra bek trep lanti
Bak peunyum lon han le neuwoe
Bak geutanyoe sang han meukri

Taba sajan ureueng nanggroe
Padum ploh droe nyang beurani
'oh meuteumeung tabet jaroe
Saleuem kamoe tapeugah kri

Sajan tame surat saboh
Meunan nyang jroh dilee taci
Samlakoe cut peugot surat
Aneuk deelat Hasyem Pari

Tutopi jroh dalam surat
Deungon mangat hana sakri
Meunoe haba dalam surat
Deungo sahbat dum barangri

**Ampon tuanku meuribee katoe
Ulonceu nyoe hamba faki
Jeuoh gampong deungon nanggroe
Lon peuto jak junjung doli**

**Meuhan tuanku jinoe neuwoe
Bah lon boh droe laen neugri
Seureuta aneuk tuan putroe
Ngon cuco droe Hasyem Pari**

**Cut Budiman cuco tulet
Nyanpi patot meutan doli
Meuhan tuanku jinoe neuwoe
Akhe dudoe meuhad rugi**

**Meureutoh laot lon jeumeurang
Meureutoh blang ka lon mari
Hajat ulon keunoe datang
Bak jeunulang jak com gaki**

**Abeh gunong abeh hutan
Bak jeunulang payong neugri
Lon cre gampong lon boh nanggroe
Hajat lon nyoe ubak doli**

**Neumeuniet lon hamba neubloe
Badai nanggroe payong hari
Kareuna lon ureueng ubit
Lagi gareb lom ngon faki**

**Meuhan tuanku jinoe neuwoe
Teulah dudoe apon jari
Ka limong thon lon jak keunoe
Tuanku droe goh lon turi**

**Saleuem nibak Meurak Asanah
Lakee meu'ah ubak abi
Buet nyang ka lheueh bek le teulah
Beubai silap ngon teukeudi**

**Wahe ayah payong nanggroe
Siat neuwoe keunoe mari
Meuhan neuwoe bak siseun nyoc
Ulon sinoe ka troh janji**

**Bahle mate bah kutop droe
Bah jeuet nanggroe gop peugah kri
Meunan haba dalam surat
Tuto jroh that tan meuungki**

**Lheueh neusurat teuma neulipat
Neujok leugat ubak wadi
Beuribot Tapa beudoh leugat
Sajan rakyat dum peureugi**

**Padum lawet jak lam uteuen
Jeuep pucok krueng ulee-ili
Abeh alue dum ka jiblo
Jeuep-jeuep paloh gunong tinggi**

**Geujak laju hana pioh
Mita sunggoh raja neugri
Hingga troh bak saboh teumpat
Alue lhok that hana sakri**

**Teuma jitren dumna rakyat
Mita bakat ureueng lari
Nyankeu teumpat raja alam
Bukon sayang raja neugri**

**Ban neukalon ureueng datang
Beudoh rijang plueng neulari
Rakyat seutot jilet laju
Pakon tuanku plueng peureugi**

**Kamoe meujak tueng tuanku
Suroh teuku judo cutti
Tan neudeungo neuplueng leugat
Teumakot that raja neugri**

Han le akai raja deelat
Sret seumangat hilang budi
Seubab ureueng neueu le that
Gadoh ingat teumakot gli

Neuplueng leugat lam-lam duroe
Luka asoe teupeh gaki
Bukon sayang raja deelat
Akai sisat ngon teukeudi

Rakyat sosah hana bagoe
Pakri jinoe tadrop doli
Meuhan meuteumeung han jeuet tawoe
Payah dudoe lom keumari

Teuma marit Beuribot Tapa
He syeedara deungo lon kheun kri
Taboh jareng miseue rusa
Tadong lingka dum meuriti

Meukon meunan han seumporna
Hana guna baranggakri
Neupeugah le ubak pawang
Meunan reumbang wahe akhi

Jibeudoh le rijang rijang
Pak jireuntang dum taloe gle
Jihei sare jidong lingka
Poteu raja leugat lari

Ka roh lam pak meucuet sigra
Neuhila han leupah gaki
Troh le ureueng keunan teuka
Banseumua jak kalon hi

Bak jikalon poteu raja
Ro ie mata meuntroe wadi
Jieu badan kulet gasa
Hitam sukla sang bee hanyi

Haliman Syah reubah pangsan
Han tatuban hilang budi
'oh meusapat bandum keunan
Lam usongan peuduek doli

Puwoe laju troh u gampong
Deelat payong raja neugri
Teuma jijok bak Cut Usman
Meuntroe yoh nyan le peugah kri

Ampon tuanku meuribee ampon
Payah that lon hana sakri
Payahpi that meudrop deelat
Pak taloe jrat dum meuriti

Neuplueng pantah miseue kilat
Gadoh bakat han meuho le
Ban putroe eu poteu raja
Ro ie mata cut putroe ti

Neueu bangon laen rupa
Kon ban nyang ka neukalon hi
Wahe ayah pakon meunoe
Peue sebab nyoe gata rudi

Poteu raja seungap iem droe
Hana sapeue jaweueb neubri
Mata seupot geulunyueng tuloe
Aneukneu putroe han neuturi

Meurak Asanah yoh nyan bae
Ie mata ro meuteutali
Jieu ayah tahe gante
Bungong kundo ka jigule

Cut Usman yoh nyan peugah
Bek gundah he bungong diri
Ka teukeudi nibak Tuhan
Pakri tapaban wahe nyak ti

**Neubeudoh le pantah leugat
Bak deelat laju neupeutoe
Abeh neueu ka neulihat
Bacut sapat teupeh asoe**

**Pajoh ranup siseun mirah
Neucok seupah gusuek bak dhoe
Teuma neukheun ngon bismillah
Ngon fatihah neubeuet dudoe**

**'oh lheueh neukheun alhamdulillah
Kulhu Allah le neupujoe
Neubeuet saboh isem keuramat
Abeh neumat neupruh asoe**

**Peunyaket gadoh han le meukeumat
Ngon keuramat isem jalaloe
Poteu raja muwoe ingat
Beudoh leugat duek teupipoe**

**Ban teukeujot bak beuradu
Miseue laku ureueng meulumpoe
Seubab sosah ate tunu
Deelat tuanku mabok keudroe**

**Ban teuingat neubeudoh laju
Leumah neueu tuan putroe
Ban neukalon Meurak Asanah
Usman Basyah di sinan toe**

**Putroe tajo seumbah ayah
Ie mata limpah meuteutaloe
Raja sambot pantah-pantah
Bu meutuah he aneuk droe**

**Cut Usman com di teuot
Raja sambot meulintee droe
Tajo cuco keunan dua
Neucom neuwa raja nanggroe**

Bu meutuah he bintang sret
Aneuk tulet ka troh tawoe
Wahe cuco Hasyem Pari
Deungon abi Meurak putroe

Lon he aneuk sangkot pawot
Silap lupot jeuet keu rugoe
Bu meutuah puteh lumat
Ulon ingat geunap uroe

Bu phet kulet asoe mangat
Beu seulamat dua nanggroe
Bu meutuag Cut Usman
Banpeuet sajan deungon putroe

Deungo aneuk ulon kheun ban
He intan keumala nanggroe
Raja neukheun pantah-pantah
Deungo lon peugah he samlakoe

Tameuniet lon he meuh mirah
Hambateu sah ban lheueh tabloe
Nyawong tuboh darah gapah
Milek Allah dum sinaroe

Bak gata pon lon ijadah
Neupeumurah bak jeuep-jeuep syoe
Ngon mukjizat Nabi Muhammad
Ngon keuramat dum eelia

Jinoe aneuk lon bri ingat
Pulang amanat dum bak gata
Nyanpat kuta ngon meuligoe
Lon peujaroe ubak gata

Blang ngon gampong dum sinaroe
Aneuk nanggroe hukom gata
Tameuniet lon he samlakoe
Hamba tabloe lheueh meurdeka

Abeh wasiet raja nanggroe
Pangge meuntroe ngon bentara
Hoka tandi waki bujang
Kajak rijang meuseuranta

Kayue teuka dum sibarang
Uleebalang ngon panglima
Bujang mudek baroh tunong
Jipeh mongmong subra donya

Rakyat jitren han peue tanyong
Agam inong woe lam rimba
Uleebalang ngon pahlawan
Abeh keunan troh bak raja

Abeh jitren seukalian
Tamong yoh nyan dalam kuta
Tujoh uroe jitren sabé
Sang han lot le mideuen raja

Puteu raja neupeugah le
Tadeungo he dum bentara
Nyang jeuet gata dum lon pangge
Kaoi janji lon meunada

Hajat ulon meukhanduri
Alem faki yue meudo'a
Cut Usman ulon rasi
Lakoe cutti gantoe raja

Lon ka tuha hana le asi
Rab ka mate ajai teuka
Lom neupeugah bak samlakoe
Judo Putroe Meurak muda

He aneuk raja dungsiong lon kheun proe
Gata gantoe lon ka tuha
Tameuniet lon lheueh tateuboh
Soe me bungkoh ranup gata

Meunan jinoe he aneuk beh
Lon peugah troh bijeh mata
Adat gop poh di rot di blang
Na soe sayang meuna gata

Mubek aneuk tatumpoh cang
Jampang-jampang jan tamaba
Poteu raja yoh nyan pulang
Dum sibarang balatantra

Abeh neujok alat keurajeuen
Kreh ngon peudeueng pulang keu gata
Rumoh meuligoe kuta ngon mideuen
Dum reuen-mareuen alat raja

Kulah kama meuh kawoh intan
Peutoe keulandan geudong meutia
Bungong sunteng alat pakaian
Teumpat singgahan keurusi tahta

Sikin sarong ulee intan
Bungkoh sajan bate ceureupa
Abeh neujok seukalian
Raja yoh nyan lom meusabda

Hoka gata uleebalang
Di lua di blang bansineuna
Jinoe Raja Cut Usman
Ikot bek han dumna gata

Poteu raja phon hei ampon
Nyang awai phon mula-mula
Teuma rakyat seugala don
Ato turon ban nyang kada

Lheueh geutabai Cut Usman
Raja yoh nyan lom meusabda
Tadeungo he keujruen meuntroe
Bansinaroe tuha muda

Silapeh treuk goh seuleusoe
Gohлом sampoe kaoi nada
Meurak Asanah lon peukawen
Mayoh meusyen meukeurija

Lon peugah lom lahe baten
Kon peue laen lon meunada
Bak donya nyoe bek le jeuheut
Tan mubacut beuet keurija

Ka lon peugah nyan ube buet
Tadong santeut dumna gata
Ulon siblah sidroepi jeuet
Nyang meukeusud keu seumua

Peueu han ase tapeuase
Ubat beude ngon ramtaga
Uleebalang dum seuot le
Ban nyang pike po meukuta

Nibak kamoe cit ka ase
Hana pade meujak mita
Nyoepat meuriam dum ube-be
Ka jitet le su meutaga

Jitet sigo geureuda kafe
Sang-sang reule nanggroe raya
Dua buleuen keurija sabé
Meusu beude miseue geumpa

Bumoe leungo langet mirah
Bu meukuah beungoh seunja
Rakyat le that han peue peugah
Usman Basyah badai raja

Buet keurija sep-sep han sep
Ho makan trep laju raya
Putroe nam droe ate saket
Lam meurep-rep geunap masa

'oh jikalon lakoe adoe
Hana bagoe ate luka
Dalam ateji that seungkoe
Geunap uroe ro ie mata

Daraman Ali hana gundah
Gaseh meutamah keu adekda
Putroe limong nyang that sosah
Mita ilah ngon bicara

'oh jikalon Usman Basyah
Nyum aruwah jikeulua
Adat meujeuet jipeureulan
Ji'uet han jan siklep mata

Pakri laku cutda badan
Toh amilan rot tadaea
Teuma jikheun bak ayah droe
Cut putroe peugah rahnia

Wahe ayah raja nanggroe
Pakri kamoe he meukuta
Meurak Asanah ka na lakoe
Ka dua droe aneukji na

Kamoe nam droe han padoli
Tan suami troh 'an tuha
Saboh di ulee saboh di gaki
Hana sabe bah ayahda

Poteu raja seuot pantah
Meunoe ulah neumeuhaba
Wahe aneuk bek that sosah
Meurak Asanah buet Rabbana

Hana di lon kupeukawan
Bak jitren Pulo Sumatra
Dilee ngon kah sigo jitren
Sideh kawen gampong donya

Bek le aneuk ate sosah
Jinoe di kah na soe kira
Ngon keuramat Usman Basyah
Meurak Asanah jroh seutia

Peue nyang aneuk tameuhajat
Ase siat ban tapinta
Lagi alem ngon keuramat
Raya meurtabat dum geuthee na

Adat meukon raya tuah
Han troh langkah keunoe teuka
Bala di rot hana peue peugah
Laot barollah le that bahya

Meukon ureueng hampe Tuhan
Hana jalan rot jiteuka
Ureueng hampe ngon halarat
Laot darat bakjih sama

Beuthat rot laot hana mupat
Jalan mangat ro musafara
Pinto donya ka lon yue doe
'oh woe putroe adek gata

Nyang na teuhah pinto bumoe
Rot nanggroe Raja Angkara
Asai phon-phon nyang meulinteueng
Kuta Kareueng saboh raja

Teuma lheueh nyan Kuta Beusoe
Nyanpi nanggroe luah raya
Teuma lheueh nyan Kuta Pirak
Raja Palak nyang kuasa

Nanggroe luah that meuhayak
Nam buleuen jak pasang guda
Kuta Gunong Meueh nyang that tarek
Paya Rubek meuglet bungka

Sakti le that hekeumat tarek
Sulotan Malek nama raja
Tujoh thon jak jalan sampie
Trok bak nanggroe Syrwan Indra

'oh troh keunan baranggasoe
Umu sampie mate fana
Kareuna raja ureueng inong
Jihantam han jeuet tagisa

Dum raja nyan bansinaroe
Taklok keunoe banseumua
Bitpi taklok han troh jijak
Jalan jarak silagoina

Muploh ribee kapai karam
Jihantam le bakat raya
Adat seulamat sinan jalan
Laot intan han ek lingka

Intan jibeudoh ateuch umbak
Lhee buleuen jak jiplueng cahya
Bek antara keunan tajak
Di jarak ka buta mata

Baranggasoe jak han ek leupah
Angen bagah ribot raya
Cut Usman nyang meutuah
Ka troh langkah keunoe teuka

Nyankeu lon kheun bek that sosah
Bungong mirah iem tasaba
Cut Usman meutuah that
Buet halarat han troh duga

Bek le aneuk sosah ate
Bungong pade bek that subra
Teuduek dilec ate sosah
Nyoc lon peugah Raja Muda

Lheueh geutabai Usman Basyah
Rakyat barollah dum jigisa
Ayah putroe lom neupeugah
Buet Po tallah han troh duga

He raja cut po samlakoe
Cutda nam droe toh bicara
Kareuna jih goh na lakoe
Pakri jinoe pat tamita

Jinoe aneuk gata hukom
Wareh kawom laen hana
Adat na lon he samlakoe
Han troh jaroe keupeue guna

Kadang jijak jeutep-jeutep nanggroe
He samlakoe jeuheut gata
Han le jidong bak teumpat nyoe
Malee kamoe gop ceureuca

Bek he aneuk le taiem droe
Judo putroe tajak mita
Kanun reusam 'uruf nanggroe
Bak ureueng binoe seulangke teuka

Cit ka meunan he samlakoe
Baranggasoe meugah hina
Po Cut Usman seuot pantah
Insya Allah po meukuta

Tulong Tuhan insya Allah
Ngon afuwah po meukuta
Ngon beureukat do'a nang mbah
Mudah-mudah ek lon peuna

Teutapi na bacut sosah
That bit payah bak tamita
Lam nanggroe nyoe hana sapat
Timu barat aneuk raja

Aneuk meuntroe deungon meugat
Han ek dapat jiba kada
Lagi kureueng bak meurtabat
Han jeuet jimat aneuk raja

Raja Muda sosah sangat
Sebab hajat goh seuporna
Bu neupajoh han tom mangat
Gadoh ingat bak neukira

Ka teuingat nibak ate
Kaman bahle lon meuhei ma
Bah lon pangge Raja Syarwan
Wasiet peusan dileepi na

Na sikeujap lheueh nibak nyan
Neukheun nyocban Raja Muda
Wahe ma po ma teungku droe
Beu troh keunoe siklep mata

Tajak he ma siat keunoe
Aneukteu nyoe sosah raya
Meuhana troh bak siseun nyoe
Malee kamoe jeuheut gata

Sinoe neuhei sideh neuthee
Bungong keumbee sakti raya
Raja Syarwan yoh nyan seuot
Leumah-leumbot ngon suara

Tapreh dilee he bintang sret
Aneuk tulet boh ate ma
Insya Allah he Cut Usman
Troph lon keunan bijeh mata

Raja Syrwan pangge rakyat
Troph le siat keunan teuka
Pahlawan dum kuat-kuat
Gunong jimat jigeulawa

**Limong ribee geuba pahlawan
Uleebalang lapan laksa
Laen neutroe deungon meugat
Barollah that tantra teuka**

**Sakti tarek dum pahlawan
Po lam awan lop lam donya
Laot apui jeuet jitamong
Dalam gunong jeuet jihala**

**'oh troh keunan dum jideelat
Peue na hajat po meukuta
Raja Syarwan peugah leugat
Lon jak siat bak aneukda**

**Cut Usman pangge kamoe
Beudoh jinoe jak tabungka
Jiseuot dum meuntroe meugat
Kadang arat gop prang kuta**

**Meujadi prang po junjongan
Bahle karam nanggroe Indra
Mangat jithee meuntroe Syarwan
Mangat jituban Raja Angkara**

**Beudoh rijang po junjongan
Cut Usman saleh peue ka
Meunyoe bit-bit gop prang nanggroe
Dum sinaroe kupufana**

**Raja Syarwan seuot rijang
Kon gop jak prang aneuk hamba
Putroe nam droe lakoejih tan
Kakee tuban dum rahsia**

**Meunyan tuanku peue cit sosah
Insya Allah troh ban pinta
Kamoe sangka gop prang nanggroe
Judo putroe mudah raya**

Insya Allah tuanku droe
Bak kamoe atueh jeumala
Raja Syarwan peukeumah droe
Bungka jinoe deungon tantra

Neuhei angen nyang saktian
Neupo yoh nyan tantra raja
Jiteureubang dalam awan
Tantra Syarwan u Antara

Umu peuet jeuem jiteureubang
Sampoe datang bak aneukda
'oh sare troh bak nanggroe nyan
Tamong rijang dalam kuta

Abeh tamong dum u dalam
Troh u hadapan Raja Muda
Meuntroe meugah ngon pahlawan
Abeh keunan dalam kuta

Po Cut Usman beudoh leugat
Bri horeumat seumbah po ma
Raja Syarwan ate mangat
Tanyong leugat bak aneukda

Wahe aneuk peue na sosah
Tapeugah bek malee mata
Peue na napsu he meuh mirah
Insya Allah Po Karonya

Po Cut Usman seuot pantah
Lon that sosah wahe po ma
Putroe nam droe he ma pakri
Tan suami troh 'an tuha

Wahe po ma jinoe pakri
Pat tacari aneuk raja
Lam nanggroe nyoe hana sapat
Timu barat ka lon mita

Ka lon sudi jeuep-jeuep teumpat
Hana sapat aneuk raja
Beu le gaseh ma meutuah
Taseuleuah siat he ma

Tatueng fahla bak Po tallah
Bek ngon ilah bak buet donya
Tuhan neubri nekmat limpah
Badai payah le that fahla

Raja Syarwan seuot laju
Aneuk teungku lon usaha
Pane raja tameunapsu
Bungong meulu nyang tahawa

Beuthat meugah ngon meusyeuhu
Barat timu lon jak mita
Beuthat jiduek dalam laot
Long angkot keunoe bak gata

Beuthat nanggroe dalam awan
Lon con intan keunoe lon ba
Peugah aneuk leugat pantah
Bungong mirah siri raja

Cut Usman peugah meunoe
Deungo kamoe wahe po ma
Aneuk Raja Kuta Karang
Na meuteumeung saboh masa

Masa lon jak bungka keunoe
Ngon kamoe ka jeuet syeedara
Dilee lon jak keunoe seubrang
U Kuta Karang Cut Meulu ba

Meunyo cutda neukheun ayah
Di lonpi sah kukheun bapa
Saleuem ulon ma neupeugah
Keu bawah kidam meukuta

Bungkoh di baho tungkat di jari
Ulon geumade nibak sripada
Neubri keu lon aneuk sidroe
Cutda putroe judo hana

Neucré sinan u Kuta Beusoe
Bak nanggroe Mahmud Beurama
Neulakee bak raja nanggroe
Saleuem kamoe neupeuhaba

Sinanpi na aneuk sidroe
Ureueng lakoe elok rupa
Neucré sinan u Kuta Pirak
Bak nanggroe wak Sulotan Usma

Teuma neujak u nanggroe Tasek
Sulotan Malek bak ayahda
Neukheun saleuem ulon peuek
Putroe baek judo goh na

Nyankeu raja nyang di atueh
Gunong meuh di leuen istana
Nam reutoh raja taklok keunan
Bak tuan nyang junjong sabda

Nama geuheu Amat Kumiran
Di bawah nyan peuet reutoh raja
Takheun saleuem lon keu ayah
Jaroé dua blah di jeumala

Aneuk tuanku lon bri zeejah
Hajat peunikah ngon teumuda
Geulantoe neubri keu lon seudeukah
Lon tueng ijadah bak meukuta

Sare abeh Usman peugah
Syarwan pantah beudoh sigra
Nam boh pucok peugot surat
Ban nyan adat meujeulih raja

Maseng-maseng na alamat
Lapek surat jeuep-jeuep raja
Raja Syarwan dong beurdiri
Jihei wadi ngon panglima

Ka jipangge angen sakti
Jimeun:ri dalam Indra
Beudoh rakyat yoh nyan mari
Kandran sakti banseumua

Ka jibapo dalam awan
'oh tapandang han meuho ka
Kandran sakti miseue hewan
Ban lakuan kleueng seumama

Ka rab hampe laot intan
Raja Syarwan le bri haba
Ka jipeugah dum bak rakyat
Ingar beu that bek binasa

Cuba kalon na deuh kilat
Ateueh bakat na meucahya
Meuna jibeudoh cahya u darat
Surot siat preh kutika

Meutabungka jeuet meularat
Jadeh meuhad sret bruek mata
Keupeue udep hana mate
Mata han le keupeue guna

Rakyat seuot jipeugah le
Ampon doli hana cahya
Nyang na leumah cit meusagop
Laot seupot glap-gulita

Bak peunyum lon intan ka sret
U pusat laot dum teurhanta
Meunyo meunan bungka leugat
Bit nyo jroh that roh kutika

Sakti pantah po jikarat
Jilumpat ka lheueh u lua
Sare leupah laot intan
Troh bak jalan nyang seujahtera

Bungka laju bacut bacut
Han le hayut ka seumporna
Troh bak nanggroe Sulotan Mahmud
Sakti sujud ban kleueng sama

Troh bak nanggroe geubeurjalan
Sajan-sajan ngon balatantra
Sira geujak mupeurasan
Raja Syarwan le that tantra

Hingga troh u nanggroe Tasek
Surat geupeukeu keu poteu raja
Han jitamong jih u dalam
Seubab han jan teungoh bungka

Limong ho treuk gohlom jijak
Goh meurumpak deungon raja
Jihei ureueng sinan sidroe
Jok u jaroe surat dafta

Tadeungo he ureueng lakoe
Surat nyoe tajok keu raja
Han peue ulon le hikayat
Dalam surat sinan haba

Nyang jom meusoe teuka mupat
Soe nyang lihat 'oh jibuka
'oh neutanyong soe me keunoe
Takheun kamoe Syarwan Indra

Pakon han troh jijak keunoe
'oh jan lon woe tapeuhaba
Takheun saleuem lon sipatah
Usman Basyah meulintee raja

Judo Putroe Meurak Asanah
Haliman Syah nama raja
Nyankeuh ayah Meurak Asanah
Raja meugah di Antara

Abeh dumpeue ka jipeugah
Yoh nyan pantah le jibungka
Tinggai sinan ureueng lakoe
Ka jiwoe bak poteu raja

Troh bak raja jibet jaroe
Ampon kamoe po meukuta
Seumbah saleuem Usman Basyah
Geuyue peugah bak sripada

Meunan bak lon geuyue peugah
Kon beurakah lon peuhaba
Nyoe na saboh surat geujok
Geuyue peutrok keu meukuta

Hana keunoe droegeu masok
Gop nyan dawok teungoh bungka
Nyang me surat Raja Syarwan
Cuco tuan Raja Angkara

Poteu raja neucok surat
Kalon leugat peue na haba
Neueu haba dum mangat that
Sang bu leukat ngon srikaya

Cut Usman that meutuah
Ka troh langkah bak tuan tha
Sabet beuna waliyullah
Dum meusiblah nibak bahya

Bak lon sangka han udep le
Ka mate lam laot raya
Ka seulamat cut boh ate
Ka meusampe troh ban pinta

Poteu raja neumeuase
Rakyat neupangge meukeurija
Uroe malam geutet beude
Jeuep lungkick gle ureueng bungka

Raja Syarwan jibeurangkat
Sajan rakyat balatantra
Trok bak nanggroe Kuta Pirak
Bak nanggroe wak Raja Beurama

Raja Syarwan ate galak
Kuta Pirak jieu rupa
Jieu kuta hu mubhak-bhak
Lhee buleuen jak jiplueng cahya

Nyanpi surat jiyeue bawak
Droe han jijak lom jibungka
Miseue dilee lom jipeugah
Usman Basyah surah hamba

Surat jijok jiyeue puwoe
Ureueng nanggroe me bak raja
Poteu raja neubeuet surat
Ate mangat hana tara

Raja Syarwan bungka leugat
Trok bak teumpat Kuta Teumaga
'oh sare trok bak nanggore nyan
Jok kireman leugat bungka

Di jih han le jidong sinan
Bungka yoh nyan pantah sigra
Bungka laju tan jipioh
Hingga trok bak laen donya

Trok bak gampong Kuta Beusoe
Jipioh droe siklep mata
Nyanpi surat jiyeue puwoe
Han jijak droe lom jibungka

Rab ka abeh dum seuleusoe
Saboh nanggroe treuk gohлом na
Bungka leugat Raja Syarwan
Kuta Karang troh jihala

Tantra Syarwan dong meureuleueng
Jareueung-jareueng jitet lila
Jitet beude meugeureupoh
Abeh kiroh ureueng donya

Raja nanggroepi ka riöh
Neukheun musoh pane teuka
Ka neupangge le ngon meuntroe
Geusyik sagoe ngon panglima

Wahe meuntroe tadeungo kaimoe
Cuba jinoe jak peunyata
Teubiet u blang gata siat
Le that rakyat lon eu teuka

Cuba tanyong peu na hajat
Kheun beu teupat bek meuriba
Meuntroe teubiet laju u blang
Sajan-sajan ngon peurdana

Hana jan troh jijak keunan
Raja Syarwan le meuhaba
Keunoe laju wahe tuan
Na peue padan lon ngon gata

Han jijeuet jak sang teumakot
Meusurot 'oh jieu tantra
Jikeumeung plueng hana patot
Bak teuot jipeugot geumpa

Bek tatakot wahe teelan
Bukon lawan lon syeedara
Ulon suroh cut bangsawan
Haluan lon me keu raja

'oh jideungo geukheun meunan
Peurab yoh nyan han le goga
Ban sare troh jijak keunan
Surat yoh nyan le geuyue ba

Takheun saleuem Cut Usman
Raja Syarwan nyang me sabda
Jicok surat mat u jaroe
Teuma jiwoe pantah sigra

Troh bak raja jikheun meunoe
Ampon kamoe po meukuta
Ureueng datangpi ka meusoe
Jeuoh nanggroe keunoe teuka

Hajat keunoe geumeulangkah
U bawah kidam po meukuta
Geukheun saleuem Usman Basyah
Geuyue peugah bak sripada

Nyang jak keunoe Raja Syarwan
Cuco tuan Raja Angkara
Nyoepat surat saboh geujok
Geuyue peutrok keu meukuta

Gop nyan keunoe han geujak trok
Surat geujok mula-mula
Ban raja deungo haba meunan
Po junjongan ate suka

Neueu saleuem Cut Usman
Raja yoh nyan suka rasa
Bit meutuah aneuk lon nyoe
Ka troh jiwoe bak tuan tha

Bak lon sangka ka mu:paloe
Bak nanggroe Raja Angkara
'oh troh keunan baranggasde
Umu sampoe mate fana

Nyankeu aneuk nyang meutuah
Waliyullah that takwa
Sabet beuna Usman-Basyah
Meurak Asanah nyo judonya

Poteu raja kalon surat
Neubeuet leugat pakri rupa
Neudeungo haba dum mangat that
Raja deelat ate suka

Aneuk ulon jilakee sidroe
Judo putroe hana lom na
Bahle lon bri kaman jinoe
Aneuk kamoe bah lon yue ba

Poteu raja kheun bak bujang
Rakyat rijang kaseuranta
'oh sare troh keunan datang
Suroh u blang pantah sigra

Jak kateubiet jinoe rijang
Jamee datang ampeueng sigra
'oh lheueh suroh nibak deelat
Teubiet leugat le u lua

Kajigrop-grop ngon jilumpat
Galakji that hana tara
Jitet beude meugerupoh
Tadeungo kiroh su meutaga

Nyang tuha tuha mumat jaroe
Dum sinaroe meu'ah deesya
Jipeutamong le u dalam
Troph bak makam poteu raja

'oh sare lheueh mumat jaroe
Sideh sinoe bungkoh geuba
Raja Syarwan geupeujamee
Miseue lagee meukeurija

Dua uroe teutap sinan
Raja Syarwan buka haba
Wahe Raja Kuta Karang
Lon ka datang keunoe teuka

Lon ngon gata ka meuteumeung
Neubri bulueng lon jak gisa
Peue peuneugah dalam surat
Ka talihat peue na haba

Teuma seuot raja deelat
Haba mangat dum srikaya
Aneuk ulon na siurat
Gohlom dapat lon bri jeumba

Bak lonpi jeuet ban nyang hajat
Hana dapat lon meudawa
Cut Usman manyang pangkat
Lon takot that teumeureuka

Dum geuthee na timu barat
Meusycuhu that Raja Muda
Diwa Syarep aneuk deelat
Neujok leugat le neuyue ba

Raja Syarwan yoh nyan neuwoe
U Kuta Beusoe le neuhala
Kuta luah hana bagoe
Raja nanggroe geuheu Beurama

Sinanpi lom jicok sidroe
Nama samlakoe Sulotan Usma
Hingga meunan jeuep-jeuep teumpat
Abeh meusapat aneuk raja

Abeh bannam jipeusapat
Jiba leugat banseumua
Jipeuduek atueh kandran sakti
Dua hari ka seumporna

'oh sare troh bak samlakoe
Jipeujaroe aneuk raja
Saleuem Raja Kuta Beusoe
Geuyue puwoe ubak gata

Nyoe ha aneuk cut bangsawan
Suroh intan ubak po ma
Ka lon puwoe bungong mirah
Ngon meutuah boh ate ma

Tan jidawa 'oh lon peugah
Bungong kipah tuah gata
Jinoe aneuk lon kujak woe
Po samlakoe idin gata

Insya Allah ma teungku droe
Keu ulon nyoe beu le do'a
Uroe dudoe jan meukarat
Tahei leugat troh lon teuka

Insya Allah ma jeunulang
Jak tariwang beu sijahtra
Raja Syarwan beudoh teureubang
Sajan-sajan deungan tantra

Cut Usman beudoh pantah
Jak bak ayah putroe muda
'oh troh keunan u hadapan
Cut Usman neumeuhaba

Ampon tuanku na peue hajat
Nibak deelat lon peuhaba
Kheundak Tuhan Po halarat
Hajat deelat troh ban pinta

Napsu deelat linto baro
Bri Tuhanku troh ban pinta
Cutda nam droe neubri judo
Linto baro nyoe nyang ka na

Roh sipadan ngon siuko
Ban diseuto han meutuka
Bukon aneuk baranggasoe
Ureueng meusoe biek meunama

Aneuk Raja Kuta Beusoe
Ngon kamoe ka jeuet syeedara
Poteu raja seuot meunoe
He samlakoe Raja Muda

Peue tatanyong nibak kamoe
Ban hajat droe bijeh mata
Ban nyang hajat bungong peukan
Seukalian milek gata

Han peue tanyong bak lon tuan
Kri nyang padan bak lon rela
Di lon han le kumat nanggroe
He samlakoe hukom gata

Ban neudeungo haba meunan
Cut Usman beudoh sigra
Neupangge le waki meuntroe
Tajak jinoe meuseuranta

Beu abeh dum jitren keunoe
Hajat kamoe meukeurija
Meuntroe beudoh rijang-rijang
Jikrah urang meuseuranta

Rakyat jitren dum sibarang
Uleebalang ngon panglima
Nam reutoh tujoh ploh raja di baroh
Bandum ka troh keunan teuka

Cut Usman raja alem
Seukalian tren bak raja
Nyanteu raja nyang meutuah
Waliyullah that takwa

'oh lheueh meuntroe jak keumeurah
Rakyat barollah abeh teuka
Jitren laju subhanallah
Han peue peugah ban ie raya

Tujoh uroe jitren sabe
Sang han lot le mideuen raja
'oh meusapat seugala be
Jijunjong le Raja Muda

Uleebalang dum hei ampon
Jiseuon ngon jaroedua
Kamoe ka troh seugala don
Ho neusuron po meukuta

Siri gampong ka meusugang
Toh siri blang tan musara
Kamoe ka troh dum ka datang
Pat saleh prang lawam raja

Raja Muda seuot rijang
Bukon buet prang lon yue gata
Beu le gaseh deungon sayang
Tulong alang dumna gata

Cutda nam droe lon peukawen
Mayoh meusyen meukeurija
Gata siblah teudong aseng
Linto jitren di rumoh gata

Tadong santeut seugala don
Bek malee lon bak teumuda
Syeedara han kawom lon tan
Tulong sayang lon tan bapa

Nyankeu narit ka lon peugah
Pakri mudah nibak gata
Bek meusampe ureueng meudagang
Teugo tan wang han soe kira

Uleebalang seuot meunoe
Bak kamoe atueh jeumala
Ban nyang titah po junjongan
Seuon laman barang sabda

Meunyo keumah pakat sampoe
Jakleh tawoe meukeurija
Teuma beudoh uleebalang
Puwoe rijang aneuk raja

Jicok linto saboh sidroe
Maseng bakdroe dum beulanja
Maseng-maseng kira keudroe
Aneuk nanggroe jak mumita

Sebab aneuk raja meugah
Jeuoh langkah keunoe teuka
Buet keurija han peue peugah
Jitet keumurah raya-raya

Rot Usmanpi ka ase
Geureuda kafe geutet sigra
Ngon suara hana sabe
Sang reuloh gle karam donya

Tujoh uroe mupeurasan
Lheueh nibak nyan linto geuba
Putroe bannam sigo kawen
Maseng-maseng judo ka na

Saboh sapo geubri judo
Linto baro aneuk raja
Roh sipadan ngon siuko
Ban nyang laku tuha muda

Jinoe han le tahe-gante
Ka na judo banseumua
Han ceumuru le keu adoe
Cut putroe ate suka

Na cit bacut nyang na paloe
Juđo adoe badai raja
Halaman Syah neuduek keudroe
Miseue bagoe ureueng tuha

Na cit bacut jitroh deundam
Muka masam bandum cutda
Lagi bakjih aneuk agam
Han ek tatham dum peukara

Cut Usman ate seunang
Cutda bannam judo ka na
Cut Usman keurajeuen nanggroe
Meurak Putroe dalam kuta

Teutap keurajeuen raja seudang
Hukom seunang tan meuriba
Hukom ade hana lawan
Lam nanggroe nyan Raja Muda

Aneuk raja bunoe nam droe
Tadeungo jinoe lon kheun nama
Diwa Sang Sarep sidroe geupeunan
Keudua nan sulotan Usma

Nama nyang lhee Raja Pari
Peuet geurasi Juhan Indra
Nama keulimong Rakna Syahi
Keunam geurasi Raja Miga

Nyan syeedara Cut Usman
Lam nanggroe nyan mat neuraca
Usman kheun bak siuroe
Ubak nam droe aneuk raja

Neuyue pangge raja nam droe
Trok le sampoe keunan sigra
'oh trok keunan bak bale rom
Meuhimpon deungan bentara

Cut Usman neumentuto
Hadapan le neu reusabda
Ho panglima deungon meuntroe
Bak ulon nyoe bacut haba

Hajat ulon raja nam droe
Lon yue gantoe mat neuraca
Jinoe lon boh peurdana meuntroe
Bannam droe peudimang raja

Timu barat tunong baroh
Hukom putoh bak kakanda
Kareuna lon akai kureueng
Tamse bateueng tan bicara

Ulon harap dum sibarang
Hukom abang bannam gata
Syeedara han kawom lon tan
Lon harapkan bak kakanda

Lon kakanda aneuk dagang
Keunoe datang sidroe saja
Beu le gaseh deungon sayang
Lon niet mawang saboh bunda

Adat gop poh di rot di blang
Na cut abang deungon hamba
Bak kakanda sibarang hai
Lon tan akai ube seuma

Udep mate laba rugoe
Lon nyang adoe hukon gata
Nyan kakanda ulon peugah
Beuna salah bak kakanda

Neupeutimang ban nyang adat
Aneuk rakyat ngon panglima
Nam reutoh droe raja di baroh
Lam keumak beh bak kakanda

'oh troh raja timu barat
Keunan leugat ubak gata
Nyang lhee reutoh han troh jijak
Hukom nibak lon adekda

Ulon teuka 'oh na hajat
Timu barat troh lon teuka
Wase nanggroe wase ladang
Hukom abang banseumua

Nibak ayah neutueng hukom
Ladom-ladom bak ayahda
Raja Usman neukheun pantah
Ubak ayah putroe muda

Haliman Syah di hadapan
Neubet tangan Raja Muda
Ampon tuanku payong nanggroe
Raja nam droe peutimang raja

Nyankeuh meuntroe lam nanggroe nyoe
Aduen adoe mat neuraca
Dumna raja dalam nanggroe
Dalam jaroe bak kakanda

Neutueng pakat nibak ayah
Beuna salah ikot dumna
Raja han troh jijak keunoe
Hukom kamoe po meukuta

Ngon beureukat kawoh doli
Troph lon titi deungon sigra
Bak kakanda ulon yue ladom
Ban nyang hukom aduen hamba

Haliman Syah seuot rijang
He bintang ban hukom gata
Udep mate laba rugoe
Po samlakoe ban nyang suka

Haliman Syah neukheun rijang
Bak raja nam neumeusabda
Nyan he aneuk tuto adek
Bek tabalek bijeh mata

Beu sapeue kheun bantujoh droe
Po samlakoe aneuk hamba
Bak lon aneuk paleuet linteueng
Intan buleuen bandum gata

Raja nam droe seuot pantah
Jaroe dua blah di jeumala
Ampon tuanku meuribee ampon
Patek junjong kawoh meukuta

Kamoe tuanku keunoe datang
Aneuk dagang jeuoh donya
Di tuanku neutem peusayang
Kamoe tan wang mante rimba

Bannam kamoe po junjongan
Di yup kidam harap mulia
Neugantung manyang neuboh jeuoh
Nyawong tuboh milek sripada

Ban nyang hukom po junjongan
Bak kamoe tan paleng muka
Syeedara han kawommeu tan
Meulaenkan kawoh sripada

Hana patot neujok nanggroe
Deelat meukatoe kamoe hamba
Nyang patot mee ampon doli
Ie srat gaki lon keurija

Laen nibak nyan deelat meulagee
Lon plah kayec yup istana
Cut Usman seuot leugat
Kru seumangat he kakanda

Lon niet gata he cut abang
Saboh mawang deungon hamba
Lon niet nyawong deungon tuboh
Nanggroe jeuoh keunoe teuka

Meutan gaseh gata nam droe
Ka lheueh bunoe lon peuhaba
Bek meudawa he cut abang
Lon pulang bak nam droe gata

Ayah gata di lon ayah
Bek tabantah he kakanda
Masa lon jak bak nanggroe nyoe
Dum sinaroe bak ayahda

Meunyo gata takheun ayah
Di lonpi sah ibu bapa
Nyankeu cut bang bek bantahan
Meulaenkan ban hajat hamba

Hana bantah bak lon tuan
Meulaenkan ban hajat kakanda
Ban nyang titah po junjongan
Bak patek han paleng muka

Mangat ate raja nanggroe
Bantujohe droe sang syeedara
Putroe nyang nam han le sosah
Haliman Syah ate suka

Raja Usman lam meuligoe
Deungon Putroe Meurak muda
Raja nam droe nyang peutimang
Wase datang rok-rok masa

Jeuep-jeuep nanggroe troh dum wase
Keunan jime nanggroe raja
Nyang teurimong raja nam droe
Hukom nanggroe jeuep-jeuep banda

Keunan teuka jeuep-jeuep tempat
Timu barat troh u Jawa
Cut Usman meugah han soe
Dum geupujoe troh u Banggala

Troh nanggroe Rom ngon Turuki
That juhari hukom beuna
Nanggroe luah amat sangat
Le that rakyat ngon panglima

Pahlawan le meugah meugah
That barollah kandran guda
Baranggasoe han ek jiprang
Le pahlawan teuga teuga

Dalam kuta le meuriam
Jicuram babah u lua
Iku Lutong Geumpa Alam
Taeu macam dum mubanja

Hana sidroe nyang na agam
Keunan jiprang Raja Muda
Han ek talo bak lakuan
That jeumeurang luah raya

Lagi ade raja saleh
Pangkat leubeh that eelia
Uroe malam ingat halarat
Jigaseh that le panglima

Bandua ngon putroe ubat
Aneuk deelat Hasyem muda
Deungon rakan neujak meuen
Meuen-meuen sabe muda

Raja Usman lam meuligoe
Deungon putroe meuseusuka
Raja nam droe gantoe tangan
That budiman bijaksana

Dalam nanggroe murah pade
Ujeuen di gle kaem teuka
Ureueng nanggroe manget ate
Seubab ade raja raya

Bentara ngon uleebalang
Jipeutimang raja raya
Hana sapat miyup manyang
Jitimang ban on neuraca

Buju kuta sibuleuen jak
Ngon tapak bukon ngon guda
Rakyat peunoh dum meusak-sak
Jai ureueng jak ade raja

Linteueng teuma nan blah uroe
'oh nan tanggoe luah kuta
Teuduek 'oh nan dilee siat
Lon riwayat laen raja

III. RAJA GEUNTA ALAM KEUMEUNG REUBOT PUTROE MEURAK

Nama nanggroe Tasek Hijo
Pahlawan le teuga teuga
Rakyat le that miseue naleueng
Dumnan ureueng dalam banda

Raja nyan that sakti utoh
Jipo jeuoh dalam hawa
Jitapa bak cicem ujeuen
Di baroh buleuen dalam migas

Umu peuet ploh thon lam tapaan
Seukalian jipeurupa
Han jithee na raja laen
Meuntroe ireng lingka raja

Geunap uroe lam sukaan
Seukalian deungon tantra
Nama Raja Geunta Alam
Luah makam hana ngon sa

Taklok raja lapan ribee
Le that sukee kandran guda
Deungon rakyat that barollah
Nanggroe luah han ek bungka

Teutap raja lam meuligoe
Wadi meuntroe sajan raja
Bak simalam jimeulumpoe
Na nyum putroe keunan teuka

Na nyum Putroe Meurak Asanah
Meunan leumah lam rahsia
Sang nyum jieh sajan putroe
Lam meuligoe di istana

**Jieu rupa dum bintang hu
Glum meatabu peunoh dada
Bulee keuneng rancong tajoe
Patam bak dhoe jroh that rupa**

**Takue panyang dum geularek
Muka baek ban purnama
Miengpi licen ban ceureumen
Nyang that reunem bulee mata**

**Raja tahe hireuen mandang
Galak that sang ate suka
Putroe laen hana meunan
Jroh putroe nyan hana ngon sa**

**Mata dua tamse bintang
Reukuengji ban larek bunga
Keuieng seudang baho manyang
Jroh keumang sang kipah Cina**

**Taeu gigoe puteh mirah
Hana ubah bijeh deulima
Raja yoh nyan mayoh keudroe
Gila wang-woe pandang mata**

**Aneuk jaroe jroh meususon
Ujung turon bungong jeumpa
Geunta Alam rindu ate
Keu putroe ti Meurak muda**

**Na nyum putroe jieu bek cre
Pungo ate raja raya
Ban teukeujot bak meulumpoe
Beungoh uroe teubiet faja**

**Ate sosah hana bagoe
Raja nanggroe pungo gila
Jiduek han seunang jidong ham teutap
Seubab got that putroe muda**

Bu jipajoh hana lot le
Sang di ate sang di mata
Yoh nyan raja pangge nujum
Keunan bandum tren bak raja

Jidong di yup peurakna seumbah
Jaroe dua blah di jeumala
Ampo tuanku meuribee ampon
Kamoe bandum abeh teuka

Peuebu hajat po junjongan
Neukheun rijang po meukuta
Sabda raja ubak nujum
Neuyue kalon ban rahsia

Wahe teungku guree kamoe
Lon kheun jinoe ubak gata
Beuklam teungku lon meulumpoe
Na nyum putroe keunoe teuka

Ulon lumpoe putroe indah
Keunoe langkah troh bak hamba
Na nyum jiduek sajan kamoe
Lam meuligoe di istana

Meurak Asanah nama putroe
Indah han soe ateueh donya
Nanggroe Tasek nan geurasi
Kuta tinggi troh lam hawa

Cuba kalon teungku siat
Ek troh hajat ban lon pinta
Lon meuhajat jak tueng putroe
Cuba cieu dalam dafta

Ampo tuanku kamoe lihat
Ban kheun deelat di jeumala
Yoh nyan nujum kalon surat
Deuh jilihat dalam dafta

**Jibet jaroe le meulayang
Jikheun rijang meunoe haba
Ampon tuanku payong nanggroe
Payah putroe tuanku ba**

**Bak tamuprang payah hansoe
Judo putroe sakti raya
Le hekeumat han peue peugah
Pahlawan meugah that peurkasa**

**Teutapi le mate rakyat
Seungsara that bak tangaza
Geunta Alam seuot pantah
Insya Allah he peundita**

**Asai ka na putroe indah
Nyang laen bah kri nyang suka
Yoh nyan nujum jilakee woe
Dum sinaroe lakee gisa**

**Geunta Alam jikrah rakyat
Timu barat raja raja
Jitet sigo beude nubat
Teuka rakyat jeuep-jeuep donya**

**Raja taklok uleebalang
Abeh datang keunan teuka
Rakyat bha that ngon pahlawan
Adi juhan ngon panglima**

**Rakyat ka troh dum u mideuen
Pioh di leuen meuligoe raja
Sabda raja bak uleebalang
Di lua di blang dum bentara**

**Nyang lon pangge dum sinaroe
Hajat kamoe heundak bungka
Nanggroe Tasek nyang seureuloe
Meugah putroe jroh that rupa**

Meurak Asanah putroe indah
Meusyeuhu gah ateueh donya
Hajat ulon cut putroe jroh
Lakoe lon poh lon prang kuta

Uroe Hameh lon beurangkat
Lon prang teumpat putroe muda
Gaseh gata keu lon siat
Tabeurangkat sajan hamba

Seuot rakyat wadi meuntroe
Dum sinaroe raja raja
Ampon tuanku payong nanggroe
Dumna kamoe ate suka

Bah tacuba adu sakti
Mangat meuri ngon peurkasa
Keupeue kamoe seukalian
Meunyo tan prang keupeue kuta

Keupeue meugah dum pahlawan
Uleebalang ngon panglima
Cuba sigo adu sakti
Mangat meuri po meukuta

Padumna trep hana muprang
Dum pahlawan teuga teuga
Keupeue sakti dum sibarang
Han tom na prang rugoe raya

Kamoe tuanku abeh pike
Cit ka ase dum peukara
Raja raja uleebalang
'oh jideungo prang ate suka

Rakyat le that han peue peugah
Guda gajah ladom unta
Yoh nyan raja neubeurangkat
Ireng rakyat han teukita

Jibeurangkat jalan lam gle
That meuseuke dalam rimba
Ateueh kandran dum peureugi
Jak ngon gaki ladom guda

Ladom ateueh guda tanji
Meuntroe wadi ateueh singa
Ladom duek ateueh waliman
Ladom pasang ateueh naga

Ladom giduek ateueh gajah
Ladom ulah cong angkara
Ladom duek ateueh guda plang
Ladom pasang ateueh geureuda

Ateueh burak ladom pasang
Uleebalang ateueh naga
Ateueh burong ladom pasang
Ateueh tilam ladom raja

Rakyat le that han peue peugah
Gunong luah jeuet keu data
Ladom raja jiteureubang
Ateueh awan dalam miga

Geunta Alam nyang meusyeuhu
Ateueh manggu kandran raja
Le that kandran macam-macam
Dum pahlawan ngon bentara

Bungka u nanggroe Haliman Syah
Sebab meugah putroe muda
Sebab meugah putroe jroh that
Jibeurangkat jiprang kuta

Padum lawet jibeurangkat
Tan jitupat nanggroe raja
Teutap mumita geunap uroe
Hingga sampoe nam buleuen ka

Nanggroe putroe han jitupat
Timu barat han meuhingga
Tujoh buleuen jibeurangkatz
Rab ka mupat keumeung nyata

Hingga troh bak saboh padang
Leumah yoh nyan hu meucayha
Leumah jieu hu that bandrang
U manyang u dalam indra

Meuteumeung le ureueng sidroe
Supo nanggroe jipareksa
Nanggroe Tasek pat daerah
Cuba peugah ubak hamba

Aneuk Raja Haliman Syah
Aneuk tujoh jroh dum rupa
Aneuk tulet Meurak Asanah
Nyang leubeh jroh nibak nyang na

Cut Usman nama lakoe
Gampong nanggroe di Sumatra
Nyang mat nanggroe lakoe putroe
Meugah han soe ade raya

Sakti utoh hana lawan
Meurak intan judo banta
Ngon pahlawan that barollah
Guda gajah kandran rata

Kuta leusoh panyang tinggi
Dum sipai kawai lingka
Dalam kuta beude meuasoe
Kawai putroe aneuk raja

Jen ngon pari kawai dalam
Baranggajan lam jijaga
Ngon meuriam dum teudu-du
Aneuk taeu ube-be raga

Ngon sidadu jeuep-jeuep lapeh
Beude puteh seunapang ceureupa
Watee meugriet teuka musoh
Sigo jicoh ban seulingka

Nyang meuriam han ek peugah
Keumurah panyang nam deupa
Meuntroe wadi uleebalang
Di geunireng raja raya

Mangkubumi meuntroe tarek
That ceureudek boh bicara
Uroe malam hana tom cre
Dum sipai pahlawan kha

Haliman Syah neuduek keudroe
Saboh sagee dalam kuta
Nyan habaran ka lon peugah
Abeh udah lon calitra

Geunta Alam deungo meunan
Lom beurjalan ate suka
Amma bakdu that meuragam
Geunta Alam lon calitra

Jibeurangkat malam uroe
Mita nanggroe putroe muda
Sibuleuen treuk jibeurjalan
Uroe malam musafara

Padum lawet teuma dudoe
Troh bak nanggroe putroe muda
Troh bak nanggroe Usman Basyah
That barollah musoh teuka

Troh bak padang di blang Tasek
Uroe tarek sangat that kha
Geunta Alam cinta hekeumat
Teudong leugat dumna kuta

Na siribee kuta teudong
Leusoh manyang dalam hawa
Peunoh asoe dum di dalam
Pahlawan deungon panglima

Kuta teudong dum meureuntang
Peunoh padang mideuen raja
Manyang-manyang troh lam awan
Geunta Alam nyang po kuta

Geunta Alam peugot surat
Yue ba leugat ubak raja
Meunoe haba dalam surat
Deungo he sahbat dua banja

Saya datang raja deelat
Bak teumpat gata nyang raja
Cut Usman sayang lon that
Bek meularat atueuh gata

Bungong keumang lon meuhajat
Intat siat keunoe sigra
Tasek Hijo lon tren sideh
Bintang peureuseh lon meuhawa

Geunta Alam nama meuceh
Jithee abeh dumna raja
Meunyo hana bungong puteh
Pike abeh dilee gata

Meuhan tabri tuan putroe
Ingar keudroe peukong kuta
'oh lon tamong dalam nanggroe
Bek soh jaroe kamoe raja

Sinoe lon preh limong uroe
Ingar keudroe meunyo hana
Lon kira.bek runtoh nanggroe
Tabri putroe lon jak gisa

Dumna pahlawan gata sinoe
Di kamoe lhee cupak sira
Kutren di rumoh kurudah rinyeun
Tan dua seun kupandang donya

Meuhan tabri putroe buleuen
Ban nyang kukheun han meutuka
Rumoh kutet monteu kudoe
Kucok putroe judo gata

Meuhana troh limong uroe
Kupoh lakoe putroe kuba
Kubri ingat beu abeh proe
Pike keudroe gata raja

Ka lon peugah awai akhe
Cuba pike toh meurasa
Putroe kucok gata mate
Nanggroe reule peue na laba

Nyang got tabri rijang putroe
Mangat kuwoe bek le goga
Dalam surat nyang hareutoe
Jiyue puwoe ubak raja

Beudoh bujang jak me surat
Troph le siat dalam kuta
Meuteumeung le raja nanggroe
Jok ba jaroe surat sigra

Raja buka yoh nyan surat
Neueu riwayat sabda raja
Neudeungo habapi saket that
Raja deelat mirah muka

Cut Usman balah surat
Tuto jroh that na dum saka
Wahe Raja Geunta Alam
Jakleh riwang bek le haba

Han peue dalem tapeuingat
Cit tarek that lon thee gata
Lon bri jinoe ban nyang hajat
Putroe jroh that hana bagoe

Rupa cidah putroe linteng
Inong anjeng bulee soebroe
Putroe jroh that dalem payong
Bah tacom-com sira tawoe

Dua banja mom bak dada
Jroh that rupa plang bak takue
Ngon suarapi that gura
Ureueng teuka jigurantang

Mukapi jroh tamse lutong
Dalem payong sambot rijang
Meuhan tatueng jakleh tawoe
Bek kuseudoe nyawong karam

Meuhan tawoe lon pakri bah
'oh noe tuah gata abang
Saleh jinoe na umpeuen peudeueng
Meuseunoh bayeuen dalam padang

Simadua trep lam tapa
Dua thon ka nyang hana prang
Simadua Alam deuek deungn grah
Bahle mirah ie beurawang

Hana tom troh keunoe umpeuen
Peudeueng keurajeuen lheuen neupulang
Kubri umpeuen beu troe leupah
Bek deuek ngon grah peudeueng bak wang

Sayang lon that Alam Geunta
Jak tagisa yoh goh karam
Nyoepi saboh rimueng uteuen
Tan soe linteueng jeuep-jeuep alam

Ka lheueh lon po dalam mig
Ka lon lingka laot intan
Laot apui ka lon cuba
Tan lon kira nyawong hilang

Nyoepi han peue insya Allah
Deungon tuah abi ngon wang
Ngon beureukat Teungku Syiah
Deungon tuah Raja Syarwan

Wahe Raja Tasek Hijo
Jak woe laju yoh goh karam
Tanda gaseh nibak hamba
Nyang got gisa he buleuen trang

Adat han tawoe lon pakri bah
Ka sep tuah gata abang
Saleh gata keumeung mate
Narit singke sang binatang

Meunyo galak teubiet nyawong
He nyak bungong teubiet u blang
Mangat taturi sane meuganong
Cuba tamong u padang prang

Meunyo galak gaduh keurajeuen
Teubiet u leuen wahe abang
Meuhan tamuprang beudoh jak woe
Bek le sinoe le habaran

'oh nan tamat haba surat
Ka neulipat jok bak bujang
Bujang beudoh teubiet leugat
Troh siat bak kuta di blang

Jok bak raja pantah leugat
Neuploh lipat le neupandang
Ban raja eu haba surat
Amarah that Geunta Alam

Peue kaduek lom he peutua
Teubiet sigra u padang prang
Jiteubiet le dum pahlawan
Guda kandran gajah unta

Uleebalang deungon rakyat
Teubiet leugat dum bentara
Troph u mideuen dumna rakyat
Jideumpek that ngon meutaga

Cut Usman ngieng u padang
Neukheun rijang bak kakanda
Bak syeedara raja nam droe
Neukheun meunoe pantah sigra

He kakanda Raja Pari
Hukom neubri dum panglima
Neuyue teubiet dum u padang
Jak lawan prang musoh teuka

Rakyat le that lon eu di blang
Teubiet rijang bek lam kuta
Raja nom droe suroh rakyat
Teubiet leugat tajak ngaza

Rakyat teubiet dum meuron-ron
Ban bakat tren di kuala
Raja nam droe teubiet sajan
Guda kandran le that rupa

Diwa Sang Syarep Raja Pari
Lhee droe lagi Sulutan Usma
Rakna Syahi nyang adoe nyan
Abeh bannam teubiet ngaza

Po Cut Usman neukheun meuceh
Bak Sang Syarep meunoe haba
Diwa tinggai sajan kamoe
Bak uroe nyoe bek tangaza

**Sang Syarep deungo haba meunan
Tinggai yoh nyan dalam kuta
Seubab Diwa that budiman
Seubab gop nyan le bicara**

**Jampang bicah ureueng muprang
Na soe tuan boh bicara
Diwa Sang Syarep tinggai sinan
Deungon Usman dalam kuta**

**Limong teubiet u mideuen prang
That meuguncang mideuen raja
Ngui mahkuta dum mupangkat
Rupa hebat limong raja**

**Neumupayong intan meukarang
Reumboe intan hebat han tara
Nibak jaroe peudeueng analan
Sarong intan ngon meutia**

**Rakyat deumpek rotdeh rotnoe
Sang-sang bumoe beukah dua
Meuteumeung le dua pihak
Jimeutop tak han ek kira**

**Jihei sare ngon jisurak
Nyum meuhayak langet donya
Jimeupoh-poh jimeutak-tak
Mate rusak blah keudua**

**Subhanallah prang meuhayak
Jimeulikak dum panglima
Jimeutop ngon leumbeng tumbak
Jimeuancak meuen ganja**

**Ngon peudeueng puteh mubhak-bhak
Jikacak ngon cokma raya
Ladom keunong di tangkurak
Ka teukeupak hilang nyawa**

Ka téupeuro teubiet utak
Ladom layak reuloh muka
Jeurat meulila deungon kapak
Jipeusak u teungoh laksa

Keudeh keunoe han meuirak
Mate rusak han ek kira
Nyang udep jimuprang sabé
Nyang mate ka hilang nyawa

Bumoe donya han leumah le
Bangon mise malam jula
Keudeh keunoe hana leukang
Meutunang prang he teungku ma

Jimeutop-top jimeucang-cang
Meukumang meugisa-gisa
Hana saho jitem leukang
Meugeucoh prang han ek publa

Ladom mate nyawong hilang
Ladom mandang rusak saja
Darah ile ban ie kubang
Ka mirah blang ban keusumba

Ladom bingong ulee mumang
Jibangkang ngon peudeueng raya
Pahlawan nyang kuat kuat
Jilumpat u teungoh laksa

Tunong baroh timu barat
Jilumpat pahlawan raja
Surak deumpek bangon bakat
Riöh sangat dum peutna

Hana teudohpi meusiat
Sang kiamat meunan rasa
Sang meugo-go sang meugop-gop
Ka jisagop asap cokma

Seupot seupeuet beudoh sagop
Ka jitop le asap lila
Neutajo le Raja Pari
Beungeh sang ri uleue bisa

Sulotan Usma neubeudoh le
Ka neunari dalam laksa
Dalam laksa ka neutiek droe
Meusoe-gumoe ngon rakyat bha

Neucang rakyat that meukeupong
Ulee puntong takue ngon pha
Mate reubah dum meutamon
Tamse bangon naleuen sira

Dum pahlawan meugah meugak
Abeh reubah dum meutimpa
Meunyum tiwah ureueng landang
Jiplueng rijang woe lam kuta

Tantra riwang abeh bicah
Raja marah hu ngon mata
Pakon gata dum tariwang
Panglima prang ngon bentara

Teuma seuot dumna rakyat
That meukrat kamoe dumna
Lon eu limong droe pahlawan
Gagah tuan hana ngon sa

Jicang rakyat that barollah
Han ek peugah boh had hingga
Pantah miseue kilat barat
Jicang rakyat han soe hingga

Banlimong droe tamse kilat
Abeh rakyat dum seureupha
Hana meujan deuh tapandang
Putoh reukueng takue ngon pha

**'oh takalon mantong jarak
Han jan meugrak troh u muka
Tamse bade angen ribot
Hana bacut ate lia**

**Han jan tangieng tajam leupah
Ban siwah jisama kadra
Han ek lon theun po junjongan
Kamoe riwang siklep mata**

**Lon teubiet lom po junjongan
Beuthat jicang ulon rela
Beuthat raya deungon tungang
Han lon pantang po meukuta**

**Meunyo hana lon cok putroe
Hareuem nanggroe han lon gisa
Di tuanku neuduek keudroe
Na buet kamoe teubiet ngaza**

**Ban raja deungo narit meunan
Raja yoh nyan ate suka
Jiteubiet le dumna rakyat
Meuntroe meugat ngon bentara**

**Ladom pasang guda tanji
Meuntroe wadi ngon panglima
Ladom payong meuceuradi
Jipeunari dum peutua**

**Ladom pasang atueuh gajah
Puteh mirah kandran raja
Ngon mahkuta le that pangkat
Teubiet leugat dum panglima**

**Ngon pakaian macam-macam
Keumba lapan le wareuna
Raja raja payong intan
Uleebalang nyang meunama**

Jipeh tambo deungon geundrang
Dum bunyian meusuara
Jiyup suleng deungon gambang
Jipeuek prang that bak nyang ka

Surak deumpek bonyoe kiam
Dalam padang that jimeutha
Deumpek surak that meuguncang
Nyum sang karam mideuen raja

Ureueng jamee that gurantang
Dum pahlawan teuga teuga
Lheueh le beude ngon meuriam
Kuta reuntang dum seureupha

Amma bakdu jagong reuboh
'oh tapajoh seungam bangoe
Jinoe beudoh puteh leusoh
Seumeuloh ban matauroe

Jipeugah le bak panglima
Musoh ka na le meukatoe
Jiteubiet le raja limong
That meukeunong troh lam uroe

Cut Usman tingkrom gaki
Teubiet pari dum sinaroe
Raja Pari dalam paya
Ban keulua jibet jaroe

Teudong di keue Cut Usman
Yoh masa nyan jikheun meunoe
Pakon tuan neupangge lon
Ho neusuron bak uroe nyoe

Patbu nanggroe hana wase
Toh siri gle han troh keunoe
Patbu gampong nyang meusugang
Toh siri prang pangge lon nyoe

Cut Usman seuot sigra
Ka na banya lon siseun nyoe
Lon syeedara ka roh lam prang
Gaseh sayang keu lon sidroe

Syeedara han kawom lon tan
Aneuk dagang jeuoh nanggroe
Meukon gata nyang ngieng hamba
Laen hana baranggasoe

Jen pari deungo haba meunan
Jikheun rijang meunoe bagoe
Insya Allah jikheun rijang
Meunyo bak prang suka kamoe

Pat jinoe tuanku lawan
Jehpat di blang that meukatoe
Rakyat le that sarat padang
Di mideuen prang hana bagoe

Amma bakdu nyoe nyang cakap
Maken mangat nibak nyang ka
Ban jideungo sabda meunan
Deumpek rijang pari diwa

Jiteubiet le dum meuree-ree
Ban on kayee dalam rimba
Rakyatpi le that barollah
Guda gajah jipoh lawa

Pahlawan le tamse jeundrang
Hitam padang mideuen raja
Dum rakyat nyan bangsa mambang
Jibet tangan ateueh raja

Pakon kamoe tapanggekan
Neukheun rijang po meukuta
Bek trep kamoe dalam padang
Meunyo na prang lon jak ngaza

Neupeuleumah musoh datang
Dum sibarang ate suka
Raja Pari seuot rijang
Tamasok prang dumna gata

Cut Usman ka gop jak prang
Jeh lam padang musoh ka na
'oh jideungo sabda meunan
Beudoh yoh nyan pantah sigra

Jiteubiet le u mideuen prang
That guransang pari diwa
Surak deumpek han soe tukri
Teumakot gli musoh teuka

Cokma peudeueng dum jisandang
Mukaji ban tabak raya
Mata mirah hu sang apui
Musoh teukui pandang rupa

Dalam padang dum jilumpat
Jimita pat musoh teuka
'oh jideumpek na ban guroh
U jeuoh sang geumpa raya

Ateueh singa ladom pasang
Nyang pahlawan ateueh naga
Ngon pakaian le that macam
Mirah hitam le wareuna

Ngon mahkuta nam blah pangkat
Rupa hebat miseue singa
Jipalee gong deungon geundrang
Bangsi gambang ngon nukara

Dum pahlawan jigrop lumpat
Teubiet leugat u mideuen raja
'oh sare troh u padang prang
Deumpek rijang meutaga-taga

Rotdeh deumpek rotnoe surak
Ka meurumpak dua tantra
Raja limong sapeng-sapeng
Manok bireng ngon keulantam

Rakyat muprang that lam kabot
Ban leuke meulet di cong asan
Keudeh keunoe tan meusurot
Got that patot jimeuhantam

Rakyat mate that mubalak
Nyang rusak han ek tabilang
Nyang udep sabé jimeutak
Prang meugunjak hana macam

Pari kalon prang han tiwah
Jicok pantah le ngon peudang
Dalam tantra tamong leupah
Jicang pantah musoh datang

Raja nam droe blah rot barat
Neucang leugat ureueng landang
U timu sigo neulumpat
U barat sigo neuriwang

Tantra musoh le that mate
Meugule sinan teulintang
Raja Pari jicang sabé
Musoh reule muka masam

'oh jikalon Raja Pari
Ka jituri that guransang
Dalam ate ka meunyum gli
Le nyang lari u beulakang

Pari deumpek that kuasa
Rakyat bena abeh simpan
U timu sigo neugisa
Di pari ka sikhan kawan

Jideumpek le pari diwa
Ka jeuet naga dalam padang
Ube gunong badan raya
Ka jiseuba tantra datang

Gigoe panyang lhee ploh deupa
Babah raya na ube blang
Tantra le that ka jiseuba
Beungeh raya Geunta Alam

Geunta Alam teupok jaroe
Naga pindoe gadoh hilang
Mangat ate dumna rakyat
Ho maken that lom jimeucang

Rakyat seuu nibak nyang ka
Han le naga mate simpan
Jimuprang lom nibak nyang ka
Jiek lanja keunan curam

Raja limong han peue kira
Neucang lanja ureueng datang
Tantra musoh le that mate
Teutiek bangke sang timon phang

Ho jipeunap abeh reula
Le that mate rakyat simpan
Jimuprang lom nibak nyang ka
Jiek lanja keunan curam

Raja limong han peue kira
Neucang lanja ureueng datang
Tantra musoh le that mate
Rab han ek le nibak nyum sang

Darah ile ban ie raya
Hana reuda laju neucang
Hana ek le dum jimeutha
Jiplueng sigra dum jiriwang

Jikeumeung lop dalam kuta
Pari diwa ka troh keunan
Raja limong ka neukeupong
Ka puntong takue neureupang

Keudeh keunoe meusong-abong
Ka neukeupong kuta di blang
Rakyat bunoe abeh jiplueng
Lam uteuen ladom jibungkam

Ladom meusom bak bineh krueng
Ladom lam lueng sinan diam
Raja Pari beungeh raya
Bak kuta keunan jiriwang

Raja limong that seutia
Neukeupong lanja keunan curam
U pinto ka neupeuteupat
Neukarat miseue boh sungkam

Lheueh meuriam ateueh madat
Ngon su nubat that geumeuntam
Geunta Alam beungeh that hu
Tanoh laju cok sireugam

Dalam mideuen ka jisrom le
Jeuet keu rante dalam padang
Rante le that dum meuhue-hue
Bak takue meucuet le rijang

Bandum ureueng ka jeuet keu bue
Hana sapeue teubiet kalam
Raja limong bandum sapat
Raya that rante meujantang

Laen pari deungon rakyat
Ka meuikat di teungoh blang
Kon le rupa manusia
Bandum rupa sang binatang

Miseue bangon lutong ngon' kra
Rakyat banta seukalian
Dum teuduek-duek hana haña
Alam Geunta po saktian

Ka peunoh blang dum rakyat bha
Rante raya meujeureukhang
'oh lheueh jiboh dum hekeumat
Tamong leugat kuta dalam

Tantra Usman ka meuikat
Jilihat taloe meujantang
Ka lagee bue rupa rakyat
Galakji that Geunta Alam

Raja Pari deungon rakyat
Ka lam ikat dalam padang
Ladom jeuet bue meunan rupa
Kameng rusa lumo agam

Jipeulagee rupa-rupa
Seungap haba 'oh nan kalam
Amma bakdu Allah he teungku
Bungong meulu lon peuriwang

Neudeungo cokma su ka teudoh
Ka putoh hana le kiam
Neubeudoh le puteh leusoh
Neuteubiet troh pinto dalam

Ka neukheun bak putroe areh
Teubiet keudeh peunyatakan
Pakon seungap hana bunyoe
Rotdeh rotnoe seungap diam

Sang Syarep jak yoh nyan leugat
Treh bak teumpat lam padang prang
Jikalon bue dum meuikat
Bandum meuhad taloe meujantang

**U likot neuriwang pantah
Neujak peugah ubak Usman
'oh troh keunan neukheun laju
Ka ulon eu meunoe macam**

**Lon kalon bue sinan le that
Ka meuikat dum di padang
Nibak takue taloe meuhad
Nyang rakyat meusidroepi tan**

**'ajab ate raja indah
Tungkat pantah neucok rijang
Cut Usman neutiek tungkat
Neumeuhajat bak eelia**

**Ka neuglong le atueh bumoe
Teubiet sidroe aneuk raja
Rupa hebat that samlakoe
Bak jaroe na beude ganja**

**Geunta Sukma nan geuuroh
Ngon rupa jroh sakti raya
Geunta Sukma jibet jaroe
Bak samlakoe Raja Muda**

**Pakon tuanku neupangge kamoe
Bak uroe nyoe han tom nyang ka
Cut Usman seuot meunoe
Lon uroe nyoe ka na bala**

**Rakyat geutanyoe ka meuikat
Tulong siat he syeedara
Dalam padang dum meuikat
Rante bulat bak angeeta**

**Ban jideungo sabda meunan
Beungehji ban uleue bisa
Jibeudoh le uleue seudong
Jibet sion bulee mata**

Jijampu ngon bulee idong
Ka jilambong dalam hawa
Jitren ujeuen deungon guroh
Abeh putoh rante bema

Rakyat puleh tamse puroe
Badan muwoe miseue nyang ka
Rakyat beudoh bandum sare
Tan le rante bak angeeta

Geunta Sukma srom hekeumat
Teuka leugat saboh bala
Teuka reudok that meukeupong
Ka jigulong tantra teuka

Tantra musoh sret lam laot
Taeu hanyot lam ie raya
Rakyat sosah dalam laot
Buet ribot Cut Geunta Sukma

Le that rakyat mate lupot
Dalam laot that seungsara
Seungap mideuen hana le prang
Rakyat hilang han meuho ka

Geunta Sukma ka jiriwang
Kuta alam woe bak raja
Troph bak raja jikheun rijang
Abeh karam tantra teuka

Tantra musoh Geunta Alam
Abeh peujam u laot raya
Cut Usman seuot pantah
Insya Allah he syeedara

Geunta Sukma teutap sinan
Lheueh meukalam deungon raja
Lon peugah lom keudeh u blang
Geunta Alam nyang po tantra

'oh jikalon tantra hilang
Beungehji ban r imueng daya
Jibeudoh le Geunta Alam
Jicok rijang cokma raya

Jipoh laju ateueh bumoe
Tho laot nyoe jeuet keu data
Tantra karam ka jiriwang
U padang bak teumpat tantra

Geunta Alam ate mangat
Jieu rakyat tamse nyang ka
Jimuprang lom nibak dilee
Le that lagee jiboh daya

Rotdeh rotnoe jiek gunjak
Prang meuhayak nibak nyang ka
Jimupoh-poh han soe tu'oh
Leungo tanoh tamse geumpa

Geunta Sukama jiteureub ang
Jilhom rijang dalam tantra
Asap racon teubiet sinan
Abeh pangsan dum lasyeuka

Abeh reubah dum di padang
Ka seungap prang tan soe ngaza
Seungap bunyoe han le kiam
Tan le urang safan-safa

Geunta Sukma ka jiriwang
U padang lam kuta raja
Beude ganja nibak jaroe
Leugat jiwoe dalam kuta

'oh troh keunan jibet jaroe
Jikheun meunoe pantah sigra
Tuanku rakyat abeh pangsan
Dalam padang mideuen raja

Rakyat musoh Geunta Alam
Abeḥ karam po meukuta
'oh lheueh pangsan dumna rakyat
Lon woe leugat keunoe hamba

Di likot lon saleh pakri
Ampon doli han troh duga
Cut Usman seuot pantah
Bu meutuah dumna gata

Geunta Sukma teutap sinan
Lon peuriwang musoh teuka
Geunta Alam duek ngon wadi
Jideungo han le ureueng ngaza

Mideuen seungap hana le prang
Ureueng pangsan jideungo haba
Jibeudoh le Geunta Alam
Teubiet rijang u lua kuta

Jideumpek le sigo nyang that
Puleh rakyat dum lasyeuka
Rakyat pangsan abeh puleh
Nibak teueh beudoh sigra

Rakyat beudoh nibak pangsan
Jikheun rijang musoh hoka
Jipeukek prang deumpек surak
Rakyat galak nibak nyang ka

Tantra musoh that guransang
Sang nyum karam mideuen raja
Raja Pari teubiet leugat
Deungon rakyat balatantra

Rakyat teubiet dum u mideuen
Ladom peudeueng ladom cokma
Raja raja cong guda plang
Uleebalang ateueh unta

Ateueh singa ladom pasang
Ladom tuan ateueh naga
Surak deumpek karam mideuen
Ka meuteumeung dua tantra

Jimupoh-poh jimeutak-tak
Mate rusak dum panglima
Yoh nyan geuprang guransang that
Mate rakyat han ek kira

Rusak mate han ek peugah
Ile darah ban ie raya
Geunta Alam raja sakti
Jiteubiet le jak peunyata

Jikalon prang hana lagee
Tiwah sukee raja teuka
Jideumpek le sigo nyang that
Angen leugat keunan teuka

Ka jibapot Usman Basyah
Troh leupah u lua kuta
Bandum rakyat abeh reubah
Sayang leupah dumna tantra

Jinoe lon boh amma bakdu
Ate seuu dum pahlawan
Rakyat ranap tamse tika
Alam Geunta that analan

Kajisurak that meutaga
Siblah tantra Geunta Alam
Rakyat Usman dum ka mate
Mangat ate musoh datang

Jisurak ngon jihei sare
Jipubeude hana reunggang
Yoh masa nyan Raja Muda
U lua kuta ka meulayang

Jibapot le angen raya
Raja Muda ingat rijang
Cut Usman lambong mintra
Angen raya meukhap hilang

Angen teudoh han le goga
Yoh nyan raja ka neuriwang
'oh troh keunan bungong pade
Neueu han le dumna rakan

Neubeuet do'a dalam ate
Nyang ka mate puleh rijang
Jibeudoh le ka jilikak
Leumbeng kapak jicok rijang

Ateueh musoh le jilumpat
Jicang rakyat han soe tuban
Cut Usman neusrom tungkat
Ateueh rakyat Geunta Alam

Grak teukeudi bak halarat
Timoh leugat naleueng pisang
Rakyat pari ate galak
Taeu jitak seun-seun lapan

Le that mate nyawong fana
Jimeuhei ma that sukaran
Geunta Alam beungeh raya
Mirah muka hana macam

Jideumpek le that meutaga
Sang jeuet geumpa dalam padang
Saboh kameng sinan ka jeuet
Naleueng jirot abeh simpan

Kameng raya that geureulot
Ngon siat naleueng ka simpan
Muwoe padang tamse dilee
Beudoh sukee musoh datang

Ka jisurak that meuree-ree
Sang-sang malee po Cut Usman
Neucok keureutah dalam bajee
Neulipat lhee rijang-rijang

Dalam padang neusrom mupree
Jeuet le lagee rimueng agam
Jidrop kameng ka jiputa
Jigeulawa dalam awan

'oh lheueh mate kameng pindoe
Jipeutoe bak rakyat datang
Jiwiet takue seun-seun sidroe
Ka sampoe nyawong dum simpan

Surak deumpek that meutaga
Siblah Raja Cut Usman
Geunta Alam raja raya
Jimintrab saboh saktian

Jeuet le rante miseue cintra
Rimueng raya roh u dalam
Jimeulawan hana daya
Beusoe dumna ka meureughang

Teutap rimueng dalam cintra
Lom jimintrab Geunta Alam
Jimintrab saboh hekeumat
Trob le siat ujeuen datang

Ujeuen raya sangat leubat
Keunong rakyat Cut Usman
'oh tee keunong gatai raya
Jiek bisa ban jeulatang

Rakyat nanggroe sangat sosah
Apoh-apah meugriet han ban
Ujeuen raya han peue peugah
Gatai leupah leukuep han ban

Tantra datang khem teurtawa
Nyan karasa he binatang
Pakon krot di kah muka
Meunyan bala peue sosahan

Meunan jikheun narit timplak
Ngonjisurak hana macam
Ngonjigrop jilikak-likak
Musoh galak that guransang

Ban Usman eu meunan rupa
Ka mubala dumna rakan
Usman beuet le saboh mintra
Ujeuen raya yoh nyan pirang

Nibak rakyat puleh bisa
Miseue nyang ka lom guransang
Jimeucang lom miseue dilee
Jiproh ulee musoh datang

Seun-seun siploh rakyat padee
Musoh asee rab ka simpan
Cut Usman that eelia
Ka neubaca ismu alam

Neucok tanoh saboh leua
Neusrom lanja dalam padang
Na sikeujap yo nyan teuka
Laot raya ka meureuntang

Siblah padang musoh teuka
Ngonriyek ka meugeulumbang
Tantra musoh ka lam laot
Keunan ka sret seukalian

Deungon riyek that mupalot
Deungon laot that geumeuntam
Meulangue-langue keudeh keunoe
Lam laot nyoe muwoe ulang

Ladom buhuek umu sampie
Nyang ladom nyoe meuhue ulang
'oh jilangue ubak bineh
Musoh teupreh ka meureuntang

Soe troh keunan laju jitak
Bak tangkurak laju jicang
Peue buet keunoe di kah kajak
Ka jitulak lam ie tajam

Bahle sinan kah lam laot
Mita eungkot keu sulutan
Bek rab keunoe got kasurot
Lam laot sinan ka diam

Meunan jikheun dum sinaroe
Narit bunoe ka jipulang
Rakyat musoh ka meuloe-loe
Le that sampie nyawong hilang

Geunta Alam ka teukeujot
Jieu laot ka meureuntang
Jideumpek le ngon lam kabot
Sang-sang beusot bumoe alam

Jipoh deungon cokma beusoe
Laot ka doe jeuet keu padang
Rakyat puleh lom ka muwoe
Tamse baroe lom jimeucang

Geunta Alam that amarah
Cumboi pantah buka rijang
'oh jibuka cumboi indah
Teubiet pantah saboh kumbang

Ka jiteubiet kumbang hijo
Buleeji hu jroh analan
Jiteureubang yoh nyan laju
Ka jilalu dalam padang

Kumbang jipo meugisa-gisa
Gunong raya ka meureuntang
Han padum trep lama masa
Gunong mintra seukalian

Roh u dalam rakyat raja
Panglima ngon uleebalang
Kuta kuta ngon meuligoe
Sinaroe ka roh u dalam

Kumbang hijo ka jipeutoe
Bak samlakoe keunan datang
Jisrom batee ateueh raja
Po jroh rupa akai hilang

Cut Usman ka mupaloe
Bukon rugoe raja seudang
Han le ingat dalam dada
Teudong saja tahe mandang

Hana reubah po samlakoe
Teudong keudroe jroh that reumbang
Han le mumet gaki jaroe
Sang bagoe nyawong ka hilang

Na sikeujap raja layee
Musoh asee lom jimeucang
Jeuet keu apui gunong raya
Hu meunyala troh lam awan

Ngon suara that meutaga
Rakyat banta roh u dalam
Apui hu nyan jijak leugat
Jirapat keunan bak kawan

Yoh masa nyan dumna rakyat
Teukeujot that leungo badan
Jieu apui hu meunyala
Ban seulingka ka meureuntang

Dumna rakyat abeh subra
Apui raya jikalon ban
Ngon seuuem that hana tara
Rakyat raja sosah han ban

Gohлом tutong bak angeeta
Ngon pcungaba that sukaran
Apui jijak keunan laju
Meu 'u-'u tadeungo kiam

Ngon asap peunoh meutabu
Apui that hu ngon geumeuntam
Dumna rakyat jimoer rugha
Geunta Sukma troh le datang

'oh troh keunan dalam kuta
Jieu raja dalam padang
Jieu teudeng sang geupula
Apui lingka tutong badan

Geunta Sukma jideumpek that
Ujeuen leugat troh le datang
Sret di manyang ban ie raya
Dum lasyeuka puleh badan

Apupi len han jan siat
Ngon beureukat seugala alam
Cut Usman muwoe ingat
Ngon keuramat seukalian

Jimuprang lom dumna rakyat
Jikarat bak musoh datang
Yoh nyan ka prang that bak nyang ka
Sang-sang donya keumeung karam

Raja limong ngon Raja Pari
Hana sakri bak jimeucang
Cut Usman ka neupioh
Dalam kimah di bineh blang

Neukalon prang ate galak
Jipeusak bak musoh datang
Rakyat laen ban nyang laku
Masok laju lam padang prang

Raja Pari troh u mideuen
Nueueu ureueng peunoh padang
Raja Pari neukheun meunoe
Bak rakan droe biek edeurang

Tadong mantong dumna gata
Lon jak mita meuntroe suang
Raja Pari jijak sidroe
Troph sampoe u dalam tantra

Ka meuhadap deungon meuntroe
Po samlakoe peurab lanja
Jitanyong le namateu soe
Pane nanggroe ho tahala

Raja Pari seuot nyoeban
Pari Mambang nama hamba
Nyang poh musoh keunoe datang
Nak tatuban uleh gata

Ban jideungo haba meunan
Beungeh han ban hu ngon mata
Jieu rakyat le that simpan
Di meuntroe nyan beungeh raya

Jideumpek le that geumeuntam
Jeuet le angen bade raya
Ka jigulong Pari Mambang
Drum sibarang meugrak hana

Dum bak kayee abeh simpan
Patah meukhan dum seureupha
Kuta kuta rab teureuban
Dumna rakan pucat muka

Raja Pari yoh masa nyan
Neubeuet rijang saboh mintra
Na sikeujap teuma lheueh nyan
Angen hilang han le goga

Angen teudoh ka trang-bandrang
Uroe ka trang tarek raya
Jibleut uroe tarek leupah
Sangat sosah tantra teuka

Tutong leupah rakyat kiroh
Teubiet reuoh lam lam mata
Han jituho jak som tuboh
Puteh leusoh khem teurtawa

Ban jikalon uluh meuntroe
Po samlakoe teukhem saja
Beungeh raya teuku meuntroe
Tungkat di jaroe jisrom lanja

Na sikeujap teuma lheueh nyan
Jitren ujeuen sang ie raya
Ujeuen raya deungon tupeuen
Dumna rueueng pucat muka

Rakyat pari abeh sosah
Sijuek leupah ujeuen raya
Ngon ie raya sangat boboh
Sang ka sudah peunoh kuta

Bubong meuligoe abeh beusot
Dumnankeu sret ujeuen raya
Rakyat lam kuta that teumakot
Bandum lucot masam muka

Raja Pari kalon meunan
Ismu alam jibeuet sigra
'oh lheueh jibeuet ismu alam
Ujeuen pirang tho ie raya

Raja Pari beuet hekeumat
Jeuet le leugat limpeuen ngon kala
Abeh jikap ureueng.landang
Bukon sayang sangat bisa

Ladom jikap nibak gaki
Siteungoh ri jikap muka
Nyang paleh that jikap bak bibi
Klik meu 'i-'i sang bui luka

Ladom jikap nibak jaroe
Hana bagoe meugriet raya
Nyang saket that bak keumiroe
Sang bagoe nyawong keulua

Di geumeuto jikap bak idong
Limpeuen seudong jikap bak pha
Rakyat dum klik deungon ranggong
Lakee tulong dumna tantra

Jikap keunoe sampoh keudeh
Binatang paleh saket raya
Surak deumpek that meu 'u-'u
Ate seuu pari diwa

Soe meuteumeung jipoh laju
Jieumpu di muka-muka
Hana jeuet le jimeulawan
Tantra nyan laloe ngon bisa

Cut Usman khem teusinyom
Neueu peurasan rakyat teuka
Teuku meuntroe beungehji that
Jieu rakyat dum binasa

Han jeuet sidroe le meulawan
Dong teuceungang mantong saja
Geunta Alam saket ate
Jicinta le saboh mintra

Ngon sikeujap limpeuen han le
Abeh mate safan-safa
Bisa puleh dum bak rakan
Muwoe badan miseue nyang ka

Jimarit le meuntroe meugah
Beungeh leupah hana ngon sa
Wahe pari nyang that gagah
Uroe nyoe sah kuthee gata

Meukek katheun cokma kamoe
Kuthee kah nyoe that kuasa
Laju jibet cokma beusoe
Ka jiseudoe di keupala

Raja Pari neugrop tanggoe
Lam bumoe meutanom cokma
Ban jikalon meuntroe asee
Bungong keumbee hana fana

Jicok cumboi dalam bajee
Jisrom meupree u antara
Meuntroe paleh utoh sihe
Jeuet keu rante cumboi meutia

Jipeurab bak bungong pade
Mupalet le bak angeeta
Raja Pari gundah pike
Hana jeuet le ingat mintra

Teudong mantong bungong pade
Deungon rante ka meusingkla
Troph le keunan Meuntroe Meugah
Laknat Allah si ceulaka

Jipruh angen dalam babah
Jeuet le pantah keu geureuda
Ka jisama Raja Pari
Jipo u gle gunong raya

Troh u gunong keunan sampie
Geureuda nyoe jeuet keu naga
Raja Pari ji'uet laju
Bungong meulu sayang raya

Lam pruet naga Raja Pari
Ka teukeudi keunong bala
Nyoe lon seubot Meuntroe Meugah
Galak leupah ate suka

Galak raya Meuntroe Meugah
Khem meuhah-hah leubeh gura
Raja Pari mate sudah
Jipeugah laju bak raja

Jihei rakyat dum jipangge
Jiyue ek le u bineh kuta
'oh jideumpek tamse bakat
Le that rakyat musoh teuka

Ubak kuta dum jirapat
Rab troh jimat pageue kuta
Jipubeude miseue ujeuen
Bangon tupeuen beude raya

Su meuriang jareueng jareueng
Sang geuampeueng jamee teuka
Asap beude sang ka seupot
Meusagop ngon asap lila

Hingga teubiet Geunta Alam
Ngon angkatan le that jiba
Jideungo han le Pari Mambang
Ka jisimpan le geureuda

Mangat ate Geunta Alam
Jiek curam bineh kuta
Kaek laju he rakan droe
Kacok putroe keunoe kaba

Peue katakot lom he teelan
Pari Mambang ka binasa
Dalam kuta kaek rijang
Kabet pacang deungon suda

Ngon jisurak han pêue pike
Sang ka reule bumoe donya
Taeu jiek jipeudap-dap
Ka troh jimat pageue kuta

Sira jikheun narit meunoe
Ho lheueh ka nyoe he ceulaka
Cut Usman di meuligoe
Deungon Putroe Meurak muda

Neutren laju po samlakoe
Mat bak jaroe tungkat cokma
Neueu musoh le that ka doe
Glong bak bumoe tungkat sigra

Tungkat neuglong nibah bumoe
Teubiet sidroe aneuk raja
Geunta Sukma teubiet sidroe
Jibet jaroe di jeumala

Peue tuanku nyang that sosah
Cuba peugah po meukuta
Cut Usman neukheun leugat
Le that rakyat jeh di lua

Pageue kuta ka troh jimat
Tulong siat uleh gata
Raja Paripi hana le
U dalam gle ka naga ba

Gaseh sayang bu meusampe
Saleh mate Pari Diwa
Geunta Sukma deungo meunan
Yoh masa nyan beungeh raya

Laju jisrom saboh tungkat
Dalam rakyat musoh teuka
Jeuet keu naga teuma leugat
Ji'uet rakyat bansineuna

Abeh ji 'uet dum kafilah
Meuntroe Meugah beungeh raya
Jieu naga raya leupah
Tantra bicah dum sineuna

Meuntroe beuet le saboh hekeumat
Ka jiingat le ngon mintra
Jitiek tanoh saboh reugam
Naga hitam tan binasa

Ji'uet rakyat Geunta Alam
Jisimpan hana ban publa
Rakyat jiplueng dum jiboh droe
Ka meuloe-loe han le mintra

Ka jisurot riwang pantah
Jipeusiblah badan raya
Gadoh pike Meuntroe Meugah
Allah Allah kheun han reuda

Rakyat jiplueng dum sinaroe
Kisah muwoe Geunta Sukma
Lheueh jikeubak naga di blang
Pari Mambang jijak mita

Dalam gunong jiteureubang
Leumah sinan saboh naga
Naga teueh meunan teudu
Peurab laju keunan sigra

'oh troh keunan ka jimeusu
Sang beureugu kapai raya
Geunta Sukma deumpek rijang
Ka meuguncang gunong raya

Yoh nyān naga pangsan laju
Jideungo su that meutaga
Geunta Sukma jicok kayee
Naga asee jipoh lanja

Keunong jipoh nibak ulee
Naga layee mate fana
Geunta Sukma beuet hekeumat
Teubiet lam pruet Pari Diwa

Teubiet Pari lam pruet uleue
Hana sapeu na binasa
Raja Pari mantong pangsan
Pari Mambang ingat hana

Geunta Sukma meunyum sayang
Jibeuet rijang deungon do'a
Raja Pari muwoe ingat
Beudoh leugat pantah sigra

Geunta Sukma jieu sinan
Jikheun nyoeban Pari Diwa
Pari kheun le meutuah that
Wahe sahabat tulong hamba

Geunta Sukma kheun lom rijang
Beudoh riwang tajak gisa
Yoh masa nyan Pari Mambang
Neutren u blang le bandua

Naga bunoe nyang analan
Teungoh simpan dumna tantra
Geunta Sukma peurab keunan
Jibet tangan ubak naga

Naga raya jeuet keu tungkat
Jicok leugat pantah sigra
Geunta Sukma jiwoe leugat
Han jan siat han meuho ka

Rakyat Usman ate girang
Watee riwang Pari Diwa
Mangat ate dum sibarang
'oh woe Mambang bandum suka

Ka jisurot rakyat lam blang
Meuguncang ba siseun lingka
Ka jiteubiet lom u padang
Peh ngon geundrang dan nukara

Raja Pari bak masa nyan
Neujak keunan dalam tantra
Neujak mita Meuntroe Meugah
Beungeh leupah hana tara

Soe meuteumeung ka neuheumpah
Ajai sudah hilang nyawa
Meusidroe han jeuet meusinggah
Rakyat neupoh le that fana

Ho neupeukeue abeh ranap
Ho neupeunap peungeuh rata
Raja limongpi jikarat
Jicang leugat hana tara

Tantra musoh le that mate
Teutiek bangke meukeuba-keuba
Jisurak ngon jihei sare
That beureuhi Pari Diwa

Teuma jiplueng tantra bicah
Jicok langkah ka jiguda
Hingga teubiet Meuntroe Meugah
Jieu kafilah ka meugisa

Teuma laju meunoe jikheun
Pakon ka plueng he ceulaka
Rakyat seuot jikheun nyoeban
Pari Mambang ka meugisa

Jehpat jinoe dalam padang
Han ek lawan kamoe dumna
Ban meuntroe deungo Pari kawoe
Teuku meuntroe beungeh raya

Jitajo le jikap jaroe
Ngon samlakoe meuhadap ka
'oh troh keunan ka meuhadap
Pari peurab keunan sigra

Meuntroe Meugahpi jikarat
Jilumpat atueh Pari Diwa
Jideumpek le that meuguncang
Pari Mambang hana geunta

Raja Pari kheun le meunoe
Wahe meuntroe nyang ceulaka
Cuba tajo laju keunoe
Gata sidroe meugah raya

Mangat meuri Meuntroe Meugah
Tajo pantah keunoe sigra
Meuntroe Meugah teuma seuot
Jipeukeujot Pari Diwa

Mantong kadong han kasurot
Yoh goh lupot hilang nyawa
Ban jideungo haba meunan
Pari Mambang khem teurtawa

Pakon meunan tuto meuntroe
Tasangka droe teuga raya
Sang meugata nyang na ragoe
Baranggasoe lheueh keu gata

Insya Allah tulong Rabbi
Tuhan neubri na kuasa
Raja Pari neusuet peudeueng
Neutak mupeueng di keupala

Han jipajoh meuntroe bajeueng
Patah peudeueng ka jeuet dua
Ban jikalon peudeueng patah
Khem meuhah-hah galak raya

Jisuet peudeueng meuntroe meugah
Pari indah jicang lanja
Raja pari neubet langkat
Peudeueng leupah han mumara

Raja Pari bungong keumbee
Meuntroe asee neupoh lanja
Nibak keuieng neudrop mupru
Mita laku neumeung puta

Meuntroe Meugah neumeung sampon
Leungoji han si ceulaka
Miseue bumoe meunan that kong
Jih teudong miseue geupula

Meuntroe Meugah jikheun meunoe
Bek ngon kamoe tameuseunda
Kupoh mate kah uroe nyoe
Kucok Putroe Meurak muda

Raja Pari ka bicah phet
Tuto saket ka jibuka
Ka neutajo bungong riwat
Neutop leugat teuntang dada

Neutop di pruet beusot u rueng
Meuntroe bajeueng abeh nyawa
Reubah sinan le di mideuen
Seulinteueng sinan teurhanta

Kakeu mate Meuntroe Meugah
Abeh tuah han le teuga
Napsu han troh jihpi mate
Tuhan Rabbi han neurela

Peurumoh gop galak leupah
Abeh langkah si ceulaka
Beu taingat baranggasoe
Aduen adoe teungku apa

Han neulurong uleh Tuhan
Beuthat tuan pangkat raya
Meunan adoe narit nyang sah
Ulon peugah nibak gata

Phon di timu bah di barat
Birem meuhad sideh di Langsa
Beu tapateh ban lon peugah
Teuka tuah ngon bahgia

Beuthat raja beuthat toke
Bek meuate nyang kon jeumba
Han tapateh areuta rugoe
Abeh droe droe deungon nyawa

Meuntroe mate teuduek siat
Lon riwayat dum lasyeuka
Ban jikalon meuntroe reubah
Rakyat barollah hudom lingka

Jikeumeung cok Meuntroe Meugah
Jiek pantah dum seureungga
'oh troh keunan ubak meuntroe
Pari meunoe le beurkata

Kaplueng bandum jakleh kawoe
Bek kuseudoe di keupala
Laju neudrop limong nam droe
Bak bumoe neusumpom lanja

Ladom neusrom dalam kawan
Ka teureuban hilang nyawa
Soe meuteumeung di hadapan
Neusimpan han jan jihei ma

Han ek theun le dumna rakyat
Jiplueng leugat ka jig da
Rakyat Pari seutot laju
Jieumpu di mata mata

Sayangteu that soe nyang na eu
Ladom teungku ka patah pha
Jiplueng laju keudeh leugat
Sayang rakyat patah luka

Lam kuta jitamong leugat
Dumna rakyat neuyue gisa
Dumna rakyat jiwoe rijang
Peh ngon geundrang han ek kira

Raja Paripi woe sajan
Tamong rijang dalam kuta
Troph lam kuta dumna rakyat
Beudoh leugat Raja Muda

Cut Usman tajo rijang
Pari Mamhang peumulia
Wahe dalam bungong karang
Ka neuriwang he kakanda

Adat han le gata abang
Lonpi bak sang meuhad fana
Raja Pari seuot pantah
Bek tagundah po meukuta

Meugoh mate nyawong sudah
Saja leupah nibak banya
Raja Pari teutap sinan
Rakyat sajan ngon lasyeuka

IV. RAJA SYARWAN BANTU USMAN BASYAH

Amma bakdu alen macam
Geunta Alam lon calitra
Sosahji that Geunta Alam
Kareuna prang tiwah ngaza

Jikheun ubak panglima prang
Pakri padan he peutua
Panglima kheun rijang pantah
Ampoñ di bawah po meukuta

Beu ingat that dum geutanyoe
Rakyat meukatoe di mideuen raja
Nam reutoh raja ka lon lawan
Han tom meuteumeung dumnoe kuasa

Peurkasa that ngon saktian
Pantah na ban kilat faja
Nam droe raja nyang pahlawan
Nibak ruman tangieng bida

Laen rakyat that barollah
Meulaenkan Allah thee sibeuna
Jinoe tuanku neukrah sulotan
Nyang le saktian neuyue teuka

Raja Milon nanggroe Awan
Adoe sajan Raja Lila
Keudeh ubak Geumpa Alam
Raja dalam nanggroe Miga

Beu troh bak Raja Gunong Hijo
Neuyue lalo keunoe sigra
Beu troh ubak Raja Mambang
Raja Edeurang neuyue teuka

Lom bak Raja Geunta Bumoe
Beu troh keunoe po meukuta
Lom bak Raja Gunong Mirah
Neuyue langkah rijang teuka

Beu troh ubak Raja Dangki
Nyang le sakti nibak nyang na
Lom bak Raja Kuta Intan
Seukalian keunoe teuka

Meuhana troh dum raja nyan
Po junjongan talo ngaza
Sabda raja ubak bujang
Tajak rijang jeuep-jeuep banda

Takheun beu troh keunoe rijang
Lon arat prang tapeuhaba
Ban bujang deungo sabda meunan
Jiteureubang jeuep-jeuep raja

Nam ribee raja taklok keunan
Troh le bujang jime sabda
Bujang kilat bumoe surat
Jiyue teubiet dum panglima

Kajak teubiet kah u padang
Jak ngaza prang dang troh raja
Jiteubiet le dum pahlawan
Uleebalang ngon panglima

Jipasang le cong guda plang
Dum pahlawan maseng jeumba
Sajan adi deungon juhan
Le angkatan nibak nyang ka

Raja Pari ka lon lawan
Jikheun rijang ubak tantra
Udeh teubiet dum u mideuen
Tajak ampeueng rakyat meulaksa

Rakyat le that mangat tacang
Han sret geudubang atueuh donya
Raja limong deungo meunan
Teubiet yoh nyan bandum tantra

Jicang rakyat wie ngon uneun
Ban bayeu en sama cempala
Yoh nyan geuprang sabong-meunyabong
Biram ngon seudong meuseunoh bisa

Watee meuteumeung cokma ngon peudeueng
Dalam mideuen apui meunyala
Maseng-maseng mita lawan
Le that karam dum panglima

Geumpa Sari tema tanyong
Soe he bungong nama gata
Raja Pari seuot meunoe
Nama lon nyoe Pari Diwa

Peue na taba wahe adoe
Tabri keunoe lon eu rupa
Geumpa Sari jisuet peudeueng
Jitak keunong Pari Diwa

Tan jipajoh peudeueng patah
Neutak balah sigra sigra
Keunong ulee Geumpa Sari
Reubah meugule di mideuen raja

Mate panglima neucang rakyat
Mate le that han teukira
Teungoh teungoh meutunang prang
Leumah angkatan meuribee laksa

Ka troh Raja Gunong Sarang
Dalam awan jitren u donya
Yoh masa nyan ka teudoh prang
Sebab angkatan teungoh teuka

"oh troh Raja Gunong Sarang
Tamong rijang dalam kuta
Na sikeujap pioh sinan
Leumah angkatan laen teuka

Tamse reudok nyang that hitam
Meunan macam taeu rupa
Ban sare troh le u mideuen
Tamong bandum dalam kuta

Geunta Alam that sukaan
Troh sulotan jeuep-jeuep raja
Bandum raja ka troh keunan
Teubiet yoh nyan jijak ngaza

Yoh nyan rakyat teibiet u padang
Ateueh guda plang dum pohlawa
Payong alam le that bagoe
Keutupong beusoe di keupala

Rakyat teubiet dum u mideuen
Ladom mat peudeueng ladom lila
Yoh nyan meuteumeung cokma ngon peudeueng
Di teungoh mideuen apui meunyala

Nyang di rakyat sama rakyat
Prang raya that nibak nyang ka
Teuka naga u teungoh mideuen
Han teubileueng meuribee laksa

Raja Pari that amarah
Jicok panah lom jilunta
Jeuet le cicem rajawali
Jititi u mideuen raja

Yoh masa nyan ka jiampeueng
Jitak le kleueng abeh fana
Geunta Alam kalon tiwah
Peulheueh panah yoh nyan sigra

Dalam mideuen jeuet le meurak
Jimeutak ngon siwah raja
Jipo tajam miyup manyang
'oh meuteumeung jicoh mata

Rajawali jiplueng keng-keueng
Ka meulinteueng dalam hawa
Pahlawan Miga kalon meunan
Mat bak tangan peudeueng ngon cokma

Jimeucang ngon Raja Pari
Bagoe keudidi ngon cempala
Raja Juhan peulheueh sakti
Jipo tinggi dalam hawa

Yoh masa nyan jitren ujeuen
Peunoh mideuen ngon ie raya
Abeh jiplueng bandum u gle
Keunong sakti Juhan Raja

Rakyat musoh abeh u gle
Han sidroe le dum jiguda
Raja Sarang saket ate
Seubab han le dum lasyeuka

Jipasang guda leugat u mideuen
Ka meuteumeung ngon Juhan Raja
Raja Juhan peudeueng bak tangan
Jitak yoh nyan Sarang Raja

Keunong bak ulee meusumpom le
Ka meunyum gli ate raja
Hana putoh sion bulee
Kreueh sang batee silagoina

Geunta Sukma peujeuet laot
Ka jisurot Sarang Raja
Cut Usman pangge rakyat
Beu troh siat raja raja

Ho ayahda Kuta Pirak
Beu troh neujak bak aneukda
Ho ayahda Kūta Beusoe
Beu troh keunoe ubak hamba

Ho ayahda bak Kuta Meuh
Raja di atueuh nibak nyang na
Ho ayahda Sulotan Malek
Nyang that tarek atueuh donya

Sinoe neuhei sideh neuthee
Tajam eleumee Raja Muda
Cut Usman eelia Allah
Troh le pantah peue nyang pinta

Sulotan Malek mula phon-phon
Rakyat neuhimpon seugala donya
Neuyue pangge dum pahlawan
Seureuta sajan ngon lasyeuka

Sare abeh dum meusapat
Yoh nyan beurangkat raja raja
Sulotan Malek beuet hekeumat
Neumeuhajat bak aneukda

Ngon keuramat po Cut Usman
Beu trohkeu ban pinta hamba
Neubri keunoe saboh kandran
Ngon teureubang bak aneukda

Sulotan Malek meunan lakee
Tuhan bri mee kabui pinta
Teudong kapai keunan saboh
Rupapi jroh luah raya

Turab intan deungon pudoe
Tihang sinaroe dum suasa
Ek dum rakyat seukalian
Ngon sulotan leugat bungka

Jiteureubang dalam awan
Siat peujam han meuho ka
Neubeurangkat rakyat sajan
Adi juhan ngon bentara

Kapai jipo hana pioh
Hingga le troh bak aneukda
Bandum raja jiteureubang
Ubak Usman mohon pinta

Dumna raja troh u padang
That sukaan Raja Muda
Cut Usman teubiet leugat
Bri horeumat dum ayahda

Lheueh meuteumeung mumat jaroe
Po samlakoe buka haba
Neuyue tamong dum u dalam
Raja datang baro teuka

Sulotan tamong deungon rijang
Di likot nyan laen raja
Pioh rakyat seukalian
Dum di midan lua kuta

Lheueh peujamee raja datang
Teubiet rijang neujak ngaza
Rotdeh rotnoe teubiet u blang
Meutunang prang nibak nyang kz

Surak deumpek dalam padang
Rasa nyum lham mideuen raja
Dum pahlawan hebat hebat
Jiek leugat rakyat raja

Payong intan dum bak jaroe
Taeu reumboe bandum lingka
Ngon mahkuta dum mupangkat
Rupa hebat raja raja

Taeu jijak meusong - abong
Bintang tanjong nibak dada
Surak deumpek reuloh padang
Nyum sang karam mideuen raja

Raja limong neutajo le
Sirungke ngon Pari Diwa
Jehpi hana ngon seunabe
Tamse beude han soe sangga

Han jeuet jideungo surak deumpek
Taeu jiek ban boh lila
Meuteumeung le dua pihak
Jimeutak-tak meugisa-gisa

Rotdeh leumbeng rotnoe kapak
Mate rusak ureueng lua
Raja limong rakyat jicang
Di dalam blang meugisa-gisa

Jicang rakyat hana pioh
Talo musoh plueng meuukeuba
Jipeucrok le jicang sunggoh
Jiriwang troh ubak nyang ka

Yoh nyankeu prang sangat rioh
Sang runtoh bumoe ngon donya
Rusak mate han ek peugah
Hle darah ban ie raya

Yoh nyankeu prang sabe meugah
Bandua blah timang padra
Jimeutop-top jimeutak-tak
Mate rusak hilang nyawa

Subhanallah prang meuhayak
Jimeulikak deungon cokma
Raja raja dum teupipoe
Buet jaroe limong droe raja

Ladom mate ateueh gajah
Ladom reubah ateueh guda
Tujoh uroe meutunang prang
Sang-sang karam nanggroe raja

Beungeh Raja Geunta Alam
Ingar rijang saboh mintra
Teupok jaroé ateueh bumoe
Seupot nanggroe glap-gulita

Lam seupot nyan hana lagee
Ujeuen batee ube-be raga
Sret di manyang tum meuree-ree
Ka meuseubee rakyat dumna

Cut Usman gujang ate
Ka neupangge Geunta Sukma
'oh troh keunan jibet jaroé
Tuanku droe peue na haba

Geunta Sukma peue taim droe
Peue bala nyoe dum ka teuka
Ban jideungo sabda meunan
Jieu yoh nyan bak kutika

Sare leumah jipandangan
Jibet rijang jaroé dua
Ampon tuanku ka lon lihat
Sakti kreueh that raja teuka

Rakyat tuanku abeh pangsan
Keunong saktian ujeuen teuka
Cut Usman seuot laju
Adoe teungku hukom gata

Gata adoe ureueng sakti
That tatuksi dum peukara
Geunta Sukma jigrak badan
Jibeuet rijang saboh mintra

Jiteupok le dua jaroe
Troh le angen teuga raya
Dalam awan tren u.bumoe
Keunong asoe rakyat dumna

Nyankeu angen syeuruga nekmat
Keunong rakyat puleh mintra
Abeh jaga seukalian
Beudoh sajan ngon panglima

Jimasok lom lam puprangan
Seukalian beudoh ngaza
Raja raja masok lam prang
Seureuta sajan limong raja

Abeh rakyat seukalian
Puleh pangsan bandum rata
Yoh nyankeu prang that geumeuntam
Kreueh angkatan Raja Muda

Cut Usman mangat ate
Raja Pari meunang ngaza
Tantra musoh le that mate
Tiwah sabe plueng lam kuta

Mate rakyat that barollah
Guda gajah le that fana
Sang meugum-gum sang meugop-gop
Sang ka sret langet donya

Nibak nyang ka that nyoe seuuem
Keutam-keutum sang-sang geumpa
Han tatupeue peugah bagoe
Le that nyang moe manusia

Raja Pari peulheueh busu
Teudong laju gunong raya
Gunong manyang troh lam awan
Kareueng tajam tamse suda

Lingka gunong laot sinaroe
Tarek ie nyoe ban geulawa
Seugala rakyat Geunta Alam
Abeh karam lam laotnya

Gunong raya jijak leugat
Ateueh rakyat jimeung timpa
Geunta Alam kalon meunan
Yoh masa nyan beudoh sigra

Geunta Alam tingkrom gaki
Laot reule gunong fana
Muwoe padang tamse baroe
Rakyat dum nyoe puleh rata

Jimuprang lom nibak baroe
Rakyat dum nyoe ngon panglima
Raja limong that guransang
Rakyat jicang meugisa-gisa

Beuribot Tapa Geumpa Alam
Gohlom muprang ureueng dua
Tinggai sajan Cut Usman
Masa prang nyan goh jingaza

Geunta Sukma jiteureubang
Jeuet le badan sang geureuda
Jisama le keudeh keunoe
Lam padang nyoe rakyat raja

Abeh rakyat seukalian
Ka jisimpan raja raja
Abeh lam pruet geureuda nyan
Jiriwang bak Raja Muda

Le that rakyat abeh simpan
Leugat riwang Geunta Sukma
Troph bak kuta jisujud le
Di keue doli jidong sigra

Meunoe jikheun bak Cut Usman
Ka lon simpan dumna tantra
Raja Usman deungo meunan
Yoh masa nyan ate suka

Ka jiulak dumna rakyat
Di keue deelat Raja Muda
Dalam babah teubiet leugat
Raja rakyat ngon panglima

Bandum jaroë ka meuikat
Rante bulat ube-be pha
Ban neukalon le Cut Usman
Neukheun yoh nyan meunoe haba

Neuyue peulheueh seukalian
Rante badan bek meusingkla
Cut Usman tanyong meunoe
Gata dum nyoe pakri suka

Meuna hajat lom tariwang
Nak lon ampon jak tagisa
Jiseuot le seukalian
Ampon lamān po meukuta

Kamoe bandum han le muwoe
Bahle sinoe neupeuhamba
Nyawong darah tuboh asoe
Ban hukom nyoe bak sripada

Di donya kon troh ngon dudoe
Bandum kamoe neupeuhamba
Hana ubah nibak laman
Po junjongan tan meutuka

Cut Usman deungo meunan
Meunyum sayang Raja Muda
Teutap sinan dumna rakyat
Sajan deelat Raja Muda

Prang di mideuen raya leugat

Mate rakyat ureueng teuka

Ateueh guda dum jipasang

Payong alam le that rupa

Jimat bak jaroe cokma ngon peudeueng

'oh meuteumeung cang han reuda

Dum pahlawan deumpek surak

Sang meugrak-grak bumoe geumpa

Yoh nyankeu prang guranta that

Mate rakyat tantra teuka

Rakyat Pari 'oh ka mate

Udep lagi woe lam paya

Troh lam paya rakyat puleh

Teubiet keudeh lon jingaza

Troh lam paya bandum puleh

Wahe wareh kon peurbula

'oh lheueh mate di mideuen prang

Lom jiriwang ateueh tantra

Deungon siat dum ka teudong

Ka jipasang ateueh guda

Bak masa nyan raya that prang

Dum teureubang dalam hawa

Tujuh ribee nyang pahlawan

Uleebalang muploh laksa

Rupa hebat dum guransang

Rakyat jicang dum seureupha

Raja limong teubiet leugat

Dum meusapat ngon syeedara

Ka geumeucang hana teudoh

Talo musoh plueng lam kuta

Geunta Alam beungehji that

Sebab rakyat dum meugisa

Do'a sihe jibeuet rijang
Geunta Alam sakti raya
Raja Pari jeuet keu batee
Tajam eleumee sihe tapa

Raja limong jeuet keu batee
Raja Pari jeuet keu rusa
Seugala rakyat abeh paddee
Ladom batee ladom rusa

Jeuet binatang macam-macam
Seungap padang safan-safa
Seungap mideuen hana le prang
Wahe rakan jak pareksa

Meunan neukheun Cut Usman
Ubak rakan Geunta Sukma
Geunta Sukma beudoh rijang
Jiteureubang jak peunyata

Jipo leugat u mideuen prang
Dum binatang teungoh rimba
Teungoh jiplueng bandum u gle
Ka jituri Geunta Sukma

Jipeujeuet droe keu cicem subang
Jiriwang bak Raja Muda
Cicem subang sujud leugat
Di nap deelat jidong sigra

Jigrak tuboh rijang-rijang
Ka muwoe ban miseue nyang ka
Ampon tuanku ka lon lihat
Abeh rakyat jeuet keu rusa

Ladom rakyat jeuet keu batee
Le that lagee jipeurupa
Tan le sidroe di mideuen prang
Abeh karam keunong mintra

Raja Usman seuot rijang
Wahe bintang hukum gata
Wahe adoe tulong siat
Sayang rakyat dum binasa

Geunta Sukma deungo meunan
Teupok tangan atueh donya
Na sikeujap teuma lheueh nyan
Teuka ujeuen deungon sigra

Sret di manyang hana sakri
Ujeuen wangi deungon ata
Keunong badan rasa nekmat
Puleh rakyat keunong mintra

Abeh puleh dum pahlawan
Uleebalang ngon panglima
Bandum jiwoe u padang prang
Uleebalang raja raja

Jitrén di gle dumna rakyat
Jitakat u mideuen raja
Hingga seupot le ngon uroe
Rotdeh rotnoe woe lam kuta

Jimeusu le ngon geundrang prang
Rakyat riwang lop lam kuta
Seupot laju uroe malam
Seukalian pioh tantra

Makeuen minom beursukaan
Rotdeh meunan rotnoepi sa
Hingga beungoh le ngon uroe
Gong meubunyoe di blang raya

Amma bakdu that seureuloe
Rotdeh rotnoe teubiet mintra
Sideh jiek sinoe jijak
Ka meurumpak dua tantra

Nyoe baro lom meurumpok lawan
Jimeukap puesan deungon kala
Nyang di rakyat sama rakyat
Mate le that han ek kira

Rakyat mate han peue peugah
Guda gajah dum meutimpa
Raja Pari di teungoh lawan
Neucang angkatan meuribee laksa

Raja limong that pahlawan
Rakyat neupandang ube-be seuma
Raja Pirak that amarah
Neucang pantah musoh teuka

Raja Kuta Meuh beungeh han soe
Neutiek-tiek droe dalam tantra
Lom neutajo sultan Malek
Taeu neukek dalam laksa

Deungon rakyat han peue sidek
Neutarek busu teumaga
Neutajo le u mideuen prang
Rakyat neucang dum seureupha

Bak neumeucang hana peue kheun
Ban bayeuen sama-meunyama
Na sikeujap meutunang prang
Tiwah angkatan raja teuka

Geunta Alam saket ate
Jipeugot le saboh naga
Badan raya hana lagee
Ateueh ulee timoh cula

Watee jihah na ube blang
Soe nyang pandang ro ie mata
Naga juah hana macam
Jimeung simpan rakyat dumna

Rakyat Usman bandum kuyut
Jikeumeung 'uet kuta kuta
Geunta sukmapi that ragoe
Jipeujeuet droe saboh rupa

Jeuet le saboh cicem beuragoe
Jipeutoe keunan bak naga
Yoh nyan jilop lam geulunyueng
Jiniet umpung rumoh tangga

Jikurek utak le beuragoe
Naga poh droe alo-ala
Na sikeujap teuma dudoe
Mate keudroe naga raya

Sinan mate dalam padang
'oh tapandang han meuho ka
Geunta Sukma jiwoe leugat
Troph le siat dalam kuta

'oh troh keudeh ka jigrak droe
Rupa muwoe miseue nyang ka
Raja Usman mangat ate
Seubab tanle naga raya

Geunta Sukma ka neupujoe
Neucom bak dhoe ngon neuwa-wa
He adoe cut bungong tanjung
Raya tulong keu lon hamba

Teungoh teungoh neukheun meunan
Teuka ujeuen han teukira
Ujeuen apui sret di manyang
Yoh masa nyan karam kuta

Deungon seuuem hana lagee
Jeuet keu abee sang-sang kuta
Kuta hekeumat sang meuguncang
Abeh karam lam ie raya

Cut Usman ka neuingat
Busu neumat pantah sigra
Neupeubusu le u manyang
Ujeuen peujam han meuho ka

Ujeuen apui abeh seungap
Ngon keuramat Meurak muda
Teudoh ujeuen jroh ngon uroe
Peungeuh nanggroe trang cuaca

Tantra bandum suka ate
Sebab han le ujeuen raya
Raja Pari teuga han soe
Ka jitiek droe dalam tantra

Ho neupeukeue abeh ranap
Ho neupeunap dum seureupha
Padang tasek peungeuh lapang
Abeh simpan tantra teuka

Bak jimeucang hana pada
Le that simpan rakyat fana
Rakyat laen bandum girang
Ulon tuan nyang cubeueh raya

Raja raja uleebalang
Mate di blang seun silaksa
Yoh masa nyan that geumeuntam
Sang-sang karam bumoe donya

Sang meugo-go sang meugop-gop
Nyum sang ka sret langet donya
Han leumah le ureueng muprang
Seupot alam uroe seunja

Nyang na leumah sit meukilat
Sang-sang bakat cahya cokma
Cahya a mahkuta bak uleebalang
Miseue bintang leumah rupa

Sang-sang nanggroe ka meuhayak
Sang-sang pipak gunong raya
Suara cokma miseue guroh
U jeuoh sang geumpa raya

Uleebalang mate layoh
Sang han teudoh miseue teuka
Mate siploh troh sireutoh
Hana teudoh bantu teuka

Yoh masa nyan prang meugunjak
Leubeh rancak pari paya
Cut Usman ate galak
'oh neueu bak limong raja

U timu sigo jilumpat
U barat sigo jigisa
Cokma jibet peudeueng jigrak
Keunong mupak seun-seun tiga

Prang uroe nyan hana lagee
Tiwah sukee raja teuka
Hingga malam le ngon uroe
Abeh jiwoe dua tantra

Jimeusu le ngon geundrang prang
Rakyat riwang uroe seunja
Troh lam kuta rakyat riwang
Seukalian pioh rata

Makeuen minom beursukaan
Peh bunyian suroh raja
Raja yue peh tambo geundrang
Watee malam meusuka-suka

Hingga beungoh uroe siang
Meusu geundrang teubiet tantra
Teubiet rakyat seukalian
U mideuen prang teumpat ngaza

Deumpek surak tamse guroh
Bumoe runtoh bangon rupa
Cokma peudeueng bagoe ribot
Keunan jilop dalam tantra

Geunta Sukma jiteureubang
Ka jeuet badan sang geureuda
Dalam awan jiteureubang
Jimeusajan ngon boh lila

Yoh nyan jitiek dalam kawan
Boh meuriam sret lam tantra
Boh meuriam sret u baroh
Gum beureutoh dalam tantra

Asap racon teubiet sinan
Abeh pangsan rakyat that bha
Ladom mate ladom pangsan
Ka teureuban dum panglima

Pahlawan ngon uléebalang
Abeh pangsan musoh teuka
Seungap bunyoe han le kiroh
Prang ka teudoh han le goga

Geunta Sukma ka jiriwang
U padang bak Raja Muda
'oh troh keunan ka jigrak droe
Rupa muwoe manusia

Jibet jaroe jikheun ampon
Jiseuon ngon jaroe dua
Ubak Usman jikheun leugat
Tan le rakyat musoh teuka

Boh meuriam lon srom saboh
Ka beureutoh dalam tantra
Tantra musoh abeh pangsan
Keunoe teuman ka lon gisa

Di likot lon saleh pakri
Ampon doli tan pareksa
Geunta Sukma meunan kalam
Geunta Alam lon calitra

Jieu rakyat abeh pangsan
Tan soe muprang rakyat hana
Geunta Alam saket ate
Seubab han le rakyat dumna

Jimat cokma le bak jaroe
Jipoh bumoe atueuh donya
Teuka seupot hana bagoe
Sang-sang nanggroe ka meugisa

Jeuet le laot yoh nyan leugat
Siblah rakyat Raja Muda
Tantra Usman ka lam laot
Abeh hanyot lam ie raya

Geumpa Alam jideumpek that
Puleh rakyat keunong mintra
Tantra bunoe keunong racon
Abeh bandum puleh sigra

Ka jibeudoh bandum rakyat
Jimita pat musoh teuka
Leumah jieu dalam laot
Teungoh hanyot lam ie raya

Teungoh hanyot keudeh keunoe
Lam laot nyoe that seungsara
Cut Usman kalon meunan
Rakyat karam lam ie raya

Neucok tungkat pantah-pantah
Teungku Syiah le neucinta
Neutiek tungkat dalam laot
Teudoh ribot tho ie raya

Laotpi tho jeuet keu padang
Uroepi trang tamse nyang ka
Tantra pari mangat ate
Laot tan le tho dum rata

Dumna rakyat ate girang
Uleebalang ngon panglima
Uroe tarek hana bagoe
Rakyat jiwoe lom jiguda

Lom jimuprang miseue dilee
Rakyat padee ngon panglima
Yoh nyankeu prang han peue peugah
Guda gajah abeh fana

Uleebalang han peue pike
Le that mate musoh teuka
Surak deumpek that meuguncang
Bangon karam mideuen raja

Subhanallah raya that prang
Geunta Alam sakti raya
Rakyat le that troh di nanggroe
Geunap uroe hana reuda

Ie kuala ceukoe sabe
Darah ile ban ie raya
Uroe nyan prang that meutunang
Tiwah angkatan ureueng teuka

Seubab mate dum pahlawan
Bak uroe nyan talo ngaza
Ureueng jamee ka talo prang
Ka leukang teungoh jingaza

Jiplueng laju hana lagee
Ka jiteumee pageue kuta
Le that mate sira jiplueng
Geutak di rueng seun-seun tiga

Geunta Alam eu rakyat plueng
Tamse rimueng beungeh raya
Geunta Alam tingkrom gaki
Jeuet mata ie meubura-bura

Ngon sikeujap ka ngop nanggroe
Mata ie nyoe teubiet sigra
Karam nanggroe deungon gampong
Jimeung gulong kuta kuta

Jiek leugat dalam nanggroe
Ie beuna nyoe sakti raya
Rakyat bandum abeh karam
Ulon tuan plueng meutaga

Siblah Raja Cut Usman
Sosah han ban dum panglima
Kuta Usman abeh phang-phoe
Dalam ie nyoe abeh fana

Geunta Sukma beuet hekeumat
Kuta leugat po lam hawa
Seureuta rakyat bandum sajan
Jiteureubang deungon kuta

Cut Usman duek di dalam
Meusajan ngon limong raja
Tantra pari jiteureubang
Seureuta sajan jen lam paya

Putroe Meurak deungon lakoe
Lam kuta droe Raja Muda
Abeh bandum dalam awan
Syah Haliman raja tuha

Dalam awan dum teureubang
Hekeumat nyan Geunta Sukma
Teutap sinan dalam awan
Cut Usman deungon tantra

Cut Usman neukheun meunoe
Bak raja nyoe Geunta Sukma
He pahlawan pakri jinoe
Geutanyoe tatren u donya

Bek le sinoe dalam awan
Han got macam gop eu rupa
Meunyo sabe dalam awan
Tan saktian bak gop kira

Sang-sang malee ulon tuan
Nyang got teelan tren u donya
Ie beuna nyoe bek sosahan
Kheundak Tuhan han binasa

Geunta Sukma seuot rijang
Ampon laman po meukuta
Pioh dilee payong nanggroe
Na bak 'kamoe saboh mintra

Lon keumeung tiek saboh sakti
Nak jituri Geunta Sukma
He tuanku neupioh dilee
Neueu lagee buettan hamba

Wahe adoe ban nyang hajat
Ban nyang mangat nibak gata
Ban gata kheun ulon turot
Ban nyang patot takeurija

Gata adoe ureueng sakti
That tatukri dum peukara
Ban jideungo sabda meunan
Yoh masa nyan jipet mata

Geunta Sukma jitiek tungkat
Sret leugat u mideuen raja
Na sikeujap nanggroe seupot
Teuka ribot hana tara

Teuka ribot kreueh han bagoe
Tarek uroe ju keupala
Deungon reudok keutam-keutum
Sang-sang kram-krum bumoe donya

Dum lasyeuka Geunta Alam
Abeh mumang ladom fana
Ribot kreueh that han peue tanyong
Gunong-gunong dum seureupha

Bumoe donya sang meuhayak
Reudok jijak cong keupala
Ie beuna tho dalam nanggroe
Padang muwoe miseue nyang ka

Uroepi trang buleuenpi jroh
Ureueng gadoh ka meugisa
Geunta Sukma beuet hekeumat
Jisrom tungkat dalam hawa

Dudoe nibak nyan na sikeujap
Apui leugat hu meunyala
Ka jeuet apui dalam padang
Ka troh keunan dalam kuta

Apui raya han soe tu'oh
Tutong tanoh deungon tantra
Tutong kuta abeh angoh
Sangat meh-moh raja teuka

Apui raya hana lagee
Abeh padee musoh teuka
Tan soe peulen ngon beurani
Apui sakti Geunta Sukma

Tantra bandum abeh tutong
Kuta jitren di antra
Cut Usman ka u bumoe
Deungon putroe dalam kuta

Kuta jitren dalam padang
Meusajan deungon lasyeuka
Apui raya hu maken that
Siblah rakyat raja teuka

Geunta Sukma ka jisujud
Jidong di nap Raja Muda
Mangat ate Cut Usman
Ka troh keunan Geunta Sukma

Jigrak tuboh rijang-rijang
Ka muwoe ban manusia
Ampon tuanku ka lon riwang
Uroe ka trang miseue nyang ka

Cut Usman seuot pantah
Deungon tuah sidroe gata
Geunta Sukma teutap sinan
Sajan-sajan Raja Muda

Prang di mideuen that meuguncang
Ureueng landang that seungsara
Seubab apui han reuda le
Sosah ate dumna tantra

Tantra Usman surak sabe
Sang reuloh gle karam donya
Yoh masa nyan Geunta Alam
Jibeuet rijang saboh mintra

Jicok batee le jireugam
Jisrom rijang dalam hawa
Seupot seupeuet ngon sikeujap
Reudok kilat lagee sua

Langet bumoe sang ka reule
Gunong ngon gle sang meugisa
Teuka reudok deungon tupeuen
Jitoh ujeuen ngon ie raya

Ujeuen raya leugat jitren
Ka abeh len apui raya
Ujeuen raya hana lagee
Abeh padee apui dumna

Geunta Alampi han sakri
Tiwah sakti Geunta Sukma
Tantra bandum abeh girang
Jimuprang han duka-cita

Jimuprang that nibak dilee
Hana jithee hilang nyawa
Leubeh that nyoe nibak baroe
Le teupipoe dum panglima

Sang meugo-go sang meugup-gup
Sang-sang geuyup sangkaikala
Langet bumoe sang rasa sret
Sang ribot suara cokma

Jimeutop cang sang leuek meulot
Sang di laot riyeuk teuka
Raja Pari that guransang
Leugat jicang mekeuba-keuba

Ho jipeukeue abeh ranap
Ho jipeunap abeh rata
Le that mate dum teupipoe
Buet jaroe limong droe raja

Prang han reuda uroe malam
Uleebalang abeh fana
Tantra pari hana mate
Ka jiwoe le dalam paya

'oh takalon ka jiriwang
Jipeuseunang atueuh tantra
Tahe hireuen 'oh tapandang
Bunoe hilang nyoe ka teuka

Tantra musoh hireuen mandang
Bunoe tacang jih ka fana
'oh takalon ka jiriwang
Jipeuseunang ateueh tantra

Sosahji that ureueng landang
Jiriwang jitak bak muka
Yoh masa nyan prang ka timang
Meutunang ngon ureueng banda

Masa nyan prang that meuhayak
Mate rusak dum peutua
Langet bumoe sang meuguncang
Gunong manyang dum meugisa

Kareueng buket gadoh hilang
Bak jimeucang keunong cokma
Jiek laju keunan leugat
Jimumat-mat dum panglima

Guda gajah mate di blang
Le that simpan musoh teuka
Han jan leumah deuh tapandang
Sinan hilang han jigisa

Raja Pari ngon rakyat droe
Jiek meuree-ree dalam tantra
Raja limong that seureuloe
Hana bagoe ban cempala

Pantahji that bak jimeucang
Abeh simpan raja raja
Yoh nyakeu prang that geumeuntam
Kreueh angkatan Raja Muda

Meusurot le ureueng landang
Jiplueng rijang dalam kuta
Geunta Alam beungehji that
Jicok leugat saboh cokma

Cokma jsrom dalam awan
Jeuet le rijang dum geureuda
Jeuet geureuda le han bagoe
Babah beusoe sang meulila

Mataji hu bandua blah
Susoh mirah ban keusumba
Juahpi that hana bagoe
Jimeung seudoe dumna tantra

Jisujud le dalam padang
Jisimpan rakyat ban nyang na
Abeh ji'uet seukalian
Panglima prang rakyat raja

Raja limong dum sinaroe
Ka jiseudoe bandum tantra
Abeh rakyat dum jisimpan
Uleebalang sama juga

'oh lheueh ji'uet seukalian
Jiriwang bak raja raya
Jiriwang bak Geunta Alam
Jimeukalam deungon raja

Tuanku ampon pruet lon deuek that
Neupeugah pat laen tantra
Goh mumada po junjongan
Neukheun rijang po meukuta

Sebab kamoe na dua lhee
Lon lakee bak po lon raja
Neupeuleumah rijang-rijang
Meujak simpan ulon gisa

Pruet lon deuek that ulee mumang
Lhee boh pisang han mumada
Geunta Alam seuot rijang
He binatang bek that subra

Jinoe kajak bak si Usman
Ka'uet rijang kuta kuta
Jakleh leugat he binatang
Bek le kiam jakleh seuba

Ban jideungo sabda meunan
Jiteureubang dalam hawa
Troh lam hawa jiteureubang
Jipandang leumah le kuta

Dalam kuta rakyat sinan
Usman deungon laen raja
Dum geureuda jilayang droe
Ban sinaroe nam ribee sa

Kuta hekeumat ka jihirup
Abeh lam pruet raja raja
Kuta kuta abeh lam pruet
Ka jihirup Raja Muda

Cut Usman ka mupaloe
Buet sakti nyoe Alam Geunta
Geunta Sukma tinggai sidroe
Masa bunoe tan lam kuta

Ban jikalon kuta tan le
Bandum sare ngon lasyeuka
Dalam padang tan le sidroe
Seungap bunyoe prang ka reuda

Jieu keudeh jingieng keunoe
Tan le sidroe raja raja
Geunta Sukma sosahji that
Sebab rakyat han meuho ka

Geureuda mantong dalam awan
Teungoh meuen di antara
Rakyat lam pruet bandum pangsan
Gohlom simpan mate fana

Teutap lam pruet rakyat pangsan
Seukalian raja raja
Mantong sinan dalam awan
Goh jiriwang woe bak raja

Geunta Sukma sakti gagah
Jibeuet pantah saboh mintra
Jitren ujeuen dalam awan
Ribot sajan bade raya

Ribot raya kreueh han bagoe
Ujeuen 'oh doe ube-be raga
Dum geureuda keunong ribot
Ka abeh sret bandum rata

Sret u mideuen bandum sare
Keunong sakti Geunta Sukma
Geureuda sret patah meukhan
Hanco badan jeuet keu sira

Geunta Sukma beuet hekeumat
Jaga rakyat ngon panglima
Cut Usman puleh pangsan
Neuwoe yoh nyan bandum rata

Kuta tan le dalam padang
Neuglong rijang dalam tantra
'oh ban neuglong tungkat beusoe
Teudong keudroe leugat kuta

Tamse nyang ka kuta teudong
Rakyat tamong dum lam kuta
Cut Usman tamong sajan
Uleebalang raja raja

Seugala rakyat abeh puleh
Masók keudeh jijak ngaza
Prang di mideuen that meuhubo
Rasa hanco bumoe donya

Raja Pari jicang rakyat
Dum meusapat ngon lasyeuka
Le that mate raja rakyat
Jicang leugat han ban publa

Cut Usman di meuligoe
Sajan Putroe Meurak muda
Neukalon prang that meutunang
Mantong timang saban padra

Guree tapa le neiingat
Tungkat neumat Raja Muda
Neuglong tungkat di teungoh blang
Teuka rijang angen raya

Teuka ribot deungan guroh
Sang ka runtoh alam donya
Angen kreueh that deungan ribot
Abeh jipot dumna tantra

Tantra musoh sret u laot
Kreueh that ribot ka angen ba
Tan le sidroe ureueng muprang
Uleebalang ngon panglima

Abeh bandum sret u laot
Buet ribot Cut Raja Muda
Bukon sayang bungong meulu
Sret meutabu dalam tika .

Bukon sayang musoh datang
Dum sibarang u laot raya
Uleebalang deungan rakyat
Abeh seungap safan-safa

Tantra pari suka ate
Sebab tan le dum lasyeuka
Jisurak ngon jihei sare
Sang reuloh gle karam donya

Sang-sang karam nanggroe reule
Surak sabé ngon meutaga
Teutap musoh sidroe han le
Peungeuh sare mideuen raja

Bandum musoh ka lam laot
Jinoe lon seubot Alam Geunta
Geunta Alam sosah ate
Seubab tan le dum lasyeuka

Geunta Alam beungehji that
Beudoh leugat pantah sigra
Teupok jaroe atueh bumoe
Tho laot nyoe jeuet keu data

Laotpi tho jeuet keu ribot
Jibapot rakyat bak nyang ka
Ribot puwoe lom u padang
Seukalian tantra raja

Geunta Alam jicok panah
Jimat pantah saboh cakra
Bak cakra nyan sakit le that
Nanji mangat Cakra Donya

Nyankeu sakti han soe lawan
Jisrom rijang dalam hawa
Seupot seupeuet tamse malam
Uroepi tan han meuho ka

Tantra pari that teumakot
Seubab seupot glap-gulita
Lam seupot nyan lon peugah kir
Naga sakti keunan teuka

Abeh ji'uet tantra pari
Naga sakti le han tara
Abeh ji'uet panglima prang
Uleebalang ngon peutua

Raja limong bandum sare
Han saboh le abeh fana
Han le sidroe ureueng muprang
Seungap padang mideuen raja

Uroe seupot tamse malam
Meunan sang-sang taeu rupa
Cut Usman bak masa nyan
Duek seumayam dalam kuta

Neueu seungap di mideuen prang
Beudoh rijang Raja Muda
Neueu uroe tamse malam
Reudok hitam siblah donya

Ban neukalon meunan macam
Teupok rijang jaroe bak pha
Ban neuteupok dua jaroe
Jibleut uroe tamse nyang ka

Reudok hilang gadoh tupeuen
Peungeuh mideuen trang cuaca
Neueu naga dum di padang
Teungoh jisimpan tantra dumna

Neucok busu yoh masa nyan
Mat di tangan le neulunta
Neupeubusu dalam padang
Naga suang mate fana

Sinan mate bandum hilang
Naga simpan banseumua
Rakyat lam pruet bandum pangsan
Puleh rijang keunong mintra

Abeh puleh seukalian
Beudoh rijang lom jingaza
Jitajo le lom u padang
Jimeucang leubeh bak nyang ka

Yoh masa nyan prang meutunang
Mantong timang dua tantra
Suara cokma tamse guroh
Keunan jiblo raja raja

Keudeh keunoe prang han tiwah
Sabe tuah raja dua
Bak uroe nyan prang meuhayak
Peudeueng kapak le binasa

Teungoh sunggoh tantra muprang
Teuka malam le ho seunja
Teuma meusu le geundrang prang
Rakyat riwang woe lam kuta

Rotdeh rotnoe woe u dalam
Bak sultan maseng raja
Abeh tamong dum u dalam
Panglima prang raja raja

Makeuen minom meusukaan
Watee malam pioh tantra
Cut Usman waliyullah
Deungon ayah neumeusabda

Deungon raja ayah putroe
Lae sinaroe dumna raja
Sulotan Malek di sinan toe
Neukheun meunoe Raja Muda

Wahe ayah payong nanggroe
Prang geutanyoe padum lama
Ulon ayah lupa sangat
Padumna trep nyang ka lama

Sulotan Malek seuot rijang
Neumeukalam ngon cut banta
Wahe aneuk bungong seupeueng
Sikureueng buleuen nyan ka lama

Prang nyoe aneuk raya sangat
Bak lon lihat nyang ka nyang ka
Saleh pakri uroe dudoe
He samlakoe prang that raya

Cut Usman seuot pantah
Insya Allah po meukuta
Tulong Tuhan deungon Nabi
Laen lagi dum eelia

Bek that gundah teumakot gli
Neuduek doli dalam kuta
Neukalon buet tantra pari
Ate bek gli po ayahda

Dum geutanyoe salahpi tan
Troh raja nyan jak enaya
Cut Usman lom kheun rijang
Raja Syarwan neuhei sigra

Wahe ma po tajak keunoe
Lon di sinoe ka lam banya
Meuhan tajak bak siseun nyoe
Mate kamoe aneuk gata

Raja Syarwan seuot rijang
Preh he intan dang kuteuka
Sinoe neuhei sideh neuthee
Tajam eleumee Syarwan Indra

Hingga beungoh le ngon uroe
Rotdeh rotnoe teubiet tantra
Meuteumeung le dua pihak
Prang meuhayak leungo donya

Dum pahlawan mate rusak
Dum teukeupak raja raja
Na sikeujap meutunang prang
Leumah angkatan teungoh teuka

Ho maken toe le u mideuen
Ban tupeuen meunan suara
Geunta Sukma sinan sajan
Neukheun nyoeban Raja Muda

Cut Usman neukheun rijang
Cuba pandang pane tantra
Geunta Sukma jiteureubang
Jeuet le badan laen rupa

Jipeujeuet droe keu cicem subang
Jipo rijang ubak tantra
Jieu rakyat that barollah
Jitawajah u mideuen raja

Jieu alam mirah hitam
Raja Syarwan nyang po tantra
Raja Syrwan atueuh burak
That meusigak dum panglima

Payong intan jroh han sakri
Meuseundi ngon mutiara
Kandran burak raja pasang
Dum pahlawan ireng lingka

Jigrop lumpat dum pahlawan
Alat sajan peudeueng cokma
Geunta Sukma hireuen tahe
Tantra that le jieu teuka

Meuri nama dum bak alam
Meunan jifam dalam dada
Geunta Sukma ka jiriwang
Cicem subang troh bak raja

'oh troh keunan ka jigrak droe
Rupa muwoe manusia
Jibet jaroe rijang pantah
Ka jiseumbah Raja Muda

Ampon tuanku ka lon pandang
Raja Syarwan teungoh teuka
Deungon rakyat that barollah
Meugah meugah dum panglima

Cut Usman deungo meunan
Teubiet yoh nyan le u lua
Neujak ampeueng Raja Syarwan
Muliaan raja raya

Na sikeujap leumah alam
Puteh hitam le wareuna
Leumah payong le that macam
Rakyat hitam siblah donya

Tamse reudok seupot hitam
Tamse malam glap-gulita
Raja Syarwan troh u padang
Cut Usman kalon rupa

Neumupayong intan meukarang
Tamse intan reumboe lingka
Cut Usman peurab rijang
Jak meuteumeung deungon raja

'oh rab keunan Usmanpi troh
Bujang suroh rakyat dumna
Neuyue dong tunong ngon baroh
Nyang di teungoh rot geuteuka

Wie ngon uneun dong dua seueh
Teungoh peungeuh jurong raya
Raja Syarwan ka leumah deuh
Seumayam atueh burak indra

Payong intan hana macam
Neurakam meugisa-gisa
Rupa indah tamse tanglong
Reumboe payong mupeurmata

**Di likot nyan that meuteuntee
Lapan ribee nyang panglima
Pakaian jroh ija bajee
Ateueh ulee kulah kama**

**Di likot nyan dum pahlawan
Adi juhan muploh laksa
Teuma rakyat di likot nyan
Hana padan seupot donya**

**Cut Usman keunan hampe
Neutajo le keunan sigra
Teuma neucom gaki tangan
Raja Syarwan neusambot neuwa**

**Raja Syarwan suka ate
Neungsieng sabe Raja Muda
Yoh aneukda peusan kamoe
Teungoh lon nyoe lam beurcinta**

**Heundak lon nyoe kubeurangkat
Lon jak siat kalon rupa
Cut Usman neukheun rijang
Teungoh laman cinta po ma**

**Na sikeujap baro dapat
Leumah deelat baro teuka
Raja Syarwan lom kheun meunoe
Seureuta ngon mameh muka**

**Dumpeue kuthee he samlakoe
Dum di sinoe buet di gata
Barangpeue buet dum kutukri
Ulon nini nibak gata**

**Masa taprang Haliman Syah
Taloji sah meunang gata
Tamuprang ngon Raja Samidan
Wahe intan bandum fana**

Jikoh takue gata intan
Jitiiek badan dalam paya
Lhee ngon aneuk puteh licen
Dum jipeulen abeh fana

Bandum kuthee he samlakoe
Buet di sinoe maklum po ma
Tan kuteuka yoh masa nyan
Ka kutuban han mumara

Cut Usman deungo meunan
That sukaan hana tara
Cut Usman neukheun leugat
Ngon beureukat po meukuta

Deungon tuah doli halarat
Nyang bri rahmat Tuhan Esa
Teungoh marit Cut Usman
Troh le keunan Geunta Sukma

Jijak seumbah Raja Syarwan
Jicom tangan raja raya
Keuramat that hana sakri
Bagi doli nyang troh mata

Teuma dudoe teuka laen
Sukee jen ngon pari paya
Ate galak mayoh meusyen
Dum sukee jen pari diwa

Jika seumbah tueng beureukat
Bandum rakyat keunan teuka
Raja Syarwan suakaan that
Dum keu rakyat lakee do'a

Neubeuet do'a neuleueng jaroe
Seureuta neumoe neumupinta
Beu seulamat gata dum nyoe
Bangsa jen nyoe deungon diwa

'oh sare lheueh neumeulakee
Leumah sukee musoh teuka
Teungoh-teubiet dum u padang
Uleebalang ngon panglima

Raja raja teubiet u blang
Ladom pasang atueh naga
Geunta Alam jiteubiet droe
Bak uroe nyoe prang that raya

Talo meunang bak uroe nyoe
Mangat tawoe dum tagisa
Aeh teubiet uleebalang
Panglima prang dum peutua

Dalam kuta tan le ureueng
Ka u mideuen dum jak ngaza
Nam ploh ribee raja taklok
Jimasok u mideuen raja

Payong intan dum meutabu
Han jeuet taeu reumboe lingka
Troph u mideuen deumpuk surak
Siblah rakyat raja teuka

Raja Syarwan deungo surak
Nyum meugrak-grak leungo donya
Ubak Usman neukheun rijang
He cut intan aneuk hamba

Tabri idin po samlakoe
Bak uroe nyoe bah lon ngaza
Bah lon cuba adu sakti
Mangat jituri Syarwan Indra

Wahe aneuk meuntroe intan
Lon peukaram po ceulaka
Mangat jithee raja inong
Kupeukeunong bubebee raya

Lon cuba tiek bubebee beusoe
Nak jithee droe rimueng seuba
Le that sakti geukoh ulee
Dalam bubebee kucuet singkla

Wahe aneuk Cut Usman
Dum raja nyan kiniet bue kra
Bah jirasa po rimueng cang
Teu'ajam-'ajam keunoe teuka

Cut Usman han jituri
Pangkat wali biek eelia
Raja Syarwan kheun bak meuntroe
Bubebee beusoe jiye bawa

Ban meuntroe deungo sabda meunan
Jicok yoh nyan bubebee keumala
Jilambong le dalam awan
Sret u padang tempat raja

Raja Syarwan jibeurangkat
Teubiet leugat dalam tantra
Deungan meuntroe dua sajan
Troh u padang dua saja

Rakyat laen seukalian
Jikalon ban buettan raja
Jidong mantong seukalian
Raja Syarwan that peurkasa

Raja Syarwan troh u padang
Jipasang burak jroh rupa
Ubak meuntroe neukheun leugat
Deumpek bak that su meutaga

Jideumpek le meuntroe Syarwan
Seupot alam siklep mata
Seupot seupeuet tamse malam
Hana le trang glap-gulita

Yoh nyan rakyat abeh mum^{ng}
Jilop keunan banseumua
Abeh ji'uet le bubeenyan
Seukalian rakyat raja

Tan le sidroe tinggai rakyat
Abeh seungap safan-safa
Ka u dalam bandum jilop
Tamse eungkot dalam raga

Geunta Alam ka lam bubeen
Tan le lagee po ceulaka
Raja taklok muploh ribee
Ka lam bubeen bandum rata

Panglima prang ngon pahlawan
Abeh simpan dum seumua
Geunta Alam tan le lagee
Buet bubeen Syarwan Indra

Bubeen beusoe jisrom u manyang
Sret le rijang di lua kuta
Raja Syarwan leugat jiwoe
Bak samlakoe Raja Muda

Cut Usman puteh leusoh
Sinan pioh di lua kuta
Neupreh riwang Raja Syarwan
Dum angkatan preh di lua

Raja Syarwan troh le keunan
II hadapan rakyat dumna
Tahe hireuen seukalian
Raja Syarwan sakit raya

Cut Usman hireuen dasyah
Allah Allah sakti that kha
Raja Syarwan kheun le pantah
Neupeugah bak Raja Muda

Wahe aneuk meuntroe intan
Hana le prang bijeh mata
Abeh jilop dalam bubee
Bungong keumbee tuah gata

Tan le lagee wahe Usman
Dum taja nyan dalam singkla
Ka lon rante gaki jaroe
Han le sidroe jeuet meuhaba

Jinoe pakri takheun rijang
Lon peukaram bandum raja
Cut Usman seuot pantah
Neubet bagah jaroe dua

Ampon bak ma raja bandum
Neubri hukom yue keulua
Kadang-kadang jitem taklok
Mangat bek trok ajai teuka

Jinoe he ma cuba tanyong
Pakri keunong tapareksa
Raja Syarwan seuot pantah
Insya Allah bijeh mata

Wåhe aneuk po Cut Usman
Rakyat bandum ka lam rimba
Di mideuen prang tan le sidroe
Sinaroe jiteungoh rimba

Raja Syarwan beuet hekeumat
Teubiet leugat dumna raja
Jaroe gaki ka meurante
Kong han sabé na ube pha

Ka teuduek dum seukalian
Di raja nyan dalam singkla
Jaroe gaki dalam rante
Hana jeuet le peugah haba

Keunong sakti Raja Syarwan
Dum raja nyan that seungsara
Nibak badan ladom hitam
Keunong saktian Raja Indra

Ka teuduek-duek miseue bateueng
Keunong cukeueng inong raja
Raja Syarwan lom kheun meunoe
Bak raja nyan dum lam singkla

Pakri napsu dum gata nyoe
Na lom nanggroe tameuhawa
Meunyo hajat takeurajeuen
Lon bri mideuen bak taraja

Meunyo han le takheun rijang
Lon peukaram mangat fana
Meunyo hajat mate nyawong
Bah kutanom bek kagisa

Kupoh mate bansinaroe
Han kubri woe he ceulaka
Cut Usman han katuri
Kameuungki keu kee raja

Han katuri nyan aneuk kee
Raja asee buta mata
Raja laen abeh jithee
Nyoe aneuk kee Raja Muda

Kah dum paleh geukoh ulee
Kukoh-koh lhee kuboh sira
Dum kugasi aneuk asee
Hana kathee aneuk hamba

Wahe Raja Geunta Alam
Gata bandum pakri suka
Geunta Alam jibet jaroe
Ampom kamoe salah nyang ka

Kareuna ulon hak ka mate
Ampon doli kawoh po ma
Peue kapeugah mate geucang
Lon kon mawang peue kasangka

Kon ma gata kee nyoe sidroe
Rimueng seudoe buta mata
Meuntroe Syarwan tajo leugat
Ampon deelat payong hamba

Kareuna Raja Geunta Alam
Ampon sibarang goh jeuet bahsa
Beusa salah bek neuhaloh
Ureueng ka roh dalam singkla

Ampon tuanku meuribee ampon
Kamoe bandum hak ka fana
Ban nyang hajat payong nanggroe
Hana sidroe soe theun sangga

Neugantung manyang neuboh jeuoh
Nyawong tuboh neupeuhamba
Nyawong darah tuboh asoe
Gaki jaroe di meukuta

Hana ubah nibak kamoe
Troh 'an dudoe neupeuhamba
Raja Syarwan teuma peugah le
Taploh rante bak angeeta

Meuntroe Syarwan teupok jaroe
Rante beusoe han mmeuho ka
Geunta Alam beudoh pantah
Jijak seumbah Syarwan Indra

Jigisa lom ubak Usman
Seumbah yoh nyan Raja Muda
Cut Usman sambot pantah
Bu meutuah bandum gata

Bandum raja mumat jaroe
Bak uroe nyoe meu'ah deesya
Prang hana le nanggroe aman
Dum raja nyan jeuet syeedara

Geupeutamong le u dalam
Muliaan dum raja raja
Geunta Alam geupeujamee
Jroh that lagee geupeumulia

Bet idangan bandum sudah
Makeuen pantah raja raja
Buettan Raja Haliman Syah
Nyankeu ayah putroe muda

Makeuenpi lheueh malam uroe
Dum sinaroe pioh tantra
Beungoh uroe datang siang
Meusu geundrang dalam kuta

Meusu tambo deungon gambang
Geurakkan Raja Muda
Na sikeujap jula uroe
Jilakee droe dumna raja

Sulotan Malek neulakee droe
Bak aneuk droe Raja Muda
Idin aneuk lon keumbali
He puteh di bijeh mata

Cut Usman neuseuot le
Leugat ile ngon ie mata
Meunyo ayah woe u nanggroe
Ingar keu kamoe beu le do'a

Insya Allah he samlakoe
Malam uroe lon mipinta
Sulotan Malek phon beurangkat
Deungon rakyat dum panglima

Sajan rakyat woe u nanggroe
Seureuta meuntroe ngon bentara
Raja Gunong Meuh leugat riwang
Dum pahlawan leugat gisa

V JAK U NANGGROE MEUSE

Maseng-maseng woe bak makam
Keu Cut Usman lon calitra
Amma bakdu teuma dudoe
Teuma neuyue woe Alam Geunta

Cut Usman neukheun rijang
Bak Syarwan raja raya
Ampon deelat ma jeunulang
Geunta Alam neuyue gisa

Watee na buet uroe dudoe
Beu troh keunoe ubak hamba
Raja Syarwan seuot pantah
Insya Allah bijeh mata

Wahe Rja Geunta Alam
Jak tariwang dumna gata
Watee na buet uroe dudoe
Beu troh keunoe bak aneukda

Jinoe tawoe seukalian
'oh lon peusan bandum teuka
Ban jideungo sabda meunan
Jimoe yoh nyan dumna raja

Bandum raja that dukaan
Jibet tangan atueuh jeumala
Ampon tuanku payong nanggroe
Heundak kamoe ubak raja

Bek tuanku cre siuroe
Jarak kamoe ngon meukuta
Bek sitapak Tuhan bri cre
Udep mate rugoe laba

Usman deungo that weueh ate
Sajan ile ngon ie mata

Lompi neukheun bahle tawoe
Uroe dudoe beu troh teuka

Barangapat meuduek kamoe
Beu troh dudoe bandum gata
'oh jideungo bit jiyue woe
Meuteutaloë ngon ie mata

Teuma jicom gaki jaroe
Jilakee droe dum jigisa
Seureuta rakyat ngon pahlawan
Deungon kandran gajah guda

Geunta Alam ka leupah woe
U nanggroe teumpat jiraja
Seureuta rakyat ngon pahlawan
Adi juhan dum panglima

Jiteureubang dum lam awan
Deungon kandran gajah guda
Geunta Alam ka leupah woe
U nanggroe teumpat jiraja

Deungon tantra dum sinaroe
Takat nanggroe maseng jeumba
Raja Syarwan neukheun meunoe
Tadeungo kamoe bijeh mata

Idin aneuk lon kujak woe
Lon lakee droe ubak gata
Watee na buet peusan kamoe
Uroe dudoe troh lon teuka

Usman deungo sabda meunan
Cut Usman ro ie mata
Pakon tamoe po samlakoe
Bit ka kuwoe sajan gata

Nyoepat euncien aneuk kubri

Euncien sakti nibak jaja
'oh tacinta nama kamoe
Teubiet sinoe burak raya

Jeuet keu kandran po samlakoe
Jampang tawoe nanggroe bunda
Ateueh laot jiteureubang
Laot intan han binasa

Laot apui ek teureubang
Han ek karam burak raya
Nyawongjih tan dalam badan
Han ek simpan barang bahya

Euncien tasok jaroe uneun
Wahe buleuen bek talupa
Nama ulon tacintakan
'oh tapeusan troh bak gata

Ka lon peugah po samlakoe
Lon kujak woe tinggai gata
Cut Usman beudoh pantah
Neujak seumbah raja raya

Sira neucon gaki jaroe
Sira neumoe Raja Muda
Lheueh meuteumeung raja riwang
Ka meulayang dalam hawa

Raja Syarwan ka u manyang
Uleebalang raja raja
Tujoh ribee raja sajan
Adi juhan han teukira

Cut Usman tinggai sinan
Bak nanggroe nyan meuseusuka
Sajan Putroe Meurak intan
Ngon dendayang muda muda

Cut Usman neukheun meunoe
Bak raja nyoe pari paya
Wahe Raja Diwa Pari
Keunoe mari bandum gata

Raja Pari keunan peutoe
Meusajan ngon Geunta Sukma
'oh troh keunan u hadapan
Cut Usman le meusabda

Jak kakanda gata tawoe
Bak tempat droe dalam paya
Cut Usman neumat tungkat
Jiwoe leugat Geunta Sukma

Uleebalang deungon rakyat
Gadob bakat han le rupa
Cut Usman tinggai sinan
Meusajan ngon nam droe raja

Hireuen tahe raja nam droe
Jikalon proe Raja Muda
Uroe malam ireng sajan
Nam raja nyan sang syeedara

Wadi meuntroe adi sajan
Rab Usman jarak hana
Haliman Syah ayah putroe
Neuduek keudroe raja tuha

Nyang peutimang raja nam droe
Jeuep-jeuep nanggroe wase teuka
'oh troh wase jeuep-jeuep nanggroe
Jok bak jaroe nam droe raja

Cut Usman neuduek keudroe
Nyang peungaroe dum teumuda
Cut Usman raja alam
Di awah nyan le that raja

'oh troh bak thon sampoe keunan
Dum raja nyan di bawahnya
Sikureueng laksa raja taklok
Barangjan trok junjong sabda

Laen Raja Kuta Beusoe
Nyan ayah droe nam blah raja
Cut Usman teutap sinan
Uroe malam dalam kuta

Kutapi kong nanggroe aman
Rakyat keunan dalam banda
Hukom ade raja sehat
Han tom rakyat neuenaya

Boh kayee jeuet murah pade
Ujeuen sabe kayem teuka
Umu lhee thon lheueh neumuprang
Teutap sinan Raja muda

Cut Usman bak siuroe
Teuringat nyoe janji nyang ka
Ingat janji yoh saboh roe
Deungon putroe aneuk raja

Kariman Benti nama putroe
Dilee puroe leupah haba
Meuhana troh janji puroe
Salah lon nyoe bak Rabbana

Bah lon peutroh kaman jinoe
Bek jeuet dudoe lon meureuka
Bahle lon jak nanggroe Meuse
Meunan janji dilee mula

Cut Usman meunanan pike
Dalam hate tan u lua
Bahkeu lon jak u nanggroe Meuse
Lon keumbali woe bak bunda

Sira lon woe ubak ibu
Lon meung jak eu mantong bunda
Keumah pike Cut Usman
Bak masa nyan neumeusabda

Neukheun ubak raja nam droe
Deungo lon nyoe he kakanda
Idin kakanda lon ban nam droe
Hajat lon woe ubak bunda

Saleh mantong saleh tan le
Jameun ka cre dilee masa
Gata bannam tinggai sinoe
Bak nanggroe nyoe mat neuraca

Meunyo tuanku woe u nanggroe
Kamoe nam droe sajan neuba
Deungon rakan dum sinaroe
Tuanku droe patot neuba

Han peue rakan insya Allah
Ngon afuwah dumna gata
Lagi lon jak han trep lon woe
Lhee peuet uroe ulon gisa

Keupeue rakan lon woe rijang
Lheueh meuteumeung deungon bunda
Meunyo meunan payong nanggroe
Idin kamoe mubek lama

Cut Usman ek bak putroe
Jak lakee droe keumeung bungka
Idin keu lon bungong geutoe
Siat lon woe saweue bunda

Lon jak kalon saleh tan le
Idin tabri putroe muda
Ban putroe deungo raja riwang
Ile mubram ngon ie mata

Meunyo neuwoe po junjongan
Ulon sajan tuanku ba
Bek neukeubah lon di nanggroe
Tuanku droe lon jak bak tha

Bek he putroe tajak dilee
Lon peuteuntee mantong bunda
Meuna umu uroe dudoe
Lom ulon woe jak tueng gata

Bek jak dilee bungong geutoe
Lhee peuet uroe troh lon gisa
Yoh nyan putroe ate mangat
Jibri deelat jinoe bungka

Cut Usman leugat neutren
Ka lheueh idin putroe muda
Neujak laju Cut Usman
Troph le keunan ubak kuta

Neuseuet euncien nibak jaroe
Neuingat nyoe nama raja
Neuingat nama Raja Syarwan
Troph le rijang burak raya

Teudong di keue Cut Usman
Neukheun rijang meunoe sabda
Wahe burak nyang that sakti
Lon kumari u nanggroe raya

U nanggroe Meuse hajat datang
Tulong rijang akan hamba
Ubak nanggroe Kariman Benti
Lon meujanji dilee masa

Gaseh sayang gata sidroe
Taba lon nyoe uleh gata
Burak seuot insya Allah
Neuke pantah atueuh hamba

Cut Usman neukek rijang
Jiteureubang dalam hawa
Jipo tajam tamse kilat
Jitakat bak awan miga

Dua uroe jiteureubang
Laot bintang meuteumeung ka
Neueu riyueuk ngon geulumbang
Miyup manyang troh lam hawa

Limong uroe lam laot nyan
Leupah sinan troh laot bahtra
Abeh leupah bandum laot
Rab troh po cut u nanggroe raya

Leumah Makah deungon Meuse
Pucok krueng Ne luah raya
Luah sangat hana sabe
Ka neutren le di antara

Neusujud le Cut Usman
Sret keunan u lua kuta
Cut Usman tamong mideuen
Treh le u leuen rumoh bunda

Cut Usman neumeuuroh
Soe di rumoh ma lon bunda
Syahri Banun deungo meunan
Beudoh rijang jak peunyata

Ban neukalon Cut Usman
Neugrop yoh nyan neucom neuwa
Jak woe aneuk u meuligoe
Po samlakoe ka tagisa

Cut Usman neukek sajan
Ateueh tilam rab ngon bunda
Wahe aneuk meuntroe intan
Ka tariwang jak tanom ma

Na troh tajak po samlakoe
Ubak putroe u Antara
Troh ulon jak ubak putroe
Jeuep-jeuep nanggroe lon meuraba

Padum mate dalam laot
Padum nyang sret lam ie raya
Lon he po ma udep mate
Meunoe sabe lam seungsara

Mantong udep tuan putroe
Aneuk dua droe tan binasa
Bak lon sangka tan udep le
Pat ka mate ngon aneukda

Jinoe ka troh ulon riwang
Lheueh talo prang nanggroe Indra
Syahri Banun that sukaan
'oh woe intan Raja Muda

Teutap sinan lapan uroe
Neukheun meunoe ubak bunda
Wahe ma po pirak lipat
Lon jak siat ubak cutda

Putroe Meulu lon jak kalon
Trep that han tom lon eu rupa
Saleh mantong saleh tan le
Jameun ka cre saboh masa

Lon jak siat he bunda droe
Bak nanggroe Pulo Sumatra
Insya Allah po samlakoe
Rijang keunoe lom tagisa

Cut Usman neutren sidroe
Euncien bak jaroe le neucinta
Teudong burak di hadapan
Neupasang yoh nyan uleh banta

Jiteureubang tamse kilat
Deungon siat han meuho ka
Dua uroe jiteureubang
Sampoe datang ubak cutda

Troh le keunan bak meuligoe
Leumah putroe kalon banta
Jiplueng laju bantujoh droe
Jak mat jaroe ngon syeedara

Muwa meucom deungon putroe
Po samlakoe baro gisa
Jimumat-mat bantujoh droe
Tanyong meunoe bak adekda

Na troh tajak po samlakoe
Ubak Putroe Meurak muda
Cut Usman seuot pantah
Deungon tuah tujoh gata

Meureutoh laot lon jeumeurang
Nyawong hilang han lon kira
Mate udep lon barangjan
Lon cintakan tujoh gata

Deungon tuah gata intan
Troh lon tuan nanggroe Indra
Lon kheun gata he boh ate
Pat ka mate po bentara

Geunap malam lon leueng jaroe
Beu troh tawoe ubak cutda
Adat han troh gata tawoe
Ulon boh droe dalam rimba

Bahle mata dalam laot
Bahle eungkot meukeurija
Gohlom mate he cut indah
Mantong tuah adek gata

Padum lawet lonsinoe tan
Nyawong badan sajan gata
Sirasa nyum lon eh sajan
Cut intan dalam istana

Ka troh lon jak deungon riwang
Bungong peukan tuah gata
Putroe Meulu deungo meunan
Mameh reunom ngon ie muka

Putroe tujoh ate ringan
'oh ka keunan Raja Muda
Teutap sinan po samlakoe
Tujoh putroe sidroe raja

Geunap uroe lam sukaan
Cut Usman deungon cutda
Buet tan laen bungong puteh
Tan teuseureh dalam dada

Cut Usman eelia Tuhan
Padoli tan keu buet donya
Han neupubuet teugah Tuhan
Sebab gop nyan that eelia

Lagipi ka leupah sumpah
Cut Basyah deungon syeedara
Putroe tujoh bak siuroe
Ngon samlakoe peugah haba

Wahe adek bungong uroe
Nyoe lon peugoe haba nyang ka
Haba dilee yoh saboh roe
Po samlakoe yoh cut gata

Gata jiboh le Yahudi
Jiba u gle gunong raya
Gata adek jipoh mate
Meunan pike dumji rata

Jinoe mantong jitroh deundam

Gata intan jipufana

Bak jisangka gata tan le

Ka lheueh mate dilee masa

Meunyo jithee gata intan

Baranggajan jijak mita

Yahudi nyan adoe badan

Le saktian tarek mintra

Jipeulara saboh hantu

Raya laku sang geureuda

Jibri umpeuen lheueng nam uroe

Jidrop sidroe manusia

Hana soe theepi meusidroe

Yahudi nyoe tarek mintra

Jinoe adek jih tajak poh

He teungku jroh tajak mita

'oh meuteumeung tapoh mate

Bek tawueh le si ceulaka

Meuhan tapoh Yahudi nyan

Cut Usman mate gata

Ureueng nanggroe dum jitipee

Aneuk asee tarek mintra

Jinoe adek jih tajak poh

He adek jroh narit hamba

Jipeugot meuh bak on kayee

Meunan lagee balek mata

Jinoe jiduek dalam peukan

Berujualan maniaga

Dalam banda nanggroe Sya'iran

Jih di sinan tajak mita

Meuka tapoh nyawong simpan

Tulong Tuhan atueh gata

Soe laen poh jih han mate
He boh ate meukon gata
Lompi kamoe han jeuet meujak
'oh meurumpak jipufana

Nyan he adek ka lon peugah
Beudoh pantah tajak mita
Cut Usman seuot pantah
Insya Allah wahe cutda

Meuna tuah gata tujoh
Mate musoh tinggai hamba
Idin cutda keu lon sidroe
Bak uroe nyoe heundak bungka

Beu seulamat he samlakoe
Tinggai putroe jimoe rugha
Jimoe bae bantujoh droe
Weueh samlakoe Raja Muda

Cut Usman bungka leugat
Neutakat seulatan daya
Pat nyang malam teuma neudom
'oh beungoh lom le neubungka

Lhee uroe peurjalanan
Sampoe yoh nyan u nanggroe raya
Nanggroe Meuse keunan sampoe
Neujak sidroe sayang raya

Tan soe turi bungong uroe
Pakaian di asoe cek-bek raya
Bungka laju Cut bangsawan
Nanggroe Sya'iran troh neuhalala

Dalam banda banta tamong
Neueu ureueng rame raya
Neueu geudong peunoh asoe
Rame tuloe dalam banda

Neujak laju cut puteh di
Bak Yahudi nyang neucinta
Meuteumeung le ngon samlakoe
Neukhuen meunoe pantah sigra

Assalamu'alaikom he dalem droe
Ka troh lon nyoe ubak gata
Gata dalem biek Yahudi
Biek teumaki bangsa gata

Masa dilee kee kajak boh
Gata kupoh kutueng bela
Gata dalem tan udep le
Jinoe mate tinggai donya

Ban jideungo haba meunan
Beungehji ban uleue bisa
Jibeudoh le teubiet uleuen
Meunoe jikheun si ceulaka

Katheun keunoe buet jaroe kee
Jinoe kathee tinggai donya
Lheueh jikheun nyan gaduh keudroe
Sosah jinoe banta muda

Jipeujeuet droe hantu syetan
Cut Usman jimeung daya
Jimat di pha cut bintang sret
Jimeung peulop dalam donya

Troh 'oh keuieng dalam bumoe
Cut samlakoe pantah sigra
Neutupeue le raja seudang
Peurasaan meugriet raya

Allahuakbar neukheun meuhad
Leukang leugat jaroe dua
Hantu syetan leukang jaroe
Po samlakoe lheueh u lua

Lom ka teudong di hadapan
Jimeung kuran banta muda
Cut Usman neukheun pantah
Ngon bismillah le neubaca

Neusuet peudeueng dalam sarong
Neutak rancong putoh dua
Putoh takue tinggai badan
Jiteureubang dalam hawa

Di manyang ka jeuet ngon bulee
Ulah lagee sang geureuda
Jisujud le pantah han soe
Po samlakoe jimeung sama

Deungon peudeueng neutak simban
Putoh meukhan jeuet le dua
Gadoh bangke hana mupat
Jeuet le leugat rimueng raya

Jikeumeung kap po samlakoe
Peudeueng di jaroe neutak sigra
Mate rimueng sinan neucang
Jeuet lom rijang dumna naga

Jipeurab dum bak samlakoe
Panyang gigoe nam-nam deupa
Jikeumeung 'uet po samlakoe
Neucok jinoe tungkat pusaka

Neubet tungkat rijang-rijang
Neupoh keunong bak keupala
Naga gadoh dum sinaroe
Po samlakoe mubahgia

Naga gadoh han le mupat
Timoh leugat uteuen rimba
Timoh uteuen that barollah
Meugriet leupah Raja Muda

Cut Usman sang teumakot
Uteuen seupot rimba raya
Kayee le that dum sinaroe
Po samlakoe meunyum lia

Tungkat neumat nibak jaroe
Neubet keudroe bacut saja
Sare neubet 'oh meulayang
Teubiet rijang sidroe raja

Geunta Sukma nan geuuroh
Ngon rupa jroh that peurkasa
Jidong leugat di hadapan
Jitanyong ban peue na sabda

Cut Usman peugah rijang
Uteuen padang tamse rimba
Gaseh gata deungon sayang
Uteuen landang taboh sigra

Geunta Sukma deungo meunan
Jideumpek ban teuga raya
Teuka ribot kreueh sileupah
Uteuen reubah dum meutimpa

Abeh uteuen dum ribot me
Han sapeue le miseue nyang ka
Yoh nyan hantu jisumpom droe
Lengo bumoe miseue geumpa

Deungon tulong Tuhan sidroe
Lheueh samlakoe dalam bahya
Mate Yahudi hantu pindoe
Jinoe neuwoe Raja Muda

Cut Usman leugat neuwoe
Ubak Putroe Meulu Rakna
Siploh uroe peurjalanan
Sampoe yoh nyan lam istana

Putroe kalon Cut Usman
Jitren yoh nyan bandum cutda
Jimat adek bacut sapo
Peukek laju atueuh geuta

Jicok bate Putroe Meulu
Jime laju keu cut banta
Nyoepat ranup he adek jroh
Bungong jaloh troh.tagisa

Lon meukaoi jeuep-jeuep watee
Bungong keumbee troh bak cutda
Cut Usman seuot pantah
That meutuah bandum gata

Seulamat lon bungong mirah
Hana reubah nibak bahya
Ulon teuoh he cutda beh
Gata tujoh lam lon cinta

Lon eh malam sang lon lumpoe
Lon eh uroe di mata-mata
Meunan sabe lam teugoe-goe
Rindu kamoe akan cutda

Teungoh-teungoh neukheun meunan
Troh idangan u keue banta
Pajoh adek bu ngon asam
Eungkotpi tan bu ngon sifa

Tabeue masen bak takheun-kheun
Lon teumaguen sidroe dua
Cut Usman seuot leugat
Kru seumangat di jeumala

Takheun cutda hana eungkot
Jarak laot tan soe mita
Bak lon cutda han peue peugah
Sang-sang reubah keubeue dua

Laen lumo kameng gasi
Meunan mise bak adekda
Lon niet neubri gunong manikam
Sang neupulang nanggroe dua

Meunan bak lon bungong peukan
Putroe intan makanan gata
Cut Usman makeuen laju
Na sigeutu 'oh mumada

'oh ban lheueh bu po samlakoe
Neusrah jaroe Raja Muda
Peukek idang Putroe Meulu
Tinggai teungku dalam tika

Cut Usman le tidoran
Putroe intan le duek lingka
Ceupet ulee deungan badan
Beudak sajan minyeuk ata

Teungeut mangat Cut Usman
Putroe intan ngadap lingka
Meunan sabe watee malam
Cut Usman jarak hana

Putroe Baniroh bak simalam
Deungan Usman neumeuhaba
Wahe adek po samlakoe
Deungo kamoe sikrak haba

Jinoe gata puteh licen
Lon peukawen ngon Cut Rakna
Ngon si Meulu lon peunikah
Bungong mirah bek cre dua

Kamoe nam droe ate mangat
Meuka sapat gata dua
Bu meusampe lon peutimang
Mangat seunang ate cutda

Cut Usman seuot laju
Cutda teungku di jeumala
Pakri cutda lon meunikah
Leupah sumpah lon ngon gata

Lon niet gata saboh ibu
Bungong meulu meunan kira
Bek he cutda lon meukawen
Gata bandum lon syeedara

Jampang lon jak 'oh troh buleuen
Gata bandum boh bicara
Meunan bak lon bungong tanjong
Bek he ulon nyang kon jeumba

Hana neugrak uleh Allah
Bungong kipah lon adekda
Cut Baniroh han le tuto
Teuduek tahe putroe muda

Hom he adoe bungong tanjong
Ban nyang hukom nibak gata
Teutap sinan po samlakoe
Sajan Putroe Meulu Rakna

Uroe malam rindu deundam
Putroe intan ate suka
Umu sathon sajan putroe
Po samlakoe laen kira

Ka teuingat janji putroe
Deungon putroe indah rupa
Jinoe lon jak nanggroe Meuse
Han jeuet trep le sinoe lama

Teuma neuhei Putroe Meulu
Cutda teungku lon na haba
Idin keu lon bantujoh droe
Hajat lon nyoe heundak bungka

Lon jak meuen meulhee uroe

Rijang keunoe ulon gisa

Jiseuot le Putroe Meulu

Adoe teungku Raja Muda

Ho tameung jak wahe raja

Tinggai cutda leupah adoe

Lon niet siibu ngon sibapa

Pakon gata taboh kamoe

Han meusampe lon peulara

Keunoe lon ba dilee puroe

Jinoe rayek adoe gata

Keu cutda han ingat budoe

Wahe adek po Cut Usman

Pakon meunan tanglong nanggroe

Meutan gata wahe buleuen

Soe keurajeuen lam nanggroe nyoe

Reuloh kuta deungon mideuen

Hana ureueng laen sidroe

Cut Usman teuma seuot

He cutda cut deungo adoe

Hajat ulon jak meununtut

Lon meung jak beuet kon lon boh droe

Do'a beu le bak cut intan

Cutda badan keu lon sidroe

Talakee tulong nibak Tuhan

Quruan goh baek seuleusoe

Kon lon jak ngon saket ate

Kon dalam gle lon jak boh droe

Nyan he cutda cuba pike

Cuba syawe tuto lon nyoe

Meunan neukheun Usman Basyah

Meunan jipeugah bak cutda droe

Hana jikheun jak meunikah
Tan jipeugah laen bagoe
Idin cutda lon seukarang
Lon jeumeurang bungka sidroe

Meuna untong cutda badan
Troh lon tuan teuma dudoe
Boh pisang mah masak di lubang
Makanan cicem sibaree-baree

Meutuah cutda meuteumeung pulang
Jikalee malang mate meuseubee
Lheueh neukheun nyan neutren laju
Moe meu'u-'u bantujoh droe

Putroe bae bangon Meulayu
Mangat that su neudeungo bunyoe
Aye pasang limpah keu darat
Cina meunginjak di ateueh batu

Adek lon tuan leupah beurangkat
Lon halarat peurintah Tuhan
Anak elang jisma ikan
Sutra hitam dari gakinia

Jangan lama adek beurjalan
Cutda intan atenya ragu
Tuan tuan naek keulapa
Bagoe keusawi upeh seulodang

Jakalee adek heundakkan bungka
Tinggaikan saya kaen sipinggang
Tuan tuan jahetnya baju
Ambek beunang di rumah saya

Jangan adek buangkan aku
Ingar-ingatkan guna seutia
Meunan bae Putroe Meulu
Jitren laju po samlakoe

Teubiet laju po Cut Usman
Dalam padang neujak sidroe
Sira neujak meunoe pike
Dalam ate payong nanggroe

Bah ulon jak nanggroe Meuse
Bak putroe ti dilee puroe
Neusuet euncien nibak jari
Burak sakti troh le teuka

Teudong burak di hadapan
Cut Usman pasang sigra
Neupasang le bunong keumang
Jiteureubang dalam hawa

Jiteureubang tamse kilat
Jitakat bak awan migas
Limong uroe jiteureubang
Sampoe yoh nyan u nanggroe raja

U nanggroe Meuse keunan datang
Teungoh malam mantong jula
Buleuen peungeuh peuet blah **uroe**
Deuh meuligoe deungan kuta

Tingkap meuligoe bandum teuhah
Peungeuh leupah deuh u lua
Putroe jaga goh tidoran
Beuet Quruan putroe muda

Cut Usman kheun bak burak
Kacuba jak lam istana
Cuba jak eu siat le kah
Putroe indah mantong jaga

Yoh nyan burak jihah babah
Teubiet pantah cicem pala
Jitren leugat lam me uligoe
Jieu putroe sidroe saja

Jiteubiet le pantah rijang
Jiteureubang troh bak raja
Jipeugah le bak samlakoe
Jaga putroe sidroe saja

Ureueng laen bandum pangsan
Putroe intan sidroe jaga
Cut Usman deungo meunan
Sujud yoh nyan lam istana

Neusujud bak tingkap meuligoe
Po samlakoe tamong sigra
Neumeuinseuen yoh masa nyan
Nibak Tuhan Po alam nyoe

Ya Ilahi wa ya Rabbi
Tuhan Gani Po lon sidroe
Bek jeuet 'aeb keu lon neubri
Lon bek keuji bak malam nyoe

Cut Usman beuet hekeumat
Pangsan rakyat lam meuligoe
Teuma neukek laju leugat
Troph u rambat po samlakoe

Hingga troh bak pinto inong
Ka teuceungon raja nanggroe
Jieu rupa putroe bungong
Neutamong laju bak putroe

Tamong leugat leupah pinto
Dara baro eu samlakoe
Dalam ate ka teusawo
Putroe tahe mandang keudroe

Jibri saleuem teuma sigra
Keu raja nyang tamong keunoe
Tadeungo meusye ngon suara
Jimeusapa si nyak putroe

Kayee rampak jroh hijo on
Meuhimpon cicem sinaroe
Nateu keunoe tuanku ampon
Ulon seuon dua jaroe

Kureueng meujeulih kamoe duson
Meu'ah ampon tuanku droe
Nabu kamoe cut ma ubon
Datang ulon bak sambinoe

Lon sret keunoe bagoe ie mbon
Angen peutren lam nanggroe nyoe
Putroe jok ranup lam bate
Neusambot le po samlakoe

Ranup uteuen lon duek lam gle
Han meusampe rasajih nyoe
Tuanku bek saket ate
Bek neuruhe 'aeb kamoe

Kru seumangat cut boh ate
Bak lon mise intan pudoe
Bak gata nyoe ranup uteuen
Bak lon buleuen seulaseh roe

Lonpi adek that reuen-mareuen
Nam ploh buleuen datang keunoe
Abeh laot lon jeumeurang
Nyawong hilang jeuep-jeuep sagoe

Raja pajoh ranup sigapu
Lom jimeusu po sambinoe
Pane nanggroe trep that lon eu
Peue na napsu neujak keunoe

Padum mate lon lam laot
Sangkot pawot lon he putroe
That seungsara lon jak lon woe
Gata adoe that lon pakoe

Jeuep-jeuep gampong lon peuteuka
Troh bak gata he sambinoe
Bitpi lon jak seunja-seunja
Siblah mata klam ngon tuloe

Bitpi baek taeu rupa
Ate luka lam pruet kamoe
Jeuep-jeuep tabib lon peuteuka
Rok-rok masa ate seungkoe

Saleh mate lon troh masa
Hilang nyawa peunyaket nyoe
Meutan ubat he adekda
Akhe masa umu sampoe

Kariman Benti teuma seuot
Peue nyang patot ubat jinoe
Teungku peugah ulon ikot
Lam laot yue cok keunoe

Peue tuanku jeuet keu ubat
Lon mita pat seugala nanggroe
Ate saket puleh siat
Peugah deelat bak ulon nyoe

He adek cut bungong keumang
Ubat nyum sang lam pawok nyoe
Kon di miyup kon di manyang
Nyak cut bintang maklum keudroe

Ubak saket cicem nuri
Cut putroe ti umpung pat jinoe
Puleh saket that beureuhi
Meunyo tabri wahe putroe

Lon kalon na lon tupat tan
Ubat nyan dalam rumoh nyoe
Siulah-ulah bagoe ensan
Umpung meunan sang meuligoe

Sang-sang jeuoh sang-sang rab that
Lon keumeung mat han troh jaroe
Lon eu kaem ulon lihat
Han lon tupat lam gampong nyoe

Ate puleh meugeutem bri
Saket lagi meuhan rela
Sang teusinyom Kariman Bentii
Tuto takwi sang haba nyoe

Pat tuanku cicem nuri
Ulonteu bri meuna sinoe
Pakri rupa wahe doli
Keu ubatpi pakri bagoe

Han tom lon deungo bak jad-majad
Mustahe that habaneu nyoe
Ate saket ate ubat
Meunan nyang brat lon fam sinoe

Tuboh saket na alamat
Nyoe teuga that lon eu bagoe
Tuto tuanku sang meutakwi
Han lon tukri fam haba nyoe

Adat lam kruengpi lhok tuwi
Soe beurani teuka keunoe
Meulaenkan ureueng nyang hakikat
Nyang jeuet lumpat lam tuwi nyoe

Ureueng hampe ngon halarat
Laot darat saban sit roe
Narit teungku meunan lagee
Lon nyang dungee meusoe-gumoe

Han troh pike lon pangulee
Tan eleumee bak lon fam nyoe
Bitpi meunan wahe doli
Cicem nuri na sit sinoe

Jinoe cintra tuanku bri
Lon cuba ci bri cicem nyoe
Cintra pudoe deungon intan
Bak cicem nyan jiteueng teueng droe

Meutan nyan tuanku ampon
Han jeuet ulon drop cicem nyoe
Meunan hajat lon po junjongan
Meutan nyang nyan hajat han sampoe

Meukek na nyan tuanku bri
Cicem niri lam rumoh nyoe
Cut Usman deungo kheun siti
Iem beurdiri po samlakoe

Akai sadak 'oh jipike
Gadob syawe haba putroe
Sangat lisek bungong pade
Dalam ate raja sidroe

Pcue nyang kukheun jeued jitaleh
Akai leubeh si nyak putroe
Bahle lon kheun haba saheh
Han ek lon preh beungoh uroe

He putroe cut wareuna ie meuh
Deungo beu deuh lon hareutoe
Ubo-ubo lon sangka leumak
Santan meulimbak lon sangka dadeh

Nyang jeuet adek keunoe lon jak
Dilee ngon si nyak janji ka abeh
Lom guda plang guda peulanggi
Guda meunari di ateueh buket

Pakon he adek taubah janji
Sireh tabagi pineung meukulet
Adat takeumeung pajoh pawoh
Dong di baroh pupo geulawa

Meūna hajat keu ureueng jeuoh
Beu gȏt tapupueñ bek leupah bungka
Leuek jikutru di cong keutapang
Siwah datang ka mupaloe

Narit he adek bek meuayang
Gata cut bintang aneuk kutusoe
Bungong rom ngon bungong rihan
Bungong peukan bee meulaen

Masa dilee meudeh padan
'oh troh lon tuan ka meulaen
Limbang-limbang pade sipulot
Mayam teusangkot ateueh peutoe

Gaseh adek gaseh di mulot
Tidak sampoe keupada ate
Baek-baek cahya peurmata
Jika dihupam cahya peureuseh

Sudah dikeunai deungon mata
Di dalam ate tidak digaseh
Teuma seuot Kariman Bentı
Jitaleh le cut bangsawan

Seulaseh gilang-geumilang
Tanam di miyup kayeenya mate
Adek gaseh bukon keupalang
Dari hidup sampoe mate

Keuranji tumboh di ladang
Di dalam taman tumboh keuladi
Sudah beurjanji beurteupok tangan
Di mana buleh beurubah lagi

Cut Usman seuot pantah
Ka neutaleh haba cutti
Seulaseh beurjampu jati
Batangnya mirah bagoe keusumba

Sudah digaseh di dalam ate
Dagang ini menjadi hamba
Meuk jipo-po di cong siganda
Lon eu rupa meuek meutren

Lon sangka adek kon narit seunda
Nyang jeuet lon teuka bak puteh licen
Euncek Amat ureueng Peulimbang
Malee-mumalee deungon cut abang

Akulah ini muda seukarang
Mulotnya maneh lidah beurcabang
Pade sipulot siteumon dulang
Ambek keureundang dalam kuali

Rupapun jahat bangsapun kurang
Apa cek pandang keupada kami
Po Cut Usman meunan neukheun
Putroe buleuen seuot meunoe

Neudeungo lon po meukuta
Kon lon seunda narit puroe
Teungku deungo lon peuhaba
Miseue meukuta deungon kamoe

Cut Kariman lom mupanton
Akhe ngon phon meuduek adoe
Boh deulima mupangsa-pangsa
Di dalam pangsa bijinya mirah

Bukon tuanku lon tilek bangsa
Sama-sama darahteu mirah
Bungong jeumpa jeumpa keubiru
Bunganya rampeng di dalam puan

Tujoh kali simalam rindu
Tidak sampe keupada tuan
Dualah tiga kapai di teulok
Bunga seulipok di dalam puan

Malam dan hari ateku mabok
Umpama punggok rindukan bulan
Puhen seurahet di ateueh buket
Daon kireman siraja magoe

Jangan tuanku atenya saket
Tuboh dan nyawa relalah kamoe
Boh punti thok lawan bu leukat
Boh pisang klat peunajoh cicem

Ulon ikot ban suroh deelat
Peue nyang hajat jinoe ulon tem
Meunan jikheun uleh putroe
Po samlakoe yoh nyan neukhem

Teuma seuot linto baro
Haba bek le jeuet meukawen
Lon meuhajat jeuet keu judo
Hai adek e bungong sunteng

Tuan putroe sang teuseungeh
Muka rumeh hana ceuken
Wahe teungku uleebalang
Hana wayang jadeh lon tem

Di lon ateku that bimbang
Nyum bek leukang ngon teungku lem
Jinoe putroe nyang meurasa
Got lon gisa jinoe lon tren

Lon bri seulangke ubak raja
Peugah haba lon meukawen
Bek gop upat geutanyoe dua
Dalam donya gop kheun baten

Nyang bit janji ka lheueh dua
Lon ngon gata bungong sampeng
Abeh peugah po samlakoe
Seuot putroe bek le neutren

Bahle sinoe lam meuligoe
Sajan lon nyoe neuduck sapeng
Bak ayahda lon yue peugah
Lon deungo titah tabeue masen

Meuhan idin bak ayahda
Bak lon rela nyawongku len
Bek neujak le meusideupa
Po meukuta ngon cut leunteng

Bahle sinoe lam meuligoe
Bek neuwoe-woe le ho laen
Bek he putroe meunan dilee
Bungong keumbee jinoe lon tren

Teumeureuka lon **bak** Allah
Buettan salah bungong sunteng
Bek tuanku neumeudawa
Mate hamba meutan po lem

Ulon top droe nibak dada
Mangat fana meunyo neutren
Raja Muda yoh nyan sosah
Han jeuet langkah le ho laen

Neupeujok **droe** ubak Allah
Ban peurintah gata lon tem
Teutap sinan po samlakoe
Deungon putroe **rupa** canden

Watee malam putroe muda
Ateueh geuta eh cut leunteng
Cut Usman sajan dua
Ateueh geuta tan pat laen

Teneh sinan sapat dua
Putroe muda ate ngeuren
Bitpi neueh dua sapat
Hana tom rab putroe leunteng

Cut Usman waliullah
Saleh leupah buet lam baten
Di cut putroe eh beu sapat
Tuboh beu jab bek ban laen

Raja hana neueh sapat
Bungong riwat sangat malem
Putroe sosah geunap masa
Seubab raja rab han neutem

Bak siuroe neumeuhaba
Ubak raja putroe neukheun
Pakon meunoe po meukuta
Deungon hamba han rab badan

Sang-sang ulon ureueng budok
Ngon rupa brok miseue musang
Tan got rupa lon meukuta
Boh lam paya umpeuen bibrang

Meunyo sinoe dalam leupu
Meujampu ngon po junjongan
Meujampu meuh deungon teumaga
Teuboh meukuta roa lon tuan

Abeh teuboh dum mutiara
Teumaga meujampu sajan
Bah lon boh droe dalam paya
Bahle buya lon jikuran

Nibak teuboh po meukuta
Gotkeu hamba bek na sajan
Meunan jikheun putroe muda
Seuot raja rijang-rijang

He putroe cut bungong pade
Bek weueh ate gata intan
Nyang jeuet bek rab lon ngon gata
Hana rela nibak Tuhan

Sebab gohlom lon meunikah
Putroe indah cahya intan
Han jeuet rab lon ngon cut indah
Buet nyoe tugah nibak Tuhan

Teumeureuka lon nibak Rabbi
He putroe ti bek le kiam
Bahle jinoe lon meunikah
Mangat sudah buet nyoe rijang

Bek kiam le putroe indah
Insya Allah nanti malam
Hingga seupot le ngon uroe
Tuan putroe ate seunang

Cut Usman waliyullah
Mohon titah nibak Tuhan
Ya Ilahi wa ya Rabbi
Tuhan neubri keu lon rijang

Neubri beu troh Teungku Syiah
Bak cut indah putroe seudang
Neuseumbahyang dua raka'at
Mohon rahmat nibak Tuhan

Lheueh beuet do'a po samlakoe
Keunan lhee droe teungku datang
Neupeunikah uluh teungku
Bintang timu bungong karang

Lheueh peunikah Raja Muda
Teungku gisa woe bak makam
Beudoh sinan bungong puteh
Laju jak eh lam keuleumbu

Deungon uroepi ka mureh
Cut puteh teutap beuradu
Aneuk tulo di cong ara
Cicem pala dicong langsat

Meunoe sabe han meurasa
Bah lon cuba balek ayat
Miseue haba ureueng tuha
Meugot rupa le soe hajat

Nanggroe makmu le areuta
Hana reuda teuka rakyat
Untong-untong'jeuet keu raja
Beue Rabbana siklep-siklap

Haba putroe mangat ukeue
Adat tabeue na mupat-pat
Bek tapeugah baranggapeue
Maken u keue leubeh ladat

VI. MEUKAWEN NGON PUTROE KARIMAN BINTI

Ammia bakdu wahe po lem
Jinoe laen lon boh ayat
Soe nyang deungo bek neukhem-khem
Lon goh ladem peugot hikayat

Puteh-puteh bungong geutoe
Angen tampoe sret lam bakat
Nyoe lon peugah lom keu putroe
Ngon samlakoe raja deelat

'oh ban jaga bak beuradu
Putroe meulu beudoh leugat
Tren jak manoe ngon tuanku
Bungong meulu nyang puteh that

'oh lheueh manoe bandua droe
U meuligoe neukek leugat
Duek bak tika nyang meusujoe
Cut putroe ngon raja deelat

A te mangat geunap uroe
Bungong geutoe meusampe that
Meusitapak hana tom cre
Sipade han tom beurangkat

Uroe malam rindu ate
Bungong pade ceudieng leukat
Jipot angen timu jatoe
Peuraho woe dalam bakat

Hana tiwah rotdeh rotnoe
Bandua droe sang geusipat
Bak beuramoe ateueh pante
Meurante di gunong le that

Miseue sakin saboh kande
Sabe-sabe ngon cut ubat
Jipot angen timu padang
Karam gongkang angen kreueh that

Uroe malam ate bimbang
Hantom reunggangpi meusiat
Hingga meugah bak ayah putroe
Ureueng sidroe sinan teutap

Han tom jarak geunap uroe
Sajan putroe sinan sapat
Di meuligoe han tom jarak
Sitapak han tom beurangkat

Baranggaho han tom neujak
Bungong meurak ka mubee that
Saket ate raja raya
Jiyue jaga nibak rakyat

'oh kateumeung si ceulaka
Kadrop sigra le kaikat
Keunoe bak kee leugat kaba
Kumeung sula bek paleh that

Aneuk meuntroe aneuk raja
Bek kakira manyang pangkat
Dum sipai han le jieh
Jidong bareh banja teupat

Ulee-ili keunoe keudeh
Beude puteh dum meukilat
Hana meuteumeung po samlakoe
Leugat jiwoe ubak deelat

Lam meujaga uroe malam
Meusidroe tan na meundapat
Ban neudeungo meunan haba
Poteu raja neuiem siat

Raja neuhei sidroe dayang
Jak u dalam bak cut ubat
Tatueng keunoe putroe muda
Na haba sikrak lon urat

Dendayang jak bak si nyak ti
Trox keunan le laju leugat
Jipeugah le bak putroe ti
Amanah doli yue woe siat

Putroe peugah bak Usman
Idin laman wahe deelat
Lon woe siat bak ayahda
Kadang peue na nyang meularat

Bak masa nyan Raja Muda
Ateueh geuta raja deelat
Sinan neuduek bintang pari
Bak keurusи nyang indah that

Neukheun ubak tuan siti
Gata dek ti gisa leugat
Meunyo tajak wahe putroe
Keu ulon nyoe bek takheun had

Bek tapeugah lon di sinoe
Geupoh kamoe uleh deelat
Lon takot that geupoh mate
He cut kande nyang meusurat

Han tom lon eu aneuk beude
Di dalam gle sideh teumpat
Teuma seuot bintang peureuseh
Han lon pateh tuto deelat

Ureueng sulet han jeuet pateh
Meunoe meudeh utohpi that
Hingga teuma putroe muda
Beudoh sigra neuwoe leugat

Troh u rumoh bak ayahda
Neupareksa laju leugat
Wahe aneuk bungong jeumpa
Na haba sikrak lon sasat

Na lon deungo gop peuhaba
Jinoe gata meulaen that
Pane ureueng he aneuk droe
Di meuligoe sinan teutap

Peugah aneuk ubak kamoe
Ulonteu nyoe maleepi that
Kadang soe-soe he aneukda
'aeb nama raja deelat

Lagi ulonpi ka tuha
He mutiara nyang meusurat
Teuma seuot putroe muda
Sabet beuna wahe deelat

Uroe malam di istana
Sideupa han tom beurangkat
Nama geuheui Usman Basyah
Rupa indah sang malakat

Jinoe sideh dalam kuta
Di istana ngon lon sapat
Ngon suara jroh that laku
Sang ie madu ngon bu leukat

Geukheun bak lon geunap uroe
Gampong nanggroe tanoh Arab
Bak lon kalon he ayahda
Aneuk raja teuntee meuhad

Kon aneuk sibarang bala
Bak rupa meunan lon takat
Meunan narit putroe muda
Poteu raja tanyong leugat

Pakri laku he aneukda
Bak rupa nyang ka talihat
Teuma seuot putroe muda
He ayahda peue neusasat

Sinan sabe di meuligoe
Geunap uroe ngon lon sapat
Deungon rupa jroh han bagoe
Jeuep-jeuep nanggroepi tan dapat

That meusampe akai budoe
Nyang jeuet lon nyoe harok lon that
Beuthat neupoh lon bu mate
Han lon bri le geubeurangkat

Beuthat mayet takue neukoh
Gop nyan saboh ulon hajat
Hana lon tem baranggasoe
Gop nyan sidroe harok lon that

Beuthat raja beuthat meuntr^{ne}
Bah jitiiek droe dalam bakat
Allah Allah he nyak putroe
Gata sidroe angkara that

'aeb nama lon jeuep nanggroe
Gata putroe ka mubee that
Gata aneuk sultan raya
Lon ayahda ka malee brat

Jinoe aneuk tayue jak tren
Bungong tanjong bek le hajat
Lon bri laen aneuk raja
Nyang jroh rupa manyang pangkat

Hana lon tem po meukuta
Beuthat raja manyang meurtabat
Meuhan neutueng lon meukuta
Bahle fana di keue deelat

Meunan narit putroe muda
Seungap haba raja deelat
Jibeudoh le teuma sigra
Jiwoe lanja ubak teumpat

'oh troh sampoe u istana
Raja Muda tanyong leugat
Peue na saket poteu raja
Laen peue na nyang meularat

Teuma seuot putroe muda
Suka-suka neuhei siat
Meunan narit po jroh rupa
Seungap haba 'oh nan teutap

Padumna trep teuma dudoe
Po samlakoe sinan lambat
Bak simalam bungong geutoe
Duek ngon putroe sinan sapat

'oh lheueh makeuen po samlakoe
Neukheun meunoe pirak lipat
He putroe cut bungong geutoc
Keu ulon nyoe idin siat

Bak da Meulu siat lon woe
Lon di sinoe trep ka lambat
Bak putroe tujoh han tom lon woe
Ulonteu nyoe hana tom rab

Teuma seuot putroe muda
Pajan teuma na lon ikat
Tan lon yue j.k tan lon yue woe
Ban suka droe pubuet leugat

Cit ka kada di lon dumnoe
Lon paban nyoe nyang ka babat
Kayee gahru di Peulimbang
Limo maneh di keubon Cina

Sudah untong nasibku malang
Sudah beurputik meunjadi bunga
Meunan neukheun tuan putroe
Po samlakoe seuot leugat

Meunyo meunan he cut putroe
Keu ulon nyoe beunciteu that
Peuekeu laba lon duek sinoe
Bah uroe nyoe lon beurangkat

Meunan narit Raja Muda
Po jroh rupa neuiem seungap
Cut Usman lom kheun pantah
Neupeugah haba nyang sigap

He putroe cut bungong tanjong
Idin keu lon bungong meulu
Lon jak saweue cutda putroe
Rijang keunoe ulon riwang

Meunan neukheun le samlakoe
Seuot putroe meunoe laku
Patot jinoe mee neuboh droe
Ka troh sampoe hawa napsu

Jinoe patot ka mee neujak
Lon ka rusak neupeulaku
Lagipi ka peunoh leuhak
Ka pueh galak han le rindu

Meunan narit tuan putroe
Po samlakoe seuot laju
Bukon meunan he sambinoe
Deungo kamoe meusigeutu

Nyang jeuet lon jak tuan putroe
Buettan lon nyoe ka teulalu
Nibak raja gohlom meuthhee
Bungong keumbec pakri laku

Lon kalon hai raja nanggroe
Meulhee uroe lon cuba eu
Tabri maklum uleh gata
Pakri haba bak tuanku

Kadang-kadang hana suka
Geupoh hamba dalam lepu
Lon takot that geupoh mate
Hai cut kande nyang mangat su

Han tom di lon kumupake
Lon dalam gle gampong ma ku
Han tom di lon kumat peudeueng
Lon lam uteuen han tom lon eu

Adat geupoh ulon sudroe
Hana putroe soe tueng bela
Meuhad mate lon di sinoe
Gata putroe han binasa

Seuot putroe bungong mirah
Jikheun pantah nibak raja
Bek tuanku seulimbot ngon jeue
Ka lon tupeue po meukuta

Patot lam krueng buyaji tan
Patot biram hana bisa
Patot gajah hana gadeng
Patot leumbeng hana mata

Patot beururu hana meujen
Lam ie masen hana buya
Patot laot hana darat
Patot pukat hana kaja

Patot krueng hana pante
Patot gle hana data
Patot raja tan keurajeuen
Patot mideuen timoh rimba

Meunan jikheun putroe intan
Cut Usman paleng muka
Cut Usman ka teusinyom
Mameh reurom ngon ie muka

Seureuta panton le di babah
Meunoe ulah le beurkata
Kapai Men Cina di laot Silan
Heundak beurjalan nanggroe Ierupa

Hamibanya ini keu sini datang
Meuncari lawan raja nyang beusa
Buah duren di teungoh jalan
Ambekkan daon dimakan guda

Kalee beurtuah tanganku kai-an
Kalahnya musoh dapat kucita
Tinggi-tinggi si matahari
Burak meunari di ateueh geuta

Kalee tidak putroe kucari
Hareuemlah neugri tidak kugisa
Cut Usman meunan neukheun
Putroe buluen mameh muka

Teutap sinan Cut Usman
Dua sajan putroe muda
Han tom neujak meusipade
Hana tom cre meusideupa

Lam meuligoe uroe malam
Ngon cut intan ate suka
Amma bakdu teuma dudoe
Raja nanggroe lon calitra

Geunap uroe ate sosah
Mita ilah nyang seujahtra
Inbat malee raja meugah
Jeuep babah gop ceureuca

Seubab putroe jitroh agam
Ate deundam galak suka
Neukeumeung poh tuan putroe
Hana bagoe sayang raya

Neukeumeung poh Cut Usman
Putroe intan tan cre dua
Sayangneu that keu putroe jroh
Ameuk saboh laen hana

Han ban keunong 'oh neupike
Meunyo mate sayang raya
Geunap uroe raja syawe
Pakri pike nyang seujahtera

Sosah raja teungeut han le
Neupike keu putroe muda
Aneuk saboh laen tan le
Meuhad mate sayang raya

Meunan ingat raja nanggroe
Hana bagoe sosah raya
Teuduek dilee raja sosah
Keu Cut Basyah lom lon buka

Di gop nyanpi ate sosah
Tan neupeugah dilee masa
Yoh meunikah masa dilee
Tan neubri thee ubak raja

Nyang jeuet sosah Cut Usman
Jinoe kaman lon bicara
Meuhan rela raja nanggroe
Lon pabanroe ka troh masa

Ka teukeudi nibak Tuhan
Baranggajanpi mubala
Han ek tulak buet di Tuhan
Ateueh ensan barang suka

Meunan pike Cut Usman
Yoh masa nyan neumat cokma
Tungkat dilee nibak Syiah
Neupoh pantah atueh donya

'oh ban neupoh atueh bumoe
Teubiet lhee droe aneuk raja
Rupa hebat hana bagoe
Bak jaroe peudeueng ngon cokma

Geunta Sukma nama sidroe
Lon peugah soe nyang keudua
Si Geumpa Alam dua jadi
Raja Pari nyang keutiga

Peurkasa that jih banlhee droe
Adat nanggroe jigeulawa
Sakti utoh jih banlhee droe
Jeuep-jeuep nanggroe han soe sangga

Teudong di keue Cut Usman
Jibet yoh nyan jaroe dua
Ampon tuanku meuribee ampon
Tapangge lon peue na haba

Ho neusuroh lon uroe nyoe
Tohbu nanggroe neuyue ngaza
Cut Usman seuot laju
Adoe teungku lon hei gata

Lon leupah buet bak nanggroe nyoe
Lon cok putroe aneuk raja
Gata banlhee ulon suroh
Tajak beu troh ubak raja

Ubak raja tajak peugah
Lon ka salah lakee gata
Talakee ampon lon ka salah
Lakee meu'ah seugala deesya

Insya Allah tuanku droe
Maklum kamoe buet meukuta
Geunta Sukma beudoh jijak
Troph le ubak mideuen raja

Ka jitamong le u dalam
Syahi alam kalon sigra
Bak muka han jeuet tapandang
Tamse biram uleue bisa

Beudoh rakyat seukalian
Jamee datang peumulia
Raja kira jamee jarak
Keunan jijak ubak raja

Hana neuthee nibak Usman
Di sinan bak putroe mudaq
Poteu raja atueuh bale
Keunan troh le ureueng tiga

Raja yue ek atueuh bale
Sabda doli bak peurdana
Ateueh bale jijak keunan
Mumat tangan deungon raja

Jamee datang neuyue pioh
Neujok bungkoh uleh raja
Pajoh ranup na sigapu
Marit laju lhee droe raja

Jibet laju jaroe meulayang
Ngadap sulton raja raya
Raja tahe hireuen mandang
Sang mumang meuhayak mata

Rupapi jroh hebatpi that
Nam blah pangkat bintang dada
Bajee direh keurawang meuh
Di atueuh intan meutia

'oh meuhayak cahya peungeuh
U ateueh raja nyang raya
Saboh peudeueng nibak jaroe
Zamrut hijo bak keupala

'oh jilihat cahya meuhambo
Soe nyang eu seumilu mata
Saboh bari puteh ulee
Jroh that lagee indah rupa

'oh tee jieu di ateueh bajee
Jroh teuntee saban ngon rupa
Saboh cokma nibak jaroe
Ngon pudoe geutatah lingka

Hijo biro cahya soe-broe
Hana bagoe elok rupa
Rupa indah that seureuloe
Di jaroe bak Geunta Sukma

Raja Meuse hireuen keudroe
Keunan laloe neueu rupa
Teuma leumah dalam ate
Saleh pakri that peurkasa

Pakriban jih keulakuan
Kueu rakan tamse raja
Ubak meuntroe neukheun rijang
Nyoe bit rakan aneuk raja

Ampom tuanku syahi alam
Hana maklum po meukuta
Geunta Sukma jibet jaroe
Seureuta ngon ngadap raja

Jikheun seumbah po di kamoe
Dua jaroe di jeumala
Usman Basyah raja ade
Di yup gaki po meukuta

Raja Malek nanggroe Makah
Keurajeuen luah nanggroe Indra
Meulintee Raja Haliman Syah
Nyang that meugah di Antara

Turon-muron raja mupangkat
Meusyeuhu that jeuep-jeuep donya
Meunan tuanku patek peugah
Neupeukek seumbah keu po meukuta

Neulakee ampon nyang ka sala¹
Bek neumarah keu aneukda
Kareuna aneuk di tuanku
Umu baro gohlom raya

Miseue kulat bangon laku
Malam neue beungoh raya
Meunan tuanku laman pandang
Ampon sibarang sa'ah nyang ka

Ampon tuanku sibarang-barang
Gaseh sayang keu aneukda
Seumbah ampon saja-sajan
Keu junjongan nyang mulia

Raja Meuse jawueb pantah
Nyoe lon peugah ubak gata
Si Usman hana kutueng
Aneuk uteuen mante rimba

Hana kutueng keu meulintee
Aneuk asee buet han jeumba
Patot jiek u meuligoe
Sajan putroe padum lama

Jinoe kakheun watee kawoe
Kayue jak woe bek kusula
Meuhan jitren ingat keudroe
Aneuk bisoe kupufana

Aneuk paleh biek pancuri
Biet teumaki nibak ja ja
Jakleh kawoe kajak bri thee
Aneuk asee bek kusula

Geunta Sukma deungo meunana
Beungeh yoh nyan hu ngon mata
Seubab neukheun si pancuri
Beungeh sang ri uleue bisa

Geunta Sukma pike meunoe
Bit raja nyoe keumeung fana
Cut Usman aneuk dagang
Adat neucang han soc sangga

Beuna salah bek neuhaloh
Gop nyan jeuoh keunoe teuka
Syeedara han kawomneu tan
Meulaenkan gaseh po meukuta

Neuniet tuanku namiet neubloe
Si boh duroc yup istana
Neugantung manyang neuboh jeuoh
Badan tuboh di meukuta

Cut Usman hana mawang
Neupeusayang po meukuta
Ampon tuanku sibarang-barang
Di yup kidam kawoh meukuta

Raja seuot meunoe lagee
Aneuk asee peue bicara
Peue kapeugau, nyang kon bak kee
Aneuk gutee that ceulaka

Bek le tuto kah banlhée droe
Nyang got jak woe yoh goh fana
Pakon tuanku meunana narit
Sang aneuk miet droeneu raja

Babah tuanku beuna larang
Cubeueh ceukang hana guna
Neumeututo ingat dilee
Meuka malee keupeue guna

Tuto tuanku hana patot
Tuto karot 'oh neubuka
Hana neungieng jeuoh ngon rab
Droeneu deelat sang-sang raja

Patot neukheun jih pancuri
Raja ahli that eelia
Han tom siblet karot buettan
Ban kheun Tuhan hana lupa

Takheun pancuri raja ade
Keumeung mate saleh gata
Hana patot tuto brok that
Gata deelat kon biek raja

Geunta Sukma beungeh han ban
Jimeung kuran takue raja
Lah jitakot keu Cut Usman
Jigrak badan ban geureuda

Raja Meuse ji'uet sidroe
Jipuwoc bak Raja Muda
Jiteureubang jih banlhee droe
Siat sampoe bak cut banta

Cut Usman di seuramoe
Deungon putroe atueuh geuta
Geunta Sukma nyan banlhee droe
U seuramoe jiek sigra

Dua jaroe jibet pantah
Jipeuseumbah tuto raja
Ampon tuanku payong nanggroe
Kamoc lhee droe ka meugisa

Tuto tuanku patek peugah
Lon peuseumbah ubak raja
Abeh bagoe lon peuseumbah
Lakee meu'ah bak sripada

Jaweueb raja tuto karot
Hana patot nyang kon jeumba
Geukheun tuanku si pancuri
Biek abdi mante rimba

Han jeuet lon kheun tuto seudeh
Jeuheut abeh troh bak ja ja
'oh lon deungo sang ka tuloe
Kamoe kon droe le bantiga

Lon keumeung poh raja deelat
Sayang lon that putroe muda
Lom lon takot keu tuanku
Raja hantu ka rab fana

Jinoe raja he deelat syah
Lam beureukah ka lon singkla
Pakri nyang got bak junjongan
Bahle kaman lon pufana

Cut Usman seuot pantah
Peuc tapeugah nyang kon haba
Pat takeubah raja nanggroe
Taba keunoe ubak hamba

Geunta Sukma jihah babah
Teubiet pantah sinan raja
Ka meuikat jaroe gaki
Hana sakri that seungsara

Tuan putroe kalon ayah
Neumoe bobah ngon ie mata
Putroe jiklik hana bagoe
Pakon meunoe po meukuta

Allah Allah he Po tallah
Pakon ayah ka meusingkla
Jitajo le bak Cut Ushman
Pakon meunan po meukuta

Pakon ayah po junjongan
Han neusayang siblah mata
He putroe cut bungong mirah
Buettan salah ayah gata

Tuto karot dum neuteuoh
Neukeumeung poh lon ngon gata
Geunta Sukma neukeumeung poh
He putroe jroh laen dumna

Teuma jidrop raja nanggroe
Jiba keunoe ubak hamba
Ulon yue jak lakee ampon
Salah that lon deungon gata

Geukheun keu lon peue nyang galak
Ate rusak Geunta Sukma
Ayah gata he putroe ti
Tan geuturi laen raja

Seubab babah bulee basah
Kareuna lidah jeuet binasa
Jinoe tuanku tapeuampon
Ayah ulon po meukuta

Hana deesya ayah bak lon
Nyang peuampon ureueng tiga
Hana di lon meunan buettan
Phon jameun kon jinoe masa

Han lon pubuet meunan buettan
Lon bak Tuhan teumeureuka
Bitpi meunan han peue salah
Insya Allah na buet hamba

Allah Allah he Po tallah
Lon pabanbah ayah gata
Adat mate bunoe ayah
Lon ka teulah deungon gata

Panyang umu mantong ayah
That meutuah lon ngon gata
Meuteumeung eu rupa ayah
That meutuah mata hamba

Wahe putroe bungong pade
Ban nyang pike nibak gata
Meunyo ayah gata intan
Di lon tuanpi ayahda

Ampon tuanku meuribee-ribbee
Ulon lakee bak meukuta
Insya Allah bungong keumbbee
Ban talakee kabui pinta

Cut Usman neukheun lagee
Ngon raja lhee neumeusabda
Neukheun ubak Beuribot Tapa
Ubak gata lon peugah nyoe

Cuba tanyong ubak raja
Geutem rela lon ngon putroe
Lon keumeung com kawoh raja
Bek na deesya bandua droe

Cuba tanyong tapareksa
Ubak raja ayah kamoe
Meunyo hana neupeuampon
Ban nyang hukom gata lhee droe

Adat tapoh han lon tham le
Beuthat mate raja nanggroe
Akai jeuheut raja jahe
Miseue kafe buta tuloe

Kri nyang galak bamlhee gata
Hana sangga nibak kamoe
Teungoh meututo Cut Usman
Raja sinan neudeungo proe

Ayah putroe yo teumakot
Leungo atot badan asoe
Yo meugum-gum hana teudoh
Teubiet bioh dum meataloe

Teumakot that Raja Meuse
Sang nyum mate ajai sampie
Teubiet bioh han le kira
Teuboh tika di seuramoe

Geunta Sukma khem bantiga
He ceulaka pakon meunoe
Peue geupeugot raja bakoh
Abeh teuboh teumpat putroe

Nyan karasa aneuk asee
Keu raja kee kakheun bisoe
Kapeuampon Cut Usman
Kakheun rijang bek kuseudoe

Kukoh takue kukoh badan
Kuboh tamon lhee ploh asoe
Masa dilee han kapateh
Raja paleh kreueh that gigoe

Teungoh jikheun haba meunan
Seuot yoh nyan ayah putoe
He pahlawan nyang that gagah
Lon mate sah sit ka bunoe

Tuto leupah tapeuampon
Salah ulon bak samlakoe
Nyawong tuboh darah gapah
Lon milek saha dum gatra nyoe

Tagantung manyang taboh jeuoh
Tan sidroe troh ubak kamoe
Di donya kon sampoe dudoe
Ban lon kheun nyoe bak samlakoe

Hana ubah bak lon tuan
Cut Usman aneuk jaroe
Bandua ngon putroe muda
Di jeumala geunap uroe

Tamse jantong aneuk ate
Meunan mise bak lon sidroe
Beurubot Tapa jideungo meunan
Jiploh tangan gaki jaroe

'oh lheueh jiploh jaroe gaki
Cut putroe ti seumbah ayah droe
Cut Usnan peurab pantah
Lom neuseumbah gaki jaroe

Raja Meuse kheun meutuah
He Cut Basyah payong nanggroe
Putroe jimoe maken rugha
Ingat raja ban lam taloe

Ampon deelat wahe ayah
Ka'lon peugah dilee puroe
Han neupateh tuto hamba
Bak neukira han mupaloc

Ailah Allah he po meukuta
Han peucaya tuto kamoe
Jinoe peue lom ka lheueh malee
Masa dilee lon peurunoe

Putroe jikheun meunoe meudeh
Bungong puteh sira jimoe
Ie mata ro hana teudoh
Putroe riuh leugat jimoe

**Poteu raja meunoe neukheun
He buleuen bek meudeh meunoe
Bek taingat buet ka leupah
Deungon tuah gata sidroe**

**Wahe aneuk putroe indah
Bandua kah deungon lakoe
Lon he aneuk sangkot pawot
Silap lupot jeuet keu rugoe**

**Bu meutuah puteh lumat
Lon ingat geunap-nap uroe
Bu phet kulet asoe mangat
Beu seulamat dua nanggroe**

**Bu meutuah cut Usman
Bandua ngon si nyak putroe
Deungo ulon bungong peukan
He intan keumala nanggroe**

**Raja neukheun pantah-pantah
Deungo lon peugah po samlakoe
Tameuniet lon he meuh meuntah
Hambateu sah ka lheueh tabloe**

**Nyawong tuboh darah gapah
Milek Allah dum sinaroe
Bak gata po lon ijadah
Ulon seurah dum jeuep-jeuep syoe**

**Amma bakdu ulon balek
Bek le adek lagee nyang ka
Ngon mukjizat Nabi Muhammad
Ngon keuramat dum eelia**

**Jinoe aneuk lon bri ingat
Pulang amanat dum bak gata
Nyanpat kuta ngon meuligoe
Deungon putroe milek gata**

Blang ngon gampong dum sinaroe
Ureueng nanggroe hukom gata
Cut Usman seuot pantah
Insya Allah ateueh jeumala

Abeh haba raja nanggroe
Pangge meuntroe dum peutua
Hoka gata waki bujang
Kajak rijang meuseuranta

Keyue teuka dum sibarang
Uleebalang ngon panglima
Bujang mudek baroh tunong
Jipeh mongmong subra donya

Rakyat jitren han peue tanyong
Lam-lam gunong abeh teuka
Uleebalang ngon pahlawan
Abeh keunan tren bak raja

Abeh jitren seukalian
Tamong keunan dum lam kuta
Tujoh uroe jitren sabe
Sang han lot le mideuen raja

Poteu raja neupeugah le
Tadeungo he dum bentara
Nyang jeuet gata ulon pangge
Kaoi janji lon meunada

Hajat ulon meukhanduri
Alem faki yue meudo'a
Cut Usman banta 'ali
Ulon rasi jinoe raja

Lon ka tuha han le asi
Rab ka mate ajai teuka
Lom neupeugah bak samlakoe
Raja nanggroe meunoe kata

He raja cut bungong uroe
Gata gantoe lon ka tuha
Meunan jinoe he aneuk beh
Lon peugah troh bijeh mata

Adat gop poh di rot di blang
Na soe sagang meuna gata
Mubek aneuk tatamah cang
Jampang-jampang jeuet tamaba

Raja Meuse yoh nyan pulang
Dum sibarang balatantra
Abeh neujok alat keurajeuen
Dum reuen-mareuen alat raja

Umong di blang kuta mideuen
Cut Usman kheun yoh nyan sigra
Insya Allah po junjongan
Nibak laman ateueh jeumala

Neupulang nanggroe nibak kamoe
Bungong jaroe po meukuta
Jinoe tuanku lon teurimong
Jinoe lon pulang bak sripada

Seuot raja he boh ate
Bungong pade bijeh mata
Bek tagundah bungong meurak
'oh ka tajak na ayahda

Abeh neujok seukalian
Raja yoh nyan lom meusabda
Hoka gata uleebalang
Di lua di blang bansineuna

Beudoh bandum seukalian
Tabai rijang banta muda
Raja Meuse phon hei ampon
Nyang awai phon mula-mula

Teuma rakyat seukalian
Ulon tuan ikot pula
Lheueh geutabai Cut Usman
Raja yoh nyan lom boh nama

Sulotan Meuse neurasi nan
That budiman bijaksana
Poteu raja lom meukalam
Bak uleebalang ngon panglima

Tadeungo he wadi meuntroe
Bansinaroe tuha muda
Nyang silapeh ka seuleusoe
Gohlom sampoe nyang keudua

Jinoe putroe lon peukawen
Mayoh meusyen meukeurija
Lon peugah dum lahe baten
Kon peue laen kaoi hamba

Bietpi ka lheueh jimeunikah
Gohlom sudah ulon kata
Bak donya nyoe lon bek jeuheat
Nyang meukeusud ka seumporna

Peue han ase jak peuase
Ubat beude ngon ramtaga
Di lon siblah sidroepi jeuet
Laen santeuet bandum gata

Uleebalang dum seuot le
Ban nyang pike po meukuta
Dum meuriam meugule-gule
Jipasang le su meutaga

Jitot sigo geureuda kafe
Nanggroe Meuse geunta raya
Aneuk jipo meugulong-gulong
Abeh puntong kayee rimba

Dua buleuen keurija sabe
Meusu beude tamse geumpa
Bumoe leungo langet mirah
Han peue peugah buettan raja

Jitet tanglong di cong kayee
Jroh that lagee peungeuh donya
Cut Usman saboh lagee
Tungkat dilee neumat sigra

Teubiet raja limong blah droe
Jibet jaroe bak cut banta
Keupeue tuanku pangge kamoe
Neukheun jinoe po meukuta

Nyang lon pangge gata keunoe
Peugot nanggroe dalam miga
Lon meukawen bak nanggroe nyoe
Deungon putroe aneuk raja

Bek malee lon deungon putroe
Saboh nanggroe tapeurupa
Bu meugantung dalam awan
Bek that manyang sireutoh deupa

Beu na rakyat dum di dalam
Pahlawan deungon panglima
Gata bandum seukalian
Mupeurasan di dalamnya

Lon bek malee lam nanggroe nyoe
Dum sinaroe buettan gata
Gaseh sayang dum sinaroe
Keu lon sidroe tan syeedara

Syeedara han kawompi tan
Meulaenkan ngon tulong gata
Beurubot Tapa seuot pantah
Insya Allah po meukuta

Nyang top malee Tuhan sidroe
Bandum kamoe tan kuasa
Jibeudoh le dum sibarang
Jiteureubang dalam miga

Geunta Sukma jideumpuk that
Nanggroe leugat jeuet lam hawa
Nanggroe jroh that peungeuh muphang
Pudoe intan ngon peurmata

Ngnggroe ubit hana layak
Nam uroe jak pasang guda
Ateueh nanggroe Raja Meuse
Jitet kande peungeuh donya

Rakyatpi le dalam nanggroe
Wadi meuntroe raja raja
Hana manyang nanggroe peungeuh
Jeumbatan meuh dum u donya

Hana miyup hana manyang
Nanggroe nyan sireutoh deupa
Jeumbatan meuh dum u bumoe
Dalam nanggroe Meuse raya

Raja Meuse teukap jaroe
Pane nanggroe di antara
Han tom nyang ka dilee puroe
Pane nanggroe dilee hana

Hireuen rakyat dum sinaroe
Gila keudroe pandang rupa
Su bonyian jroh han bagoe
Raja laloe deungo suara

Abeh gila ureueng nanggroe
Jideungo bonyoe dalam hawa
Uroe malam peungeuh muphang
Cahya intan ngon peurmata

Raja Meuse sosah ate
Neuyue pangge nujum peundita
Wahe bujang lon bri maklum
Jak tueng nujum keunoe sigra

Teungoh raja neukheun meunan
Troh jeumbatan dalam kuta
Phon di sideh dalam nanggroe
Hingga sampoe u leuen kuta

Jeumbatan nyan intan pudoe
Peungeuh han soe kuta raja
Dalam kuta Raja Meuse
Hana peue le dum peulita

Peungeuh nanggroe ngon jeumbatan
Buet saktian Raja Muda
Raja Meuse maken sosah
Peungeuh limpah troh u lua

Nujumpi troh keunan hampe
Raja kheun le meunoe haba
Wahe teungku guree kamoe
Peue meubunyoe dalam hawa

Deungon nanggroe ka meugantung
Cuba kalon neupeunyata
Kadang-kadang buet di Tuhan
Atawa ensan nyang keurija

Teungku nujum neuwa jaroe
Seureuta nyoe neupet mata
Leumah neueu lam pandangan
Sulotan Usman nyang keurija

Ampon tuanku syahi alam
Buet sulotan aneuk meukuta
Nanggroe luah hana macam
Ngon peurasan sianeka

Ngon jeumbatan intan pudoe
Ujong keunoe bak meukuta
Raja Meuse deungo meunan
That sukaan ate raja

Baro seunang ate deelat
Bak neutakat pane bala
Teukap bibi Raja Meuse
Bukon sakti hana ngon sa

Sakti tarek hana macam
'oh troh lam prang leubeh ganda
Bit ban jikheun uleh putroe
Dilee puroe han lon rela

Rab ceulaka ulon sidroe
Jiboh taloe jipufana
Meutuah that aneukku putroe
Meuteumee lakoe Raja Muda

Meusampe that putroe intan
Sret lam awan intan meutia
Meunan neukheun Raja Meuse
Mangat ate raja tuha

Teuduek dilee raja dasyah
Nyoe lon peugah sulton muda
Lapan uroe nanggroe manyang
Neucok yoh nyan tungkat cokma

Tungkat neucok nanggroe hilang
Dum sibarang han meuho ka
Han le sapeue tinggai sinan
Jiwoe yoh nyan lam keumala

Sulton Usman nibak putroe
Intat jinoe dalam kuta
Tan meunikah le ngon putroe
Ka lheueh putroe dilee nyang ka

Meundapat meuh deungon pudoe
Bungong jaroe ureueng donya
Dum teumeutuek agam inong
Keu cut bungong Raja Muda

Nam ploh geudong meuh ngon intan
Bungong tangan dum panglima
Raja Meuse kaya limpah
That barollah dum areuta

Sulotan Usman teutap sinan
Bak nanggroe nyan meuseusuka
Deungon Putroe Kariman Bent
Hana ton cre meusideupa

Amma bakdu lon kheun leugat
Jinoe ayat laen lon boh
Nyoe lon peugah putroe muda
Jroh that rupa puteh leusoh

Leubeh cidah nibak nyang ka
Cahya muka sang seumeuloh
Putroe ngon raja seudang-seudang
Soe nyang pandang ate putoh

Teuka gaseh deungon sayang
Sebab bimbang dalam tuboh
Sebab galak bak jikalon
Hana meukon gaseh teuka

Sang-sang sajanjih ngon putroe
Lam-lam lumpoe lam-lam jaga
Baranggasoe ate rindu
Binoe ngon teungku hana beda

'oh dum teungku tatem pandang
Putroe seudang jroh that rupa
Bit neupandang uleh teungku
Meunoe laju le neukata

**Astagfirullah la ilaha illallah
Ampon salah ya Rabbana
Meunan neukheun uleh teungku
Meungucap laju hana reuda**

**Nyoe lon peugah lom he adoe
Ureueng lakoe muda muda
Karimah Bentj jroh that bagoe
Sabe keudroe jimeuhaba**

**Adat geubri meuh siploh peutoe
Peuet boh nanggroe gata raja
Nyang toh tatueng meuh ngon putroe
Takheun jinoe uleh gata**

**Teuma seuot ureueng sidroe
Tadeungo kamoe he syeedara
Di lon adek si cut putroe
Lam dunya nyoe le soe hawa**

**Meunan jikheun dum sinaroe
Ureueng lakoe tuha muda
Han jitueng meuh adat geubri
Putroe Bentj nyang jihawa**

**Bak jikheun nyan bek neutanyong
Rab ngon inong jimeuhaba
Teuma marit ureueng inong
Tadeungo lon he syeedara**

**Nibak gata meugah putroe
Bak kamoe nyoe han ho meuba
Tuan putroe peue han cidah
Meuh nyang mirah jeuep angeeta**

**Teuduek dilee kisah putroe
Lon kisah nyoe laen ulah
Seureuta lon balek ayat
Ban nyang mangat ulon kisah**

Meulagee sot ulon surat

Kureueng mangat ureueng peugah
Lon seumurat tan biasa
Tan bicara meuube drah

Lagi han tom lon meureusam
Lon mat kalam hana ilah
Haba raja han jeuet lon fam
Bek tawaham lon ka cidah

Lon surat nyoe wahe adoe
Lon meurunoe bak keureutah
Kheuetpi han got ulon tuleh
Lon he wareh bek neupeuhah

Nyang haba nyan teuduek dilee
Lon peuteuntee putroe muda
Teutap sinan lam meuligoe
Deungon lakoe Raja Muda

Hingga malam le ngon uroe
Tuan putroe meuseusuka
Han tom jarak meusipade
Hana tom cre meusideupa

Abeh buleuen troh bak buleuen
Hana peue kheun sulton muda
Dalam nanggroe hukom ade
Rakyat rame dalam banda

Nanggroe Meuse meusyeuhu that
Timu barat rakyat teuka
Sulton Usman teutap sinan
Bak nanggroe nyan ate suka

Cut Usman bak siuroe
Ingar u nanggroe gampong Indra
Teuma neukheun pantah rijang
Bak cut intan putroe muda

He putroe cut bungong tanjong

Taidin lon siat gisa

U nanggroe Indra ulon pulang

Lon jak pandang bijah mata

Lon jak kalon Hasyem Pari

Saleh pakri jih bandua

Idin putroe lon jak siat

Hana lambat ulon gisa

Seureuta lon jak ubak Syarwan

Lon neupeusan beu troh teuka

Rotnan lon jak putroe intan

Raja Syarwan peusan hamba

Kariman Benti seuot rijang

Lon jak sajan po meukuta

Lon tuanku bek neukeubah

Seutot langkah tuanku ba

Bek he putroe tajak sajan

Keunoe rijang ulon gisa

Lompi lon jak rot meulaot

Sangkot pawot lon ba gata

Uroe dudoe 'oh got nanggroe

Jeuet he putroe tajak gata

Putroe yoh nyan leumoh ate

Idin lon bri po meukuta

Neudong sideh lhee peuet uroe

Rijang keunoe ubak hamba

Meujeuet meunan idin lon bri

Jak keumbali u nanggroe Indra

Insya Allah pirak lipat

Meunan jroh that ban kheun gata

Teutapi na bacut salah

Han ek leupah ulon gisa

Dua buleuen di jalanan

Trep lon intan goh seumporna
Kadang-kadang di rot lintang
Han troh ban kheun lon ngon gata

Lintang di rot po junjongan
Bak lon tuan han peue mara
Lon leueng jaroe uroe malam
Bek na lintang bak rot raya

Mubek lintang di kayangan
Mupat laen ate suka
Cut Usman teukhem bacut
Cut putroe cut peugah haba

Ka neupaleng le ho laen
Sira neukhem Raja Muda
Putroe kheun lom meunyo meunan
Lon bri kaman jak neubungka

Teuma seuot Cut Usman
Adat meunanpi lon rela
Lon bri tanggoh he putroe ti
Buleuen haji troh bak gata

Han jeuet tuanku buleuen haji
Neukeumbali ubak hamba
Meunyo tuanku saket-maket
Buleuen peurapet beu troh gisa

Meuhan meunan han lon bri jak
Bahle apak di Antara
Ka lheueh neudong troh tujoh thon
Neupeungeut lon dilee masa

Janji ngon lon lhee peuet uroe
Lon di sinoe puteh mata
Nyoepi meunan neumeung jak lom
Meukon neugom ha le rela

Cut Usman teukhem keudroe
Sebab putroe hana rela
Bitpi neukhem ate sosah
Putroe indah got jijaga

Teuma neukheun rijang-rijang
Han trep intan ulon gisa
Buleuen peurapet troh lon keunoe
Gata putroe bek that rugha

Teuduek po cut lam meuligoe
Taleueng jaroe tabeuet do'a
Uroe malam taleueng jaroe
Beu troh lon woe bak aneukda

Han ubah le bungong meurak
Bahle lon jak siat gisa
Banta Hasyem lon jak kalon
Trep ka hantom lon eu rupa

Cut Usman meunan neukheun
Seureuta ngon neuboh mintra
Keunong mintra putroe indah
Seungap leupah tan le dawa

Ate sijuek tamse timah
Jieu leupah raja bungka
Adat meukon mintra neuboh
Hana teudoh jimat raja

Yoh nyan putroe mangat ate
Raja tren le di istana
Cut Usman neujak pantah
Neujak peugah bak tuan tha

Neuek leugat atueuh bale
Seumbah doli raja raya
Cut Usman neubet jaroe
Neupeugah droe heundak bungka

Idin tuanku laman siat
Patek hajat keumeung gisa
U Antara siat lon woe
Lon jak eu proe Hasyem muda

Lon meung kalon pagi peutang
Lon he intan tan kuasa
Lon he aneuk tan lon tu'oh
Saleh singoh tinggai donya

Lon he aneuk taniet tan le
Kadang mate di likot gata
Taniet tan le lon he intan
Pajan pajan tienggai donya

Bek neugundah po junjongan
Han trep laman keunoe gisa
Meuna umu lon bek saket
Buleuen peurapet troh lon gisa

Nyanpat putroe deungon gampong
Dalam hukom po meukuta
Dang-dang lon woe po junjongan
Harap laman bak sripada

Insya Allah po samlakoe
Inbat keunoe bek talupa
Cut Usman beudoh neutren
Sira neucom teuot raja

Bu meutuah po samlakoe
Beut troh tawoe u Antara
Meunan neukheun ayah putroe
Po samlakoe troh u lua

VII. PEUTROH JANJI NGON SYAMSUL KAM.. HASYIM JEUET KEU RAJA

Troh u lua po samlakoe
Neujak sidroe Raja Muda
Neupeuteupat timu jatoe
Matauroe neuboh keu tanda

Uroe malam neujak sabé
Bungong pade arong rimba
Neubeurjalan deungon gaki
Cut puteh di sidroe saja

Tujoh uroe neubeurjalan
Raja seudang saket lam pha
Cut Usman pioh dilee
Di yup kayee bak keupula

Sinan neupioh Cut Usman
Saket badaan ngon dalam pha
Sinan teueh bungong keumbee
Di yup kayee ka teurhanta

'oh ban neueh cut bangsawan
Teungeut pangsan hekneu raya
Peudeueng ngon kreh nibak badan
Dalam reugam tungkat cokma

Dua uroe sinan pangsan
Teukeudi Tuhan neubri bala
Troh geureuda saboh keunan
Cong kayee nyan jidong sigra

U yup kayee deuh jipandang
Leumah ensan teungeut indra
Mangat ate geureuda nyan
Umpeuenpi tan jijak mita

Dua uroe pruet ka deuek that
Jitren leugat ka jisama
Cut Usman sinan pangsan
Neutheepi tan sayang raya

Jiba leugat po samlakoe
Jipuwoe bak teumpat nyang ka
Cut Usman mantong pangsan
Dalam tangan tungkat raya

Peudeueng tungkat cut bangsawan
Dalam reugam Raja Muda
Jipo leugat tamse kilat
Jikarat bak gunong nyang ka

Dalam laot jipo leugat
Jikarat bak gunong raya
Nyan geureuda masa dilee
Yoh jiteumee lam kulet guda

Geureuda nyan mantong udep
Umu lawet hana tuha
Ate mangat hana bagoe
Sang-sang ka troe umpeuen ka na

Troh bak gunong keunan jiwoe
Po samlakoe gohlom jaga
Jipeudeuk le atueuh gunong
Raja seudang jimeung seuba

'oh jimamoh hancopi han
Tulong Tuhan atueuh banta
Di geureuda sosah han soe
Pakon meunoe si ceulaka

Han tom ensan meunoe bagoe
Kreueh that asoe sang meulila
Bahle ku'uet bulat-bulat
Meunan ingat po geureuda

Ji'uet laju banta indah
Sayang leupah Raja Muda
Ji'uet-'uet han jitem leupah
Dalam babah meukeumat lanja

Ulee han jeuet 'uet han leupah
Apoh-apah bak keunira
'oh jimamoh hancopi han
Geureuda nyan sosah teuka

Cut Usman puleh pangsan
Jaga rijang Raja Muda
Neukalon droe raja indah
Dalam babah po geureuda

Ingat euncien nibak tangan
Raja Syarwan bri pusaka
'oh neuingat Raja Syarwan
Burak sinan teudong sigra

Wahe burak nyang that sakti
Ka teukeudi atueuh hamba
Gaseh sayang bak uroe nyoe
Tacok kamoe dalam banya

Lon ka ji'uet le geureuda nyoe
Tacok kamoe takeulua
Jihpi tapoh bek takeubah
Haram jadah that ceulaka

Burak deungo sabda meunan
Jigrak badan jeuet keu naga
Raya nibak gunong sinan
Geureuda nyan jipriek dua

Jipriek babah yoh masa nyan
Cut Usman lheueh lam banya
Geureda nyan sinan mate
Jicok bangke jigeulawa

Jisrom geureda dalam laot
Dumna eungkot meukeurija
Seunang ate Cut Usman
Neueu sinan kayee raya

Bak kayee meuh dilee puroe
Yoh samlakoe keunan teuka
Nyoekue gunong dilee puroe
Jiba kamoe po-ceulaka

Nama geuheu Gunong Adimah
Manyang leupah hana tara
Tamse payong meunan pucah
Leusoh troh bak awan migas

Han jeuet taek deungon tatreng
Laot meualon sinan lingka
Meulaenkan jeuet tateureubang
Laen sibarang han kuasa

Cut Usman peurab keunan
Bak kayee nyan neueu rupa
Neujak kalon pakri bangon
Mirah renum meuh suasa

Bungongpi le pudoe intan
Neupot rijang Raja Muda
Neuboh bungong lam keulandan
Ikat rijang bak uram pha

Burak sinan gohlom hilang
Neukheun rijang meunoe haba
Wahe burak nyang saktian
Kateureubang nanggroe bunda

Ubak nanggroe Raja Syarwan
Taba keunan lon le gata
Burak seuot rijang leupah
Neuek pantah po meukuta

Neuek rijang tuanku jroh
Burak beudoh jipo sigra
Tamse kilat jiteureubang
Leumah daratan nanggroe raya

Troh jipo bak nanggroe Sya'iran
Jieu sinan rakyat that bha
Di dalam blang that barollah
Guda gajah deungon unta

Ubak burak Usman kheun
Peue buet ureueng di blang raya
Lon eu rakyat 'oh peunoh blang
Cuba pandang peue peukara

Burak seuot pantah rijang
Ureueng muprang po meukuta
Raja Hindi ngon Sya'iran
Buet cut intan putroe muda

Raja Hindi lakee meukawen
Hana jitem jeuet prang raya
Meunyo meunan tatreng siat
Lon jak lihat pakri rupa

Burak sujud le meurang-rang
Leugat keunan dalam tantra
Troh u bumoe Cut Usman
Mat u tangan tungkat pusaka

Neupoh tungkat ateueh bumoe
Jeuet meuligoe deungon kuta
Kuta luah troh lam awan
Pudoe intan hu meunyala

Dalam kuta le that rakyat
Peunoh sarat troh u lua
Bangsa pari dum rakyat nyan
Mat bak tangan peudeueng cokma

Jipasang dum ateueh kandran
Gajah hitam ladom guda
Ateueh singa ladom pasang
Ladom tuan ateueh naga

Raja Hindi ngon Sya'iran
Tahe mandang jieu rupa
Jieu tantra ka peunoh blang
Kuta teudong siklep mata

Raja dua ka teupike
Saleh pane keunoe teuka
Ateueh kuta teudong payong
Alam sirong hijo warna

Ngon meuriam dum teudu-du
Leumah jieu uleh tantra
Hireuen tahe seukalian
Han tom meunan jieu kuta

Turab intan deungon pudoe
Kuta tanggoe troh lam hawa
Raja dua sang teumakot
Prangpi seungap sikutika

Rotdeh rotnoe meusu geundrang
Rakyat riwang lop lam kuta
Bandua si rakyat riwang
Seungap padang han le kubra

Raja Hindi meunoe pike
Jinoe bahle lon pareksa
Kadang pane Brahman Sakti
Kuta tinggi lon eu rupa

Jipeugah le ubak meuntroe
Tajak lhee droe jinoe gata
Tajak tanyong 'oh na langkah
Pat daerah keunoe teuka

Tajak leugat pantah lari
Kuta tinggi lon eu rupa
Meuntroe beudoh jijak leugat
Troh le siat ubak kuta

'oh troh keunan ubak pinto
Meuntroe tahe hireuen mata
Sebab jieu leupah luah
Pudoen gon meuh turab kuta

Jieu rakyat teumakot gli
Panyang miseue lhee-lhee deupa
Rupa hebat han soe pandang
Mata nyum sang ban nuraka

Meuntroe lhee droe that teumakot
Yo ngoh atot pucat muka
Rakyat pari tanyong pantah
Pane langkah lhee droe gata

Pane nanggroe peue tajak eu
Peugah laju yoh goh fana
Meuntroe yoh nyan yo meugam-gam
Jikheun rijang meunoe haba

He pahlawan nyang that meugah
Nyang troh langkah suroh raja
Raja Hindi yue jak kamoe
Bak kuta nyoe baro nyata

Hireuen raja jaroe teukap
Ngon sikeujap teudong kuta
Soepo kuta peugah rijang
Lon jak riwang peue nan raja

Meuka meusoe nama deelat
Jinoe leugat lon jak gisa
Sulotan Meuse nyoeho datang
Tayue rijang keunoe teuka

Rotdeh rotnoe tayue peugah
Beu troh langkah dua raja
Meunyo han troh ingat keudroe
Kuboh taloe dumna tantra

Raja kupoh kukoh reukueng
Kuba u krueng dum lasyeuka
Tajak riwang jinoe leugat
Bek trep lambat rijang teuka

Peue lom kadong he binatang
Kajak riwang bek trep jula
Rotdeh rotnoe kajak peugah
Bahle buet kah keunoe kaba

Meuntroe beudoh pantah leugat
Teumakot that yo angeeta
Deungon siat troh le jiwoe
Bak raja droe Hindi nama

'oh troh keunan jipeuseumbah
Jibet pantah jaroe dua
Ampon tuanku payong nanggroe
Han tom meunoe lon eu tantra

'oh troh keudeh deelat payong
Jikheun bak lon nama raja
Sulotan Meuse Raja Usman
Han tom na meunan sakti raya

Jinoe deelat neubeurjalan
Bak raja nyan geuyue teuka
Ngon seukarang neubeurangkat
Meuhan ingat dum geusula

Ban raja deungo meuntroe peugah
Dum geukeubah dalam dada
Pane raja jikheun tuto
That teukabo aneuk ceulaka

Jitheer that droe tarek sakti
Tan jituri laen raja
Raja tanyong lom bak meuntroe
Pakri bagoe kaeu rupa

Tuanku ampon bit tarek that
'oh lon ingat han soe sangga
Kuta leusoh troh lam awan
Pudoe intan meuh peurmata

Rakyat pari tuanku le that
Rupa hebat sang nuraka
Cokina beusoe dum bak tangan
Miseue panyang lhee-lhee deupa

Jipasang dum ateueh kandran
Gajah hitam ladom naga
Sang raja nyan keusaktian
Meunan macam lon eu rupa

Jiyue peugah rotdeh rotnoe
Kaimoe lhee droe yue me haba
Meuhan lon jak po junjongan
Jidrop laman jiboh sula

Bitpi meunanan ampon doli
Cuba pangge nujum sigra
Yoh nyan nujum meuntroe pangge
Keunan troh le ubak raja

Raja peugah ubak nujum
Teungku kalon raja teuka
Pane raja hobu langkah
Peue jipeugah nyang kon haba

Yoh nyan nujum buka surat
'oh jilihah jipet mata
Leumah jieu lam pandangan
Jibet rijang jaroe dua

Ampon tuanku ka lon lihat
Sakti kreueh that atueuh donya
Tarek sakti hana macam
Siat karam bumoe donya

Ka lheueh talo Geunta Alam
Raja laen siklep mata
Gop nyan tuanku waliyullah
Usman Basyah dilee nama

Sulotan Meuse gop nyan jinoe
Le that nanggroe taklok raja
Nyan sulotan nanggroe Meuse
Hukom ade raja eelia

Nyang troh keunoe po junjongan
Geudeungo prang reuloh donya
Keumeung peugot deelat makam
Bek le muprang haro-hara

Kon peue laen geumeuhajat
Hana jeungkat that eelia
Patot tuanku neujak junjong
Tamse tanglong peungeuh donya

Seuot meuntroe nyang jak bunoe
Jikheun meunoe lom bak raja
Nibak ulon ampon doli
Sabda geuyue me raja bandu

Meuhan lon jak po junjongan
Salah laman akhe masa
Seuot raja rijang-rijang
Jakleh kaman tame sabda

Leupah meuntroe me habaran
Bak Sya'iran peutroh sabda
Ban nyang suroh sulotan Usman
Sigeutu han ubah haba

Banlhee meuntroe troh le keunan
Tamong yoh nyan kuta raja
Meuteumeung ngon Raja Sya'iran
Jibet tangan di jeumala

Ampo tuanku payong nanggroe
Nyang troh kamoe bak meukuta
Sulotan Meuse ka troh datang
Ngon angkatan sangat that bha

Nyang troh ulon keunoe langkah
Neuyue peugah bak sripada
Beu troh keudeh neumeulangkah
Poh dua blah beu troh teuka

Meuhana troh ingat keudroe
Geuboh taloe bak angeeta
Raja raja keunong tangkap
Laen rakyat keunong sula

Ka loh peugah deelat ampon
Bek salah lon akhe masa
Meunyo neujak beudoh leugat
Uroe ka rab pukoi dua

Meuhan neujak ingat beu that
Keunong ikat bandum rata
Meunan jikheun uleh meuntroe
Beudoh jiwoe meuntroe raja

Raja Sya'iran teumakot that
Beudoh leugat deungon tantra
Jibeurangkat ngon pahlawan
Adi juhan ngon panglima

Raja dua geubeurangkat
Ubak deelat Raja Muda
Raja Hindi ngon Sya'iran
Troph keunan bak pinto kuta

Sulotan Meuse bri hukoman
Neuyue tamong raja dua
Jibuka le pinto dalam
Tamong rijang dalam kuta

Cut Usman atueh bale
Rakyat rame ireng lingka
Raja dua keunan datang
Jiek rijang hadap raja

Mumat jaroe ngon sulotan
Cut Usman peumulia
Teuma jiduek bak keurusi
Sare-sare bandum raja

Na sikeujap duek di sinan
Troph le puan ranup rata
Sulotan Meuse neukheun rijang
Makeuen tuan ranup tuha

Raja Hindi sambot puan
Marit rijang sulotan muda
Cut usman buka kalam
Pakon tuan jeuet meudawa

Raja Hindi seuot rijang
Ubak Usman neucalitra
Awai akhe dum neupeutrang
Abeh maklum Raja Muda

Cut Usman kheun lom rijang
Bak Sya'iran neucalitra
Jinoe bek le gata muprang
Na lon tuan peugot gata

Bak Po tallah han jeuet meunan
Sabe ensan bek meudawa
Dum getanyoe umat Islam
Nyang tamuprang laen bangsa

Nyang jeuet troh lon bak gata nyoe
Uroe nyoe lon tamong tuha
Soe han pateh hukom Tuhan
Ureueng nyan lon boh lam sula

Hajat ulon beu seuleusoe
Neubri putre ubak hamba
Lon peukawan ngon raja nyoe
Bandua droe bek le dawa

Atawa mee lon peunikah
Neukheun pantah lon deungo haba
Bek meudawa nyang got bak lon
Ban nyang hukom lon keurija

Lon pubuet nyoe hukom Tuhan
Nyang got teelan bek le dawa
Raja Sya'iran seuot pantah
Ban nyang titah bak sripada

Nyawong tuboh darah gapah
Dum milek sah haram mulia
Dumna kamoe tuanku beh
Diyup kawoh po meukuta

Ban nyang hukom po junjongan
Bak laman atueh jeumala
Saiyah beuna tan soe bantah
Ban nyang titah tan soe sangga

Meunyo meunan tapeunikah
Putroe indah aneuk gata
Bek taubah ban lon kheun nyoe
Tinggai sinoe ulon gisa

Lon beurangkat bak uroe nyoe
Bandua droe bek le dawa
Insya Allah po junjongan
Ban nyang hukom ikot hamba

Sulotan Usman peukeumah droe
Dum sinaroe deungon tantra
Beudoh raja seukalian
Jak com tangan Raja Muda

Neumat euncien nibak tangan
Burak keunan teudong sigra
Teudong burak di hadapan
Abeh hireuen dumna raja

Neupasang le po samlakoe
Tungkat baroe neumat sigra
Kuta hilang rakyat tan le
Sulotan Meuse leugat bungka

Abeh hireuen uleebalang
Jieu buettan Raja Muda
Teukap bibi seukalian
Keusaktian hana ngon sa

Bit raja nyoe hana soe theun
Ban nujum kheun tan meutuka
Meunai jikheun dumna meuntroe
Po samlakoe laju bungka

Burak jipo tamse kilat
Jitakat bak Syarwan Indra
Jiteureubang uroe malam
Leumah daratan nanggroe raja

Jipo tajam tamse siwah
Jitawajah jeuep-jeuep raja
Padum lawet jiteureubang
Troh le keunan ateueh kuta

Burak sujud ngon meurang-rang
Sret keunan di leuen istana
Raja Syarwan duek bak tingkap
Deuh neulihat Raja Muda

Raja Syarwan tren u bumoe
Neukheun meunoe bak cut banta
Allah he aneuk bungong meurak
Ho ret tajak he bentara

Cut Usman tajo leugat
Seumbah deelat raja raya
Raja Syarwan ate keumang
Jiwa jicom Raja Muda

Wahe aneuk bungong mirah
That meutuah bijeh mata
Ek troh keunoe aneuk tajak
Tasaweue bak po ma gata

Bu meutuah bintang timu
Bu meusyeuhu jeuep-jeuep donya
Phon lam donya troh 'an dudoe
Dua nanggroe beu seujahtera

Meunan jikheun Raja Syarwan
Sira jicom ngon jiwa-wa
Raja Syarwan ate keumang
'oh troh keunan Raja Muda

Raja peukek u meuligoe
Peuduek jinoe atueuh geuta
Geuta intan meuh ngon pudoe
Tamse uroe limpah cahya

Sulotan Meuse duek di sinan
Neuseumayam atueuh geuta
Na sikeujap neueumayam
Troh idangan dendayang ba

Peuduek ukeue Cut Usman
Jibet tangan Syarwan Indra
Makeuen aneuk bu ngon gule
Bit rab pasi eungkot hana

Tabeue masen bek takheun-kheun
Nyang teumaguen ma ka tuha
Makeuen aneuk dua babah
Ampon meu'ah po meukuta

Cut Usman seuot leugat
Kru seumangat di jeumala
Lon niet neubri gunong intan
Sang neupulang nanggroe dua

Meunan bak lon he ma payong
Makeuen ngon lon sigo dua
Wahe aneuk bungong tanjong
Bah tinggi lon po bentara

Makeuen rijang samlakoe jroh
Buleuen peunoh bah tinggi ma
Cut Usman makeuen sidroe
Neusrah jaroe peugot r'ipa

Neupajoh bu sibuju jaroe
Nekmat ka troe Raja Muda
Neusrah jaroe sampoh babah
Marit pantah Syarwan Indra

Po dendayang pinah idang
Raja Syarwan tinggi dua
Cut Usman makeuen sireh
Meunoe meudeh marit ngon ma

Wahe ma po bungong keumang
Bak lon tuan sikrak haba
Na tamse ban matauroe
Hana bagoe peungeuh raya

Ateueh ulee dua jaroe
Lon he ma droe heundak meuhaba
Manok puteh jipo malam
Manok hitam jipo uroe

**Lon meung marit sipatah kalam
Syahi alam payong nanggroe
Bukon sayang bungong mirah
Ka patah di leuen meuligoe**

**Adat leupah kalam teulanjo
Ampoñ ma po dum sinaroe
Raja Syarwan teuma seuot
Jroh mupatot hana bagoe**

**Manoh puteh jipo malam
Boh mamplam peunajoh putroe
Bek antara leupah kalam
Adat tacangpi lon iem droe**

**Bukon sayang aneuk daroh
Sisoh-soh di leuen meuligoe
Idin tacarot deungon tapoh
He aneuk jroh rela kamoe**

**Cut Usman teuma seuot
Narit patot neukheun meunoe
Kru seumangat he ma po cut
Cit ulon bet atueh ulee**

**Pakon meunoe nanggroe gampong
Peugah bak lon bu meuteuntee
Pakon inong nyang na mudah
Agam sabohpi tan mubee**

**Ureueng agam pakon hana
Lam nanggroe ma bandum balee
Han got bangon pog eu rupa
Inong saja han got lagee**

**Jeuep-jeuep nanggroe ka lon juga
Meunoe hana lon eu dilee
Phon di timu troh u darat
Hana sapat na meuteumee**

Nanggroe he ma meutan agam
Ham got macam kueu lagee
Neueu di gop jeuep-jeuep teumpat
Agam le that dum meuteuntee

Adat meuna ureueng agam
That meuguncang jeuep-jeuep wate
Adat teukeudi nanggroe gop prang
Ureueng agam bah jikoh lhee

Gata he ma bukon malang
Inong suang abeh balee
Pakon meunan dilee masa
Inong saja ok di ulee

Syarwan deungo sabda meunan
Jimoe yoh nyan that meuree-ree
Wahe aneuk Cut Usman
Nyoe lon kheun ban bungong keumbee

Suroh nibak tiep-tiep kamoe
He samlakoe masa dilee
'oh na aneuk meunyo agam
Neuyue hamtamjih bu padee

Troh 'an jinoe meunan sabe
He boh ate bungong kayee
Jinoe he ma bek meunan le
Cuba pike ma pangulee

Bak nanggroe nyoe lon ba agam
Laen macam lon boh lagee
Pakri pike ma bak gata
Lon aneukda heundak lakee

Meuhan neubri nyang lon pinta
Bahle fana lon meuseubee
Bak lon pike got na agam
He ma intan bungong kayee

Neudeungo he ma ulon peugah
Tuto indah sang bu leukat
Lon peunikah jinoe gata
Deungon raja manyang pangkat

Sakti utoh han soe sangga
Pari Diwa nama deelat
Neukeurajeuen nanggroe Paya
Rakyat that bha timu barat

Dum pahlawan teuga teuga
Gunong raya jisrom leugat
Bek wahe ma lon tadawa
Keunoe lon ba raja deelat

Bek meunoe le miseue nyang ka
Han got laba bak jad-majad
Wahe aneuk bungong uroe
Bak lon sidroe ban nyang pakat

Ban nyang hukom nibak gata
Ikot hamba putik langsat
Meunyo meunan he ma putroe
Lon bri meuntroe jak peugah had

Lon yue beu troh eentreuk malam
He ma intan raja deelat
Cut Usman meunan pike
Hana lahe bak ma ubat

Tan neupeugah jen lam paya
Hana rela kadang deelat
Jinoe he ma peukeumah uroe
Linto keunoe lon ba leugat

Sajan linto rakyat kuba
Lapan laksa hana that brat
Bandum he ma tabri judo
Dara baro neuboh alat

Neuyue bri thee dalam nanggroe
Dum sinaroe miseue deelat
Inong muda tabri lakoe
Dalam nanggroe timu barat

Bek le meunan lagee dilee
Inong balee muka pucat
Tabri judo ban sinaroe
Na soe pakoe 'oh jeumeu'at

Gata he ma rugoe raya
Tan soe kira jampang arat
Adat he ma tameulumpoe
Soe tapeugoe peugah hajat

Di gop bandum nyang na lakoe
Jeuep-jeuep nanggroe ate mangat
Jak peukeumah lam meuligoe
Linto keunoe euntreuk le that

Taleueng tiree di seuramoe
Rakyat keunoe sajan deelat
Meuhan meunan malee kamoe
Seuramoe apak maken that

Insya Allah po samlakoe
Uroe nyoe jak peugleh teumpat
Ban nyang hukom gata sidroe
Bungong geutoe meutuah that

Lon he aneuk malang raya
'oh tuha lakoe meundapat
That meutuah bijeh mata
'oh na gata ate lon rab

Raja bri thee dalam nanggroe
Jeuoh ngon toe bandum rakyat
Jinoe adat kon ban dilee
Han got lagee miyup pangkat

Dum gata nyoe beu na judo
Linto baro timu barat
Abeh maklum sabda raja
Kon ban nyang ka dilee adat

Hingga malam le ngon uroe
Po samlakoe duck bak teumpat
Dalam kama neuduek sidroe
Bungong geutoe ceudieng leukat

Teupok jaroe nibak boh pha
Mohon pinta bak halarat
Beu troh keunoe pari raya
Deungon sigra bek trep lambat

Na sikeujap troh le keunan
Bak Usman raja deelat
Di luq kuta dum pioh droe
Tamong nam droe ubak deelat

Raja Pari Geumpa Alam
Troh u dalam kama leugat
'oh troh keunan jibet jaroe
Keupeue kamoe that meukarat

Neupangge lon malam-malam
Deelat makam peugah leugat
Cut Usman seuot laju
Dalem teungku raya hajat

Lon peukawen gata sinoe
Bak nanggroe nyoe inong le that
Agam laen hana sinoe
Kareuna nanggroe nyoe laen adat

Lam nanggroe nyoe inong raja
Agam hana meusiurat
Lon nyang balek laen macam
Gaseh sayang keu lon beu le that

Raja sinoe ma seubot lon
Bek le inong nyang jideelat
Lon peukawen jinoe raja
Deungon gata ulon harap

'oh lheueh kawen deungon raja
Nanggroe raya gata nyang mat
Lam nanggroe nyoe takeurajeuen
Kuta mideuen deungon madat

Ban hajat lon ubak gata
Bek tadawa tulong beu tahan
Kon meugata lon peukawen
Laen-laen bandum rakyat

Pakri tuanku neupeukawen
Kamoe biek jen maklum deelat
Kamoe dum nyoe bangsa bak jen
Meunan geukheun bak jad-majad

Nyang biek ensan sabe ensan
Dum meulawan buet halarat
Bek takira meudeh meunoe
Maklum kamoe seugala had

Ulon tueng lheueh nibak mara
Dudoe masa laen ingat
Tameuaneuk dumna gata
Manusia dudoe meuhad

Na tadeungo haba nyang ka
Sidroe raja jen raya that
Jimeukawen deungon ensan
Na aneuk nyan ensan teupat

Jimeuaneuk salen-malen
Asai phon jen ayah meuhad
Lila Indra asai bak jen
Jikeurajeuen luah sangat

Nyoepi meunan dumna gata
Bek le dawa wahe sahbat
Tameuaneuk dum beu sunggoh
Sithon lhee boh beu takarat

Raja Pari seuot sigra
Ban nyang suka wahe deelat
Bak kamoe dum hana dawa
Ikot saja timu barat

Meunyo meunan dalem intan
Euntreuk malam bek le lambat
Jakleh pioh dum u mideuen
Sinan di leuen kuta deelat

Meudang malam uroe laen
Gata dum jen sinan teumpat
Cut Usman neutren sidroe
Di meuligoe tan soe lihat

Teubiet laju troh u lua
Euncien sigra neutiek leugat
Ateueh bumoe euncien gisa
Kimah raya teudong jroh that

Lot ureueng duek lapan laksa
Toe ngon kuta raja deelat
Raja Pari duek di dalam
Ngon angkatan cukop alat

Deungon rakyat that barollah
Dalam kimah sinan teutap
Cut Usman leugat neuwoe
U meuligoe ubak teumpat

Na sikeujap beungoh uroe
Po samlakoe jak bak deelat
'oh troh keunan neukheun rijang
Euntreuk malam jadeh meuhad

Raja Pari ka troh keunoe
Dum sinaroe deungon rakyat
Yue peukeumah lam meuligoe
Dum sinaroe bak duek deelat

Aneuk dara dum lam nanggroe
Jak peugleh droe jeuep-jeuep teumpat
Euntreuk malam dum meunikah
Teungku Syiah nyang rame that

Teungku Syiah keunan datang
U dalam bak raja deelat
Dalam nanggroe aneuk dara
Dalam kuta keunan sarat

Dalam kuta sinan kawen
Singoh jitren woe bak teumpat
Sinan kawen sajan raja
Inong muda rupa jroh that

Hingga uroe malam laju
Geuyue bri bu bandum rakyat
Jibet idang bandum rata
Puri Diwa makeuen leugat

'oh lheueh makeuen dum sinaroe
Pinah jinoe idang leugat
Di seuramoe Raja Pari
Teungku kali jaroe neumat

Neupeunikah uleh teungku
Bintang timu deungon deelat
Ngon jeunamee han ek peugah
Meuh nyang mirah lapan seun brat

Lon peunikah raja inong
Keu cut bungong raja deelat
Lon meunikah inong raja
Keu hamba neubri le deelat

'oh lheueh nikah poteu raja
Neugisa teuma bak rakyat
Abeh bandum geupeunikah
Buet cut Basyah raja deelat

Jula malam jak beuradu
Teuma teungku neuwoe leugat
Rakyat jiwoe dum u tangga
Ate suka timu barat

Dumna inong ka na lakoe
Dilee sidroe jieh teupat
Cut Usman ate seuu
Ka troh napsu bagoe hajat

Diwa Pari lagi raja
Mat neuraca hukom rakyat
Tan le inong jaga nanggroe
Dum sinaroe agam teupat

Saban deungon nanggroe laen
Meunan po lem jinoe adat
Hukom seunang nanggroe aman
Meusyeuhuran timu barat

Tunong baroh ureueng teuka
Ureueng Jawa ureueng langkat
Meugah nanggroe ade raja
Hana reuda teuka rakyat

Kapai Cina kapai Cati
Hana khali troh meuneukat
Lapan reutoh raja sinan
Lam nanggroe nyan nyang mupangkat

Sakti kreueh that dum raja nyan
Laot intan jeuet keu darat
Jiteureubang dalam awan
Donya karam deungon siat

Hana lawan sakti utoh
Nanggroe kukoh le that rakyat
Cut Usman teutap sinan
Ate seunang 'oh neulihat

Geunap uroe ate suka
Duek lam kuta ngon ma ubat
Raja Syarwan peukong dapu
Pari maju rata urat

Cut Usman geunaŋ 'uroe
Sinan laloe deungon deelat
Umu sithon teutap sinan
Cut Usman ate mangat

Cut Usman bak siuroe
Neukheun meunoe bak ma ubat
Idin he ma keu lon sidroe
Hajat lon woe jinoe siat

U antara lon heundak woe
Ubak putroe pirak lipat
Trep that he ma tan lon gisa
Pakri rupa lon jak lihat

Raja Muda peugah laju
He ma teungku lon woe siat
Han trep he ma ulon gisa
Abeh lama buleuen Rajab

Saleh pakri banta muda
Siklep mata lon jak lihat
Sira lon jak u Kuta Beusoe
Lon ngon putroe janji that brat

Lon jak kalon keumeung kawen
Putroe canden aneuk deelat
Meunyo hana lom meunikah
Ma meutuah lon jipubrat

Bak siseun nyoe lon meunikah
Ma meutuah idin beu that
Raja Syarwan teuma seuot
He bintang sret bungong riwat

Wahe aneuk bungong mirah
Lon ngon ayah ingat beu that
Bek talupa uroe malam
Lon he bintang umu lambat

Saleh pajan lon lop kubu
He intan hu pirak lipat
Cut Usman seuot pantah
Insya Allah he ma ubat

Cut Usman peurab laju
Seumbah ibu deungon deelat
Trob u lua po samlakoe
Euncien di jaroe laju neumat

Neugisa euncien nibak jaroe
Burak ragoe teudong di nap
Jibet sayeuep pantah sigra
Keupeue hamba wahe deelat

Cut Usman seuot sigra
Hajat raya lon beurangkat
Ubak gampong Kuta Beusoe
Keunan lon woe ubak deelat

Burak deungo sabda nieunan
Jikheun yoh nyan neukek leugat
Mangat rijang yoh goh jula
Lon po lanja miseue kilat

Sulotan Usman neukek pantah
Jipo bagah deungo siat
Jiteureubang tajam raya
Ban boh lila dala.n asap

Tujohe uroe jiteureubang
Troph bak makam raja deelat
Ateueh kuta ka troh keunan
Sujud yoh nyan pantah leugat

Ka teudong di leuen meuligoe
Tuan putroe ngieng bak tingkap
Ban neukalon Cut Usman
Putroe yoh nyan kheun bak deelat

Neukheun ubak raja raya
Ka troh banta nyang lon hajat
Ban raja deungo putroe peugah
Suka leupah ate mangat

Troph ban hajat raja raya
Putroe muda meutuah that
Poteu raja tren u bumoe
Deungon putroe judo deelat

'oh troh keunan bak samlakoe
Neucom bak dhoe neuwa leugat
Sira neukheun meunoe haba
Banta muda meutuah that

Troh ban takheun dilee masa
Jipreh gata di cut ubat
Hana jitem laen raja
Meukon gata bungong riwat

Beuthat tuha jiduek keudroe
Baranggasoe hana hajat
Bahle puteh ok di ulee
Jikheun bak kee bungong langsat

Meukon gata di jih lakoe
Bah jitiiek droe dalam bakat
Jinoe aneuk ka troh tawoe
Nyanpat putroe ban nyang hajat

Tapeulaku ban nyang suka
Milek gata pirak lipat
Cut Usman seuot sigra
Di jeumala aneuk deelat

Neumat jaroe Cut Usman
Peukek yoh nyan bungong riwat
Peiduek laju ateueh geuta
Ba'nta muda rupa jroh that

Di seuramoe lam meuligoe
Neutren putroe aneuk deelat
Ngon pakaian dum bak asoe
Tiwah uroe teungoh leubat

Deungon ikai nibak jaroe
Ngon patam dhoe sang malakat
Gleueng bak gaki ulee intan
Gleueng di tangan jroh meukilat

'oh lheueh jingui dum pakaian
Hana lawan timu barat
Jaroe gaki gaca hitam
Dhoe meuandam sirong teupat

U seuramoe jitren pantah
Cut indah ate seunang that
Ka lapan thon putore meutha
Cut banta baro meundapat

Laju jitren u seuramoe
Bate bak jaroe meuh peurmata
'oh troh keunan u seuramoe
Tajo putroe ubak banta

Nateu keunoe he cut abang
Neusawewe lon trep ka hana
Pajoh cutbang ranup jatoe
Bek lon adoe sang mutiara

Sang-sang tabri gunong intan
Meunan sang-sang bak kakanda
Bak lon adek sapeuepi tan
Jeuep-jeuep uteuen lon meuraba

Abeh laot lon jeumeurang
Nyawong hilang tan lon kira
Teuingat lon uroe malam
Janji intan deungon hamba

Han lon ubah ban nyang janji
Lon putroe ti teumeureuka
Tuan putroe seuot pantah
Meunoe ulah le neukata

Manyang-manyang Gunong Geurutee
Lam sapai bajee limpeuen ngon kala
Lon meukaoi jeuep-jeuep watee
Bu meusilee nibak banya

Cut Usman teuma seuot
Jroh that patot ngon suara
Manvang-manyang Gunong Gle Paroe
Matauroe trang cuaca

Geunap malam lon meulumpoe
Gata putroe sama dua
Padum lawet lon sinoe tan
Nyawong badan sajan gata

Sirasa nyum lon eh sajan
Meunan nyum sang bak kakanda
Di nanggroe Meuse geupula gadong
Di nanggroe Rom pade geupula

Lon troh keunoe Tuhan intat
Troph ban hajat geutanyoe dua
Wahe teungku uleebalang
Lon that bimbang ate gila

Sang-sang bek cre uroe malam
Nyawong lon sang sirasa dua
Hana teungeut uroe malam
Lon that deundam 'oh troh gata

Jinoe deelat neumeunikah
Neuyue peugah bak ayahda
'oh lon ingat lakoe lon tan
Nyawong badan bahle fana

Geunap malam lon eh sidroe
Ulon lumpoe po meukuta
Sang-sang lon eh ngon tuanku
Leumah lon eu trang that rupa

Han jeuet trep le po junjongan
Mangat rijang lheueh peukara
Ate lon nyoe sang-sang reule
Bek neuiem le po meukuta

Di gop laen 'oh lon pandang
Lakoe sajan geunap seunja
Di lon sidroe lakoe lon tan
Geunap malam lon uem ija

Euntreuk malam neumeunikah
Ban lon peugah bek meutuka
Meuhan jadeh euntreuk malam
Bahle karam nyawong hamba

Han jeuet trep le payong nanggroe
Yoh goh rugoe lon adekda
Cut Usman seuot pantah
Insya Allah he adekda

Euntreuk malam lon meunikah
Putroe indah troh ban pinta
Troph ban napsu gata intan
Euntreuk malam tan le lusa

Hingga malam le ngon uroe
Raja nanggroe neumeusabda
Neuyue pangge Teungku Syiah
Putroe indah ate rugha

Taba rijang teungku lhee droe
U meuligoe yoh goh jula
Bujang jak eu Teungku Syiah
Bujang peugah suroh raja

Teungku langkah u meuligoe
Ubak Putroe Syamsu Kama
Jinoe neujak sajan kamoe
Teungku lhee droe deungon hamba

Teungku deungo haba meunan
Beudoh yoh nyan neujak sigra
Trok le teungku u hadapan
Raja alam neumeusabda

Hoka gata Teungku Syiah
Jak peunikah putroe muda
Ngon jeunamee lhee boh gajah
Nyoe lon peugah cut banta a'la

Meuh keureutah deungon intan
Ateueh kandran gajah tiga
Tajak laju u meuligoe
Ubak putroe bek trep jula

Teungku beudoh sinan lhee droe
U meuligoe neuek sigra
'oh sare troh u meuligoe
Mumat jaroe ngor cut banta

Teungku neuduek ateueh tilam
Neumat tangan pantah sigra
Teungku cok ie ngon srat babah
Neupeunikah Raja Muda

**Lon peunikah po samlakoe
Deungon Putroe Syamsu Kama
Ngon jeunamee meuh keureutah
Ngon wakilah poteu raja**

**Cut Usman seuot pantah
Lon kabui nikah Syamsu Kama
Ngon jeunamee meuh keureutah
Kandran gajah lhee boh unta**

**Neubeuet do'a Teungku Syiah
Bri seudeukah teungku gisa
Tinggai raja di meuligoe
Sajan Putroe Syamsu Kama**

**Ate mangat hana bagoe
Ka na lakoe galak suka
Jula malam jak beuradu
Putroe meulu jak leueng tika**

**Tika sujoe dum meuh meuntah
Bukon indah bak eh raja
Putroe riwang bak Usman
Jimat tangan laju jiba**

**Jiba leugat ubak kaso
Jak beuradu sapat dua
Neueh sapat ngon cut meulu
Panyotpi hu leumah rupa**

**Rupapi jroh bee meuhayak
Leubeh gunjak nibak nyang ka
Ate mangat hana laku
Putroe laju meuseusuka**

**Rotdeh rotnoe that beureuhi
Cut putroe ti raja wa-wa
Teungeut mangat bungong teuprom
Nyang ka han tom teungeut hana**

Bak malam nyan teungeut pangsan
Meunan ragam proe umpama
Hingga beungoh deungon uroe
Beudoh putroe deungon raja

Tren jak manoe bandua droe
Cut putroe ngon Raja Muda
Meunan sabe tuan putroe
Beungoh uroe jak meuupa

Syamsu Kama ate galak
Han tom neuják meusideupa
Han tom jarak sajan lakoe
Lam meuligoe meuseusuka

Raja nanggroe ate seunang
Putroe intan judo ka na
Adat hantroh Cut Usman
Putroe intan judo hana

Hana jitem baranggasoe
Beuthat meuntroe beuthat raja
Cut Usman jipreh sabe
Beuthat matepi jirela

Troh ban hajat putroe indah
That meutuah aneuk hamba
Meunan ingat ayah putroe
Geunap uroe ate suka

Cut Usman sinan laloe
Po samlakoe lam istana
Nibak gampong Kuta Beusoe
Nama Putroe Syamsu Kama

Uroe malam rame rakyat
Meusapat lam kuta raja
Cut Usman jigaseh that
Dumna rakyat keunan teuka

Wadi meuntroe ireng sajan
Cut Usman jarak hana
Umu sithon teutap sinan
Bak nanggroe nyan Raja Muda

Ingat ancuk bandua droe
Po samlakoe hajat bungka
Neumeututo bak simalam
Ngon cut intan Syamsu Kama

He putore cut bungong geutoe
Siat lon woe bak aneuksda
Banta Hasyem lon jak lihat
Idin siat bungong jeumpa

Ban putroe deungo raja riwang
Neuba sajan lon meukuta
Bek neukeubah lon di nanggroe
Geunap uroe ate luka

Wahe judo putroe indah
He meuh mirah maen mata
Di lon ateuku that sosah
Sang aruah lon keulua

Di lon putroe keunoe langkah
Aneuk lon keubah bandua droe
Saleh mantong saleh han le
Jameun ka cre lon he putroe

Idin gata bungong pade
Hai boh ate keu lon sidroe
Troh lon keunoe ulon riwang
He cut bintang nyang seureuloe

Teuma seuot putik kumbang
Cut meusubang sira jimoe
Wahe tuboh laksana untong
Umpama peunyu dimakan tontong

Di teungoh laot teurapong-apong
Keupada Allah kita beurgantung
Lon jak teudong teupangkong-pangkong
Jeuep-jeuep gampong meuraba-raba

Kapai meulayeue di Laot Jawa
Mintak paksa di pinto kurong
Meuhun jikheun Kama Syamsu
Seuot laju po samlakoe

Wahe judo putroe 'ali
Lon keumbali bak rijang keunoe
Pulo Pinang buket nyang tinggi
Teumpat Cina tanam-tanaman

Kalee tuanku sudah keumbali
Ingatkan kami siang dan malam
Pulo Sabang Pulo Raya
Pulo Rimueng di bilang eumpat

Tidak untong apakan daya
Ikan kupanggang jadi dilumpat
Pulo Pinang laot teurlangsong
Pulo Beutung di Pulo Daya

Leupah kakanda pulang keu kampong
Mintalah tulong nibak Rabbana
Lom jikheun le putroe siti
Tuhanku neubri leupah bak mara

Abeh haba ngon putroe ti
Bungka doli woe u nanggroe
Wahe putroe idin tabri
Po juhari rugha jimoe

Tinggai putroe di istana
Neutren lanja po samlakoe
Neujak laju raja seudang
Euncien rijang suet bak jaroe

Neugisa le euncien rijang
Burak keunan teudong keudroe
Cut Usman le neupasang
Jiteureubang burak ragoe

Jipeuteupat u pinto donya
Dalam hawa jiteueng-teueng droe
Tinggai putroe di istana
Syang rugha dawok jimoe

Bu jipajoh han meurasa
Ingat banta ate seungkoe
Jiduek han keunong ate sosah
Putroe indah ingat lakoe

Sang-sang bangon hilang aruah
Keuloh-keusah lam meuligoe
Dawok bae putroe indah
Ate sosah sang geutampoe

Wahe judo uleebalang
Hana sayang keu lon sidroe
Neukeubah lon teungoh muda
Tajak gata woe u nanggroe

Keupeue tilam deungon kaso
Linto baro ka neuboh droe
Allah he teungku bungong tanjong
Neukeubah lon lam meuligoe

Gata leupah woe u gampong
Takeubah lon tinggai sidroe
Allah-Allah he Po tallah
Pakri lon bah tan le lakoe

Pakri ban lon ya Tuhanku
Tan le teungku lon eh sidroe
Keupeue lon gleueng deungon subang
Tan soe pandang han le lakoe

Bukon sayang bungong keumang
Sret bak karang putoh taloe
Tuboh lon nyoe sabe malang
Lakoe ka tan tinggai sidroe

Keupeue peuniti nyang mata intan
Taloe tangan nam boh sagoe
'oh tan lakoe soe lom pandang
Bahle karam nyawong sampoe

Keureuncung meuh lon bak gaki
Ho lon gule tan le lakoe
Wahe teungku muda seudang
Lon meulang-lang tinggai sidroe

Patam bak dhoe keupeue lon boh
Teungku jeuoh ka neuboh droe
Lon eh sidroe teungeut han le
Di lon ate dum geutampoe

Bahle lon jak jinoe lam gle
Mangat mate rimueng sidoe
Meuhan kutop teuntang ate
Bahle mate meutan lakoe

Allah he teungku uleebalang
'oh lon pandang po samlakoe
Hana ngon sa rupa gata
Dumna raja ka lon pakoe

Suara jroh miseue santan
Rupa na ban tiwah uroe
Mata dua tamse gintang
Ie gigoe sang yum nam katoe

Paleuet jaroe jroh meukulam
Lidam hitam jeuet bloe nanggroe
Allah he teungku 'oh lon ingat
Meujeumeu'at dawok lon moe

Bungong meulu keumang bagah
Bungong mirah keumang uroe
Teiduek dilee putroe indah
Lon peugah muda samlakoe

Burak leugat jiteureubang
Tujoh malam tujoh uroe
Troh bak nanggroe Haliman Syah
Jitawajah ateuh meuligoe

Burak jitren dalam kuta
Nam droe raja eu samlakoe
Ka teudong di leuen istana
Nam droe raja jak mat jaroe

Geumeucom-com ngon Syeedara
Nam teumuda mangat asoe
Sebabab kawoe Cut Usman
Uroe malam meuleueng jaroe

Haliman Syah keunan teuka
Neucom neuwa po samlakoe
Bu meutuah bungong jeumpa
Lon meudo'a geunap uroe

Beurijang woe bijeh mata
Kabui pinta ulon sidroe
Lon he aneuk sosah raya
'oh tan gata bungong uroe

Dawok lon moe geunap seunja
Bandua ngon mateu putroe
Lon kheun aneuk ho saleh ka
Laot mana ka mupaloe

Len meukaoi bijeh mata
Bandum cutda jipoh-poh droe
Lon he aneuk nyang that gila
Ingar gata tan di nanggroe

Pakon aneuk trep tagisa
Lon cinta malam dan uroe
Cut Usman seuot pantah
Ngon afuah tuanku droe

Mantong umu Tuhan keubah
Trok lon langkah lom u nanggroe
Adat meuhan lon ka mate
Buet Yahudi dilee puroe

Lon jak mita Yahudi nyan
Ka lon simpan bandua droe
Lon pon mate jih bandua
Rab mubala ulonteu nyoe

Ngon meutuah kawoh doli
Trok lon titi woe u nanggroe
Jak eu aneuk u istana
Bak adekda tuan putroe

Cut Usman neuek laju
Bak cut meulu u meuligoe
Putroe Meurak tajo lanja
Seumbah raja gaki jaroe

Nibak jaroe neumat puan
Cut intan neujok keu lakoe
Nyoepat ranup ampon deelat
Meulaen that lon eu bagoe

Tamse ureueng jak pot kulat
Neujak sit jula neuwoe
Neujak u timu jeuet u barat
Neujak teupat roh lam duroe

Tuan putroe neukheun panton
Meutiek ujung atueh lakoe
Di keude Batee geuikat ayon
Di Kuta Sukon geuputa taloe

Dilee neukheun woe u gampong
Pakon langsung u nanggroe neuwoe
Dilee neukheun woe u gampong
Bak ate lon ho laen nanggroe

Bak ate lon kon u gampong
Pakon langsung u laen nanggroe
Lon eu bangon laen macam
Peunyum lon sang laen bagoe

Di Pasi Rawa le bak aron
Di cong sukon aneuk beuragoe
Ulon lumpoe deelat ampon
Sang neucom-com dua putroe

Di nanggroe Meuse geupula gadong
Aneuk tiona atueh jaroe
Lon di sinoe mohon tulong
Bek roh langsaong laen bagoe

Tan mustajab do'a ulon
Teungku ampon napsu ka troe
Raja Muda deungo meunan
Neukheum yoh nyan po samlakoe

He putroe cut bungong keumang
Bek takheun nyan bungong- uroe
Hana di lon kumeukawen
Bungong maken laen nanggroe

Ulon kuwoe jak eu bunda
Seureuta lon jak lu putroe
Cutda Meulu lon peunyata
Saleh hoka bantujoeh droe

Seubab di lon leupah sumpah
Han jeuet ubah bak lon putroe
Ka lon seubot dilee masa
Geupeulara ulon sidroe

Han jeuet lupa putroe indah
Bak Po tallah salah dudoe
Tan galak droe putroe laen
Nyang that lon syen gata sidroe

Gata sidroe nyang lon cinta
Sampoe fana nyawong lon nyoe
Adat tapo dalam awan
Seutot sajan gata sidroe

Meureutoh laot lon jeumeurang
Nyawong hilang geunap uroe
Adat meukon tulong Tuhan
Lon hai intan nyawong sampoe

Bek tadawa lon he intan
Lon cintakan gata sidroe
Padum lawet lon sinoe tan
Nyawong badan lon di sinoe

Sirasa nyum lon eh sajan
Ngon cut intan lam meuligoe
Putroe Meurak ka teusinyom
Mameh renum muka putroe

Na sikeujap troh idangan
Buet dendayang lam meuligoe
Peiduek u keue Raja Muda
Putroe sigra nyang-srat jaroe

Makeuen tuanku bu sibabah
Neuwoe payah jeuoh nanggroe
Cut Usman neukheun sigra
Makeuen gata sajan kamoe

Bah tinggai lon ampon deelat
Makeuen leugat tuanku droe
Cut Usman deungo meunan
Makeuen yoh nyan leugat sidroe

Di geunireng putroe muda
Sabe mata ateueh putroe
'oh lheueh makeuen Cut Usman
Pinah idang u meuligoe

Hingga malam uroe seunja
Jak leueng tika tuan putroe
Cut Usman jak tidoran
Dua sajan tuan putroe

Panyotpi hu trang cuaca
Leumah rupa tiwah uroe
Beipi harom miseue ata
Gahru jeumpa nidah han soe

Teungeut mangat le bandua
Singoh jaga beungoh uroe
Tren jak manoe bak mon raya
Bandua ngon tuan putroe

'oh lheueh manoe Raja Muda
Neuwoe sigra u meuligoe
Boh makanan rupa-rupa
Makeuen raja deungon putroe

Na sikeujap uroe jula
Rakyat teuka dum sinaroe
Jak com jaroe Raja Muda
Baro gisa raja nanggroe

Jime teubee u meulason
Peunoh mideuen bungong jaroe
Jitren rakyat banda duson
Meuron-ron lam kuta nanggroe

Jak horeumat raja raya
Baro gisa po samlakoe
Ladom jime beureuteh pisang
Dalam idang dum jipasoe

Jak peusunteng Cut Usman
Neukheun nyoeban ubak putroe
Takheun rakyat bek jigisa
Bandum rata bek dilee woe

Bak ulon nyoe na bicara
Lon peurasa bak rakyat droe
Pioh dilee bandum rata
Bek jigisa lom u nanggroe

Meuntroe seuot insya Allah
Ban nyang titah tuanku droe
Meuntroe peugah dumna rakyat
Hukom deelat bek tawoe-woe

Singoh beungoh jeuet tagisa
Dan peutua imum meuntroe
Seuot rakyat insya Allah
Seuon titah bandum kamoe

Ban nyang hukom nibak deelat
Kamoe rakyat hana muwoe
Cut Usman kheun bak bujang
Jak tueng rijang ayah putroe

Seureuta ngon nam droe raja
Nyan teumuda po samlakoe
Tajak laju pantah sigra
Jak tueng raja ban tujoh droe

Bujang peugah sabda raja
Po meukuta dalam jieuem nyoe
Bantujoh droe neuyue teuka
Dalam kuta deungon kamoe

Ban raja deungo hama meunan
Beudoh yoh nyan bandum rata
Troh bak bale bantujoh droe
Po samlakoe peumulia

Pioh bandum bak keurus
Ranup troh le di istana
Peiduek ukeue ayah putroe
Raja nam droe dum seureuta

Cut Usman neukheun meuceh
Makeuen sireh he kakanda
Raja nam droe makeuen sireh
Bandum abeh ngon panglima

'oh sare lheueh makeuen sireh
Po cut puteh buka haba
Nyang lon pangge ayah keunoe
Seureuta ngon dum kakanda

Banta Hasyem gantoe kamoe
Pakri bagoe bak ayahda
Atawa mee atawa han
Neukheun rijang he kakanda

Raja nam dore seuot pantah
Sibeunalah kheun meukuta
Patot aneuk gantoe ayah
Meunan peuneugah nyang ka nyang ka

Patot that mee po junjongan
Gantoe tangan Raja Muda
Meuntroe wadi dum mupakat
Deungon rakyat sama juga

Amma bakdu laen macam
Banta seudang raja nanggroe
Janji keumah deungon pakat
Wadi rakyat deungon meuntroe

Banta Hasyem nyang geudeelat
Duek bak teumpat batee pudoe
Kulah kama geupeuseuon
Geuhei ampon deelat jinoe

Lheueh geudeelat ban nyang turon
Guree ulon meunoe rawi
Banta Hasyem nyang keurajeuen
Dalam mideuen duek samlakoe

Le redeuki mudah ujeuen
That sapeue kheun ureueng nanggroe
Hukompi kreueh buetpi sunang
Uleebalang that meubudoe

Buet nyang karot dum neularang
Yue seumbahyang ureueng nanggroe
Jakeuet pitrah dum geuyue bri
Yue ek haji dum sinaroe

Sibarang hai syara' Nabi
Cut puteh di nyang hareutoe
Ban kehun syara' hana ubah
Rakyat neukhrahan peugot nanggroe

Peugot meuseujid ngon meunasah
Peiduek syiah jeuep-jeuep sagoe
Neuyue aja aneuk miet cut
Neuyue jak beuet baranggasoe

Bek na dina bek meureubot
Neuyue kaluet aneuk nanggroe
Daem-kaem bak ibadat
Hana ingat le donya nyoe

Neupujoe Po Allah Ahad
Keunan sahbat suntok dukhoe
Keupeue laen hana hajat
Hukom teupat neuhareutoe

Nyankeu raja nyang saleh that
Beu taingat baranggasoe
Deungon meuntroe muwafakat
Keu ibadat sabé laloe

Bahle dumnan lon riwayat
Meunyo lambat glak lon keudroe
Lon tueng saboh nibak siplo
He teungku beh raja nanggroe

Meunyo panyang kureueng mangat
Lon riwayat haba bunoe
Banta Hasyem nyang keurajeuen
Hana peue kheun seunang nanggroe

Raja nam droe nyang peutimang
Nanggroe aman hana bagoe
Teuduek keudroe Cut Usman
Ate seunang bungong uroe

Cut Usman neuwoe riwang
Bak cut intan jeuep-jeuep nanggroe
Nanggroe M^atuse dawok neuwoe
Kuta beusoe kaem han ban

Lompi neujak nanggroe inong
Neutamong bak Raja Syarwan
Pulo Sumatrapi neulalu
Bak Cut Meulu nyang analan

Neujak saweue jeuep-jeuep teumpat
Nanggroe Arabpi neuriwang
Kakeu tamat wahe adoe
Hikayat nyoe cut bangsawan

Uroe Hameh lon peutamat
Watee meuhad pukoi lapan
Deungon tahan ulon peugah
Keu phon lhee blah tujoh lapan

Nibak uroe dua ploh lhee
'oh nan teuntee tamat haba
Gampong Pusong Lhok Seumawe
Bak pasok rame ureueng manoe



PN BALAI PUSTAKA — JAKARTA

Perpustakaan
Jenderal Kebu

899.22

RAM

h

